

R.4
5/23

Ed 6

W 113

12

6.

7

DOCTORIS
IOANNIS
VV. VIRINGI
PRESBYTERI, ET CA-
NONICI ATREBATENSIS.

DE
IEIUNIO, ET ABSTINENTIA
MEDICO-ECCLESIASTICI

Libri Quinque

Qui abstineus est adjiciet vitam. Ecclef. 17.
Non satiari cibis saluberrimum. Hippoc. in epidem.



RIGIACI ATREBATIVM,
EX OFFICINA GVLIELMI RIVERII,
M. D. XCVII.


DOCTORIS

IOANNIS
VV. VIRINGI
PRESBYTERI, ET CA.

DE
EIVSDEM ET ABSTINENTIA
MEDICOGESITATE

1517

Non habetis quod timeatis. Non habetis quod timeatis. Non habetis quod timeatis.




IN OFFICINA
M. D. XCVII

AUGVSTISSIMO,
AC SERENISSIMO
PRINCIPI ALBERTO
ARCHIDVCI AVSTRIÆ,
S.R.E. CARDINALI, ARCHIE-
*piscopo Toletano, Duci Burgundie, Co-
miti Tirolis, & Habsburgi, &c.*
Belgicæ Proregi

IOANNES VVALTERIVS VIRINGVS

Prosperitatem.

OETVM hunc de absti-
nencia meum Augustis-
simæ Serenitati tuæ, quan-
do ita nuper annuisset, volui in-
scriptum. Neque vero maiori præ-
sidio quisquam esse potuit Sere-
nissimo Alberto, qui non Mæce-
nas vnus aliquis atavis modo
Regibus, sed longo Imperatorum

Augustissimorum ductu editus ,
Albertum , Federicum maiores;
Maximilianos proauum , & pa-
rentem; Ferdinandum auum cum
Carolo Quinto germano fratre;
D. Rodolphum fratrem agnoscit.
Quid ? quod D. Philippum II.
Monarcham Catholicum , pro
quo vniuersam Belgicam admini-
strat, auunculum, & sororium ha-
bet? Accedit sacratissimi senatus
dignitas rarissimis ornata virtuti-
bus , fide in Deum , Regem, &
Belgium; in rebus agendis , indu-
stria , prudentia , constantia , &
quæ ceteras tuetur , sobrietate , ac
temperantia, qua sic enitet , vt cla-
rius exprimi non possit. Hinc no-
bis ea felicitas , quam ab omni an-
tiqui-

tiquitate maiores nostri, qui sapientia præstiterunt, habuerunt in votis, vt Regem consequeremur philosophum, & Philosophum regnantem. Humaniore disciplina politissimum, Philosophum acutissimum, summum Theologum. Regnantem sane ita prospere, vt nihil vnquam quod non confecerit sit aggressus. Vix Belgium attigerat, Hulstum, Arderiam, Portum Iccium munitissimas vrbes, spes hostium, armis expugnauit: atque interea dum nostris calamitatibus remedium parat, nihil de laboribus remittit, neque se respicit, inopinanti minacissimo hosti Ambianum Picardiæ cum æneis

tormentis, annona, belli neruo eri-
puit. Referebat ergo Augustissi-
mæ Sere.^{ti} Tuæ hanc meam qua-
lemcunque opellam nuncupare,
defendere volenti, valentique.
Ex Atrebatium vetere Ciuitate
CIC. 10. XC VII. Proprie Kal.
Aprileis.

A V.

AUGUSTISSIMO, AC
SERENISSIMO PRINCIPI

ALBERTO ARCHIDUCI AV-
striæ, S. R. E. Cardinali, Archiepiscopo
Toletano, Duci Burgundiæ, Comiti
Tirolis, & Habsburgi, &c. Bel-
gicæ Proregi,

AC PRINCIPI CLEMENTISSIMO.



*Vo non suetâ deferor orbitâ?
Quid musa tendis non bene pernicens
Heroas alloqui, ducemque
Militiæque, domique clarum?
Quâm te decoro pulvere sordidum
ALBERTE, partâ nobilem adorea
Conspeximus, cum miles hostem
Auspicijs pepulit secundis.
Quandò minaci, non vice simplici
Ventosa fastu versa acies retro
Cessit, triumphatusque prædo
Sensit in arma pauens ruentem.
Spumante qualis sævus inæstuat
Euripus undâ, aut imperiosior
Qualis Noto tunsus remugit
Adria, Sicaniusue pontus.*

*At non sagacis spernere Palladis
Festiva suetum munera, & artium
Fastidiosum Cardo Iberus,
Hesperiumque cubile misit.
Sese clientem Pallas amat tuum,
Gaudet Patrono te sapientia,
Ambitque te penes recessus
Intrepidus metuens procella.
Enolue, PRINCEPS INCLYTE, proditos
Sollerte venâ ter-geminos sales.
Ieiunij libro VIRINGVS
Pæonias opulentat artes.*

IACOBVS CALADELPHVS
Societatis IESV.

LECTORI.

EST tibi vel corpus, vel mens malè sana? VIRINGVM
Consule, namque isto curat vtrumque libro.
Ieiuna, mentis si vis depellere noxas;
Ieiuna, & toto corpore sanus eris.

Georgius UU. Viringus I. F. Societatis IESV.

LECTORI BENIVOLO.

QUOD olim succinctè, ac breuiter de ieiunio, vel abstinentiâ conscripseram, produxi in quinque sectiones; nè diutius Reuerendissimorum Ruræmundæ Lindani, & Meteluburgi à Stryen, manibus repugnarem. Fecerunt itaque mortui quod viui non poterant, perumperem verecundiæ fines, nè longiore interuallo laterent, quas Viri Doctissimi lucubrationes dignas luce iudicassent. Equidem sic statuebam neminem decere magis studiorum exhibere specimen in tam diuturnâ professione, & verò maximè hoc mixti generis argumento. Neque enim ita medicus fui vt sanctos Patres non legerim, quin imò sic diuisi tempora vt vnis vices dederim, alteris non negârim. Videbit qui ordinem penitiùs inspexerit.

Primo ostendo mutuam medici, & theologi affinitatem, quo clariùs libri *ἐπιτομή* innotescat.

Hinc educo qui egregiè ieiunârunt.

Tertio Ecclesiasticas sanctiones, ieiunij formam, præscriptos dies, vsuque tritas consuetudines præfero.

Ceteris duobus quæ Ecclesiasticè dixeram, medicè probo: quarto quidem abstinentiùs viuere, quinto salubri consilio ieiunare. Vale, fruire; certo persuasum habet duplici te beandum quæstu, quòd menti bene consules, & corpori non malè.

MEMORIÆ SACRVM

REVERENDO,
clarissimoque viro

D. IOHANNI VIRINGO
QVONDAM ALMÆ NOSTRÆ
VNIVERSITATIS

ARCHIATRO,

Ecclesiæ Cathedralis B. Mariæ
Atrēbatensis CANONICO,

PRO SVIS IN FACVLTATEM,
ET SCHOLAM MERITIS:

*Pro ornamento, & decore, publicâ 26. annorum.
professione in eam collatis*

SVAE GRATITVDINIS,
ET OBSERVANTIÆ PVBLICE
TESTANDA ERGÔ

Ad has clucubrationes

MEDICA ALMÆ VNIVERSITATIS
LOVANIENSIS FACVLTA:
hoc Mnemosynon

L. P.

RE

REVERENDO,
ET CLARISSIMO
VIRO DOMINO IO.
ANNI VVALTERIO VIRINGO
MEDICINÆ DOCTORI, ET CA-
THEDRALIS ECCLESIAE ATREBA-
tensis Canonico

GVILIELMVS ESTIVS S. T. D. ET
COLLEGIATÆ ECCLESIAE D. PETRI
Dnaci Præpositus.

ARGVIT impietas jeiunia sancta piorum,
Plurima corporibus quòd nocumenta ferant.
Diluis hoc VIRINGE tuis doctissime scriptis
Crimen, & à vero prorsus abesse doces.
Quin ea quæ damnat sectarius, esse saluti
Corporis, atque animi, testibus, arte probas.
Sic medicus Medici sequeris vestigia Christi,
Sollicitus medici munus obire sacri.
O verè aureolâ Doctor donande coronâ,
Quæ tibi perpetuo cingat honore caput.

** 2

CLA

CLARISSIMO
VIRO D. VIRINGO
SVOS LIBROS SACRANTI

SER.^{mo} CARDINALI ALBERTO

P. PETRI CARLERII PRESBYTERI

ex Societate IESV

Paræneticum Anagramma.

IOANNES VALTIERIVS VIRINGVS.

En vigor vnus salutaris jeiunj.



T sacra purpurei perstent jeiunia veris,
Abromiæ & referant palmea ferta manus;
Quàm bene purpureo sacra subdis opuscula Patri,
Pignora virtutis quina VIRINGE tuæ?
Prodit ab Vrbe salus, prodit vigor vnus ab Austro,
Totius vnde boni prodit origo DEVS.
Vna datur Patriæ ALBERTVS Medicina salutis,
Spes vbi mors ex spes, cœlitus vna datur:
At tu Pandoræ Panacæa medere venenis,
Respiransque tuam suspicit æger opem.
Tu calamo certum præbes cataplasma sub vno,
Esque salus animis, corporibusque vigor.
Cesariidum decus ille, Patrum decus ille Quiritum
Æterna illustris nomina Victor habet:
Tuque Chori celebris, Medicæ splendorque palestræ,
Immoritura tue symbola laudis habes.

Ille.


Ille suâ est Mauors galeâ , suo & ille galero
 Mercurius, Princeps vnus vtrumque refert :
 Sic ope tu Chiron, opere es Theophantor; ad vnguem
 Effigians vnâ, Doctôr, vtrumque manu.
 Mercurius linguâ, gladio Mars impetit hostes :
 Hos tua Suada premit , pennaque acuta necat.
 Ille togâ Belgas , belloque, tuosque labores
 Protegit : hos geminae protegis artis ope.
 Indicat ille suo Pacem , vel classica nutu:
 Tu vitæ signas , interitusque dies.
 Vt tibi , sic illi, (Quin & tibi turba Nepotum!)
 Displicet obba Bromi, sobria mensa placet.
 Ceu tua scripta docent, ita viuît vterque, quid inde?
 Maior vtrique salus , maior vtrique vigor.
 Inde SALVTARIS IEIUNI EN palma dubium,
 VNVS & Archiducis , Archiatricque VIGOR.
 Hinc sacra purpurei stabunt ieiunia veris,
 Abromia & referent palmea ferta manus.
 Quis bene Purpureo neget ergò sacrata Dynastæ
 Pignora sudoris sacra VIRINGE tui?
 Discite Bacchicole, Lurcones discite , Ventres
 Discite multinecem detitulare gulam.
 Ver, Mars, Mercurius, Chiron, Theophantor id vrgent,
 Veste, armis, suadâ, certa ope, quinque libris.

CLARISSIMO
DOMINO DOCTORI
VIRINGO PRESBYTERO,
ET CANONICO ATREBATENSI.

PROEONIAS artes, diuino munere, nostro
Concessas generi, nullus it inficias.
Hincque, DEI iussu, qui isthęc mysteria tractant
Dignum est præcipuo semper honore coli.
Cum diuinis affecit Gręcia quondam
Laudibus Hippocratem, mox vt abacta lues.
Artis præsidio medicę mala tetra fugantur,
Et redit in corpus qui fuit ante vigor,
Hinc quoque sæpe fugax hominum producitur ætas,
Aurem præscriptis si modò præbuerint.
Sunt hęc magna quidem; at corpus spectatĩa tantũ,
An non egra suum mens medicamen habet?
Ecce Machaoniã præcellens arte VIRINGVS
LOVANIJ columen nobile, & ATREBATI
Non sat habet diros extundere corpore morbos,
Ni læsis animis proferat antidotum.
Felix ingenium, & cunctis mirabile seclis
(Absit adulari) Docte VIRINGE tuum.
I nunc, & corpus cura, & medicamine mentem,
Corporis idem tu, mentis & es medicus.

Franciscus Moschus Niuzellæ I. C. Et Pastor Armenteria.

IN CLARISSIMI
VIRI DOMINI IOANNIS
VVALTERII VIRINGI LIBROS
MEDICO-ECCLESIASTICOS.

 Veis duplex fuerit labore in vno
Parta fama, fuisse credo raros:
Inter hos numerare te VIRINGE
Fas est, iusque; docebit hic libellus,
Corporis simul apta sanitati,
Et mentis simul apta qui saluti
Dat praecepta: salusque, sanitaque
Sit tibi meritò, duplexque fama.

Iustus Lipsius fecit.

VIRINGI liber est, satis est dixisse scienti
VIRINGVM. Si quis nescit, & hoc habeat:
Hic liber & pius est, & doctus, dicet vtrumque
Si quis doctrinam, vel pietatem habeat.

Idem fecit.

IN LIBRVM
DE IEIVNIO A R.^{do} VIRO, AC
DOMINO M. IOANNE VVALTERIO
VIRINGO Cathedralis Ecclesiæ Atrebatensis
Canonico, necnon Medicinæ Doctore Cla-
rissimo.

M. GVILIELMI GAZET ARIENSIS,
PAROECIÆ D. Mariæ MAGDALENÆ
apud Atrebares Pastoris.

Epigramma hexasticum.



INT *procul Hippocritæ, procul hinc malè sana
cateruâ.*

Qui genium fraudant, & Curios simulant:

Vt mens interea vitij turgescat obesa,

Fratrum & sanguineis ebria sit lachrymis.

Non ita VIRINGVS Doct̃or, cui laurea duplex

Et Mystas inter, Pæoniosque senes:

Cui potiora animi ieiunia: non ita curæ est

Nûm vacuus venter pressus orexe latret.

Si tamen hæc coëant, & in vnâ sede morentur,

O quàm hominem illustant, hospitiumque beant!

O faustum hospitium, ieiuno in corpore si mens

Pura sit, & nulli sordeat alluie.

Gazis omnia.

IN LIBRVM
CLARISSIMI
 D. DOCTORIS VIRINGI
 DE IEIVNIO MEDICO-
 ECCLESIASTICVM.

DOCTVM Thiologum, virum disertum,
 Peritum medicum, piumque mysten,
 Vno nomine vis feram? VIRINGVS.

Testatur pia mens, polita lingua,
 Manus gnara. Quid inuidus moratur?
 Quid mæstam trahit vsque & vsque frontem?
 Vir doctissimus vnus est VIRINGVS,
 Mystes optimus vnus est VIRINGVS,
 Peritissimus vnus est virorum,
 Politissimus vnus est Virorum.
 Testatur nouus isterem libellus,
 Doctus, pæonius, pius libellus.
 Rumpantur licet æmuli, fatendum est
 Doctum Thiologum, virum disertum,
 Peritum medicum, pium VIRINGVM.



Carolus Goossinus de Societate IESV.

Eis

Εἰς τὸ βιβλίον ἱερο-εκκλησιαστικὸν τοῦ κυρίου τοῦ Ἰωάννου
Ουαλτηρίου Βιρίγγου, λαμπροτάτου
καὶ ἐμπειροτάτου ἀρχιάτρου.

Τρίζυγα τῶν ἀγαθῶν, Ἀρεταί, καὶ Σῶμα Φρένεστέ,
Τυχχάνει τριμερεὶ νηστίδι σωζόμενα.
Πανάρετος, φρεφνόσωμος, εὐφρων ἔπλετο νηστὺς,
Χριστοῦτ' ἱατρῶνθ' ἦτε σφῶν τρόφιμος.
Τρισσὰ μὴ βίβλω δὲς ταῦτα Βίριγγος, ἀκούσει
Νηστείας τριμερῆς χειρὶ ἱατροσόφος. Α.Ω.Β.

IDEM LATINE.



TIGA bonorum, Animi mens, & cum
Corpore Honestas,
Ieiunij triplicis munere salua manent.
Corpori-firmum, Animi-sanum, & jeiunium Ho-
nestum est,
Quod Medici, & CHRISTVS; quod docuere
Sophi.
Audiet, hæc tria sans libro VIRINGVS in vno,
Ieiunij triplicis Christosophomedicus.


Andreas Hoinus Brugensis.

Φεδερίκου

Φεδερίκου Ιαμωτίου ἱατροῦ ἐπίγραμμα εἰς τὸ τοῦ Ἰωάννου
 Ουαλτηρίου Βιρίγγου ἔν' Ἀσκληπιάδαις ἐξοχω-
 τάτῃ βιβλίον περὶ ἡγείας.

Μυσθόλων Βιρίγγε φάος, κορυφήτ' ἡγῶν
 Ἡ μέγα σεῦ δέλτοις τέλθος ὀφειλόμενον.
 Καὶ σὺ γάρ οὐχ ἄλῃς εἶχες ἀκέτορα τεθμὸν ὀπάσας·
 Χρύσεια κ' θεῶν ἐκ σελίδων ἐρύεις.
 Ὅφρ' ὑγίῃ γήσης ὑγιεῖ ἐνὶ σάματι ψυχμ',
 Καὶ σέο χραισμήση μόχθος ὁδ' ἀμφοτέροις.
 Ὅς κ' ἡγῆεις ὅλος εἰ πνέει, οὐ γέμεν αὐτῷ
 Νήσιμον ἀν' θαίης οὔτι παρεστάμεναι.
 Οὐ γὰρ ἡγῆς ἔφυ λόγος, οὐ χάρις ἡδέα τέχνης
 Ἀβροχος, οὐ λιμῶ κῶλα πέλει ψαφάρᾳ.
 Λάμπει δ' ἐμ πλεῖα πάντα σοφαῖς ἐπαρηρότα Μούσαις,
 Καὶ χροὸς εὐσάρκου πουλὺ φαινότερα.
 Ἐνθ' ἀναλδήσει τοι κάλλιον ἀτέρως εὖχος,
 Καὶ διδύμων χαρίτων ἀφθιτος ἀγλαΐη.

Ι Δ Ε Μ Λ Α Τ Ι Ν Ε .



YSTARVM VIRINGE decus, columeñque
 Medentũm,
 Debetur scriptis gratia magna tuis
 Qui non contentus medicas expromere Leges,
 Elicis & sacris aurea dicta Libris,
 Vt sanam sano præstes in corpore mentem,
 Et tuus hic parti proffit vtrique labor.
 Qui mera cum spiret toto jeiunia Libro,
 Ieiunum dicas hic tamen esse nihil.
 Nam neque jeiuna est oratio, nec venus artis
 Arida, nec turpi squallida membra fame
 Omnia plena nitent doctis exculta Camænis,
 Et bene curatâ splendidiora cute.
 Hinc tibi crescet honos nitido fulgentior astro,
 Crescet & hinc geminâ laude perenne decus.

Federicus Iamotius Medicus.

NOBILIS VIRI
D. IOANNIS AM. LANDASII
LOVIGNII.

Σοι πολλὴ πέλεται τέχνη, πέλεται πολὺ γένος,
Καὶ πολυτεχνῆς εἶ, καὶ πολύτεχνος ἔμια.

D. IOANNES VVALTERIVS
LAVDETVR OS IEIVNANS.

Heiluo culpetur, damnetur Pamphagus, ast Os
IEIVNANS, celebris LAVDETVR ab ore VIRINGI

IOANNES VIRINGVS
AN VIR INGENIOSVS?

*Non dubitant, sed opus mirantia Numina, certo
AN ne VIR, affirmant, INGENIOSVS hic est?*

ADMODVM
R.^{do} DOMINO IO. VVALTERIO
VIRINGO DOMINO, A C
PRÆCEPTORI QVONDAM SVO,

PETRVS VVYNANTIVS MEDI-
CINÆ DOCTOR BRVXELLIS.

CORPORA qui tristi curat squalentia morbo,
Et reficit medicâ languida membra manu:
Laudem habet is meritò, maiori at dignus honore,
Non sanis animis, qui bene præbet opem.
Sed duplici palmâ dignus, duplicique coronâ
Qui corpus curat, mentem, animumque simul.
Hoc VIRINGVS habet; mens sana vt corpore sano
Vivat; age, vno actu totus homo incolumis.

AD

AD EVNDEM.



T *ſanus viuas, ſoſpeſque, malagmate nullo,*
Nec chyltere opus eſt, helleboroue tibi.
Non ſcarus, aut rhombus, non te peregrina Lagois,
Inuerit, aut Valachris Sturio natus aquis
Non condita Arabum varijs farcimina ſuccis,
Non Maderanis conſita vina iugis
Languentem ſtomachum, tuſſimue, phtiſimue leuabunt,
Sen cūm creſcit hydrops, ſplenue, lienue tūpet.
Nā ſgula, quāque malum non eſt præſentius vllum.
Plures occidit crapula quā gladius.
Uſque ad eò varij vexant mortalia caſus
Secula, nec eſt promptam qui ferat vllus opem.
Adde, quod hæc fæda ingluuiæ, ventriſque voracis
Ructus perpetuus diſplicet uſque Deo.
Atque hominem cælo genitum obbruteſcere cogit,
Inque canes, & apros vertier, inque ſues.
Quid facimus? quin erigimur? quin ſurgimus antè
Quā malè ſternaci præcipitemur equo?
Edomet hoc monſtrum ratio, frænoque ſonante
Terna Meduſæi vinciat ora canis.
Quod facis, & triplici dignam certamine palmam
Iure tuam triplici doctæ VIRINGE refers.
Quippe gulam iugulas, ieiunia ſobria laudas
Monſtrorum domitor, denique Alexicacos.

Fecit Ioan. Carpentarius 7. Calend April.

3.

A. D.

ADMODVM

REVERENDO, DO-
MINO IOANNI VVAL-
TERIO VIRINGO MEDICINÆ

*Doctori Excellentissimo, summe ædis apud
Atrebatas Canonico, Parenti Optimo,
pientissimoque*

IOANNES VVALTERIVS VIRINGVS L.
de Societate I E S V.

QVÆ noua cælestes inter discordia diuas?
Murmure quis tanto detonat axe fragor
Scilicet est Grudij libro vis tanta VIRINGI,
Tantus honos, tantum docta per ora decus.
Quæque suum sibi poscit opus, nec cedere prom-
ptum est,
Sacra suum Pietas, Suada ait esse suum
Quid Medicina? graui premit æmula pectora luctu,
Quodque scit esse suum non putat esse suum.
Miratur sacrae voluens arcana Minervæ
Tale nihil medicis sueta videre scholis.
Magna odijs adeò gliscit contentio magnis;
Impia sim pietas si pia vincat, ait.
Parcite, sed nam cur tanto certamine Diuæ
In varias partes dilaceratur opus?
Totus erit, liber vnus erit, tribus integer vnus
Facundus, Medicus, relligiosus erit.

ADMODVM
R.^{do} D. I. VV. VIRINGO
MEDICINÆ DOCTORI
EXCELLENTISSIMO, ET LOVANII
QVONDAM PROFESSORI PRIMARIO,
Insignis Atrebatensis E. Canonico
Cognato suo.

GHIRAGRA cum podagrâ mortalibus hospita,
quis vos

Corporis, ac animi pellat ab arce liber?

Pellat ab arce? parùm est, quis vos succidere? magnum hoc;

Dignior at Magni nomine qui potis est.

O IEIVNARI qui te exprimit, ALTIUS VRGENS

Nùm tuus est VNVS Magne VIRINGE liber?

Vnus hic indubiè potis est succidere; Magni

Namque Numæ, magnum est, atque Philonis opus.

At quanti, fibras quo morbi hic amputat omnes,

Detq; vigere homini VIR NVMA, virq; Philon?

Esurie, nimis hoc? Morbis dant libera tantùm

Tergora, non hoc vis? hoc nimis exitio.

IACOBVS VVALTERIVS VIRINGVS
Medicus Teneramundanus.

ANAGRAMMA LECTORI.

IOANNES VVALTERIVS.

OS IEIVNANS LEVATVR.

CEDAT *Apollo suis, cedat pater inclytus herbis
Phillyrides, moly & cedat Atlantiades,*

Quis panace oppresso posthac medicabitur ægro?

Quis medicis Arabum messibus emtor erit?

Si tua curarum grauibus succumbat acernis,

Crimine si vario mens onerata gemat?

Si tibi aqualiculus multo turgescat Iaccho?

Si grauet os, os si crapula multa grauet?

Disce salutiferam grauibus sine sumtibus artem,

Ne tibi, quid pro quo, pharmacopola legat.

Hic moly, hic panaces, sunt hoc acrepala libro,

His medicâ sumtis membra leuantur ope.

OS bene IEIVNANS nocuâ gravitate LEVATVR,

Hoc liber, hoc Auclor, hoc anagramma sonat.

OS bene IEIVNANS ad culmina iure LEVATVR,

Instar & aligeri se super astra leuat.

M. Claud. Carlerius. Can.^{cus} Soneg.


DOCTORIS
IOANNIS VVALTERII
VIRINGI

PRESBITERI, ET CANONICI
Aurebatensis

DE
IEIUNIO, ET ABSTINENTIA
Liber primus.

*De statutis, decretisque Ecclesie Sapientes,
& candidi iudicent.*

CAPVT PRIMVM.

 I CHRISTIANI hominis dignita-
tem omnes æquè agnoscerent, tam
infelicitè, temerè, ac insipienter de
ijs, quæ ad eam pertinet, plerique mi-
nimè iudicarent, nedum contemnerent, aut im-
probarent; quemadmodum cernimus passim
cōtingere in legibus abstinentiæ Ecclesiasticæ ad
hominis integritatem, & conseruationem salu-
berrimè institutis. Quorum insolentiæ, morem
eorum præfero, qui contentione veritatem po-
tiores habent, & cum solidâ pietate rerum mo-
menta sincero, nullisque prauis affectibus impli-
cato iudicio estimant. Nam talibus, licet paucio-
ribus,


*In offi-
cjs.*

ribus, præstantioribus tamen placere satius arbitror, quàm ex imperitiæ multitudinis errore pendere, à quo cum M. Tullio, magni semper viri plurimum abhorrerunt. Quid enim eos non iure imperitos appellem, qui brutorum animantium ritu, velut proni, terramque assidue spectare consueti, se rotos ad epulas, illecebras, aliaque id genus corporis commoda componunt? quorum studia probari non possunt, nisi eorum explodantur placita, qui omni ævo habentur, nominanturque Sapientes. Sed neque deteriore loco nostram relinqui conditionem decet, ut palmam in tam præclaro, & perutili religionis calculo cedat Barbaris, Brachmanibus, Turcis, Búgijs, cæteraque infidelium turbæ, quæ simulata pietate, sic populi mentem fascinat, ut sibi sanctitatis opinionem conciliet. Iam in cõstitutionibus auiæ Ecclesiæ sapientius multo alimenta corpori subtrahuntur, unde hominis excellentiæ accedit & fructus, & ornamentum, minimè verò iugum durum ac insalubre iniicitur, neque, quod quidam audent dicere, medicæ Scholæ decretis contrahenitur. Quod deinceps explicare constitui, nil eos veritus, quos perniciæ, ac malevolentiae virus occupat, nec aliud delectat, quàm damnare, quod non intelligunt, & reiicere quod oderunt, modò in illos incidat quos studium veritatis exhibet dociles, & amor pietatis

tis reddit obseruantes. Hinc enim futurū non dubito, quin his maior crescet alacritas ad sacratio obreperandum Senatui; illinc verò augebitur curia detegendæ, euitandæque fraudulentæ falsitatis.

Quid prophani Sapientie Cultores de Vtriusque hominis parte censuerint?

CAPVT II.



VM olim rerum naturæ contemplatio adhuc confusa haberetur, pro suo quisque arbitrio Philosophiam sibi fabricasse videbatur, perexiguo aut nullo sanè Reipublicæ commodo. Sed postquam rerum crescente vsu, ingeniorumque acumine medicina à studio sapientie fuit separata, (quam laudem Celsus tribuit Hippocrati) ceperunt deinceps scientie distinctè, & accuratè ex-

*In proem
sup. ne-
dis.*

poliri, vt tandem proprijs circumscripte limitibus ad suum quæque splendorem, perfectionemque peruenerit. Et quanquam non ita sciuncte sint, vt omni prorsus coniunctioni renuntiauerint; sic tamen pertractantur vt singulæ singulos scopos habeant, quos maximè persequatur, dumque sibi hominem proponunt, aliud atque aliud circa illum intendunt, & spectant: quò fit vt modo, si neque discrepent, nec sint vtilitate pares. Quod vt perspicuum fiat, operæ pretium arbitror paucis

producere quid tum Philosophi tam prophani,
 quàm Sacrorum interpretes; tum Medici, de ho-
 minis constitutione senserint, vt diuersitatis, &
 mutui concursus ratio facilius intelligatur. Pytha-
 gorici, & Platonici statuunt hominem esse diui-
 nam mentem terrenis vinculis alligatam: clarius
 Peripatetici, & Stoici, cōstare ex anima, & corpo-
 re, quorum (inquit Aristoteles) alterum imperat
 secundum naturam, alterum paret. Cicero eius
 primordia ducit è cēlo, & terra. Moyſes in hunc
 modum loquitur: Formauit Deus hominem de
 limo terræ, & inspirauit in faciem eius spiracu-
 lum vitæ, & factus est homo in animam viuen-
 tem. Hanc ἐντελεχείαν, siue actum corporis vi-
 uentis interpretantur, à qua quidquid in corpore
 boni est proficiscitur. Hippocrates autem cum
 cætera animātia, tum hominem ex igne, & aqua
 conflans, κατὰ χροστικῶς, pronuntiat, scilicet per a-
 quam designans terrenam illam, atque ex semi-
 ne concretam aspectabilem corporis massam,
 quæ ob pinguem, & olei æmulum humorem si-
 bi insitum pellicit ad se calorem illum cælestem,
 cui igneus vigor est, & cælestis origo, quem ignis
 nomine Hippocrates potissimum intelligit. Hic
 omnia per omnia mouet, polit, perficit, regit, il-
 lustrat, atque tuetur: cumque sit inuisibilis, & ani-
 mæ instrumentum perenne, pro anima ipsa sæ-
 pius

1. Pol. c. 3.
 In Somno
 Scip:

Gen. 2.

Ἰὸ ὕδωρ

Aeneid. 6.

Ἰὸ πῦρ

pius vsurpatur, quòd ignis vocabulum ob operationem suam, & effecta, magis cōgruat Medico tanquam artificii sensitivo. Anima igitur gratissimo illi calori iuncta, corpori sociatur, & immergitur spiritus interuentu, & ministerio: cum verò calor ex corpore trahit, sedem sibi, vehiculum, pariter & vinculum aptat, at que conficit. Haud dissimili modo, quo araneus ex aëre figit, fingitque telā, quā sustentetur, & hæreat, præterquàm quòd spiritus sit ἀόριστος, quamquam non ἀσάματος.

*Spiritus.**Simile.*

Et eo quidem pacto anima corpori copulatur, constringitur, ac detinetur, tanquam in suo domicilio, imò, si originem spectes, concluditur custodiā, carcere, ergastulo, latibulo, vase, vasculo, arcā, templo, habitaculo: non tamen sine amore; dum iussa exequitur, cedit amplexibus, nexumque admittit, & fædus, vt iure coniugium dixeris, ex quo velut matrimonio, fiat commixtio conditionis, status & fortunarum. Proinde vt corpus, & anima ex hoc commercio vnum quiddam inter se fiunt, sic quidquid habent, vtrique commune fieri oportet: & licet corporis conditio illustrior fiat, animā tamen quamvis natura excellat, quatenus corpori alligata est, eius conditionem imitatur, quòd satis dilucidè est ab Aristotele explicatum. Quippe in omnibus vitur corporis ministerio, ex cuius substantia, &

*Lib. de
anima.*

*Lib. de
risu &
alibi.*

Sap. 9.

temperamento pendet, quod alius alio docilior sit. Sed nec in intellectu quidquam esse Philosophi docent, quod non prius in sensu fuerit, quo recte Ioubertus colligit facultatem intelligētem subsidio corporeo indigere. Cūmq; corpus quod corrumpitur aggrauet animam, quādiu illius custodijs mancipatur, tam parum sui iuris est, vt vix earum functionum, quibus libera, & corpore soluta maximè præstat, vmbra exhibeat, sed mox vt est infusa per artus, ad eum hebetatur modum, vt nō iniuriā (liceat mihi ad scopum propositum nonnihil fabulari) lethæo flumine dixeris ebriam, & omniū obliuione captam, quā summo studio tandem, aliquò vsque licet euincat, vsq; adeo exigua, & brevis est gloria, quę decrecente vitę periodo euanescit, dum ad obliuionem recurrētem

Lucretius accedit desipientia. De quo *Lucretius* libro 3.

- „ Præterea gigni pariter cum corpore, & vnā
- „ Crescere sentimus, pariterque senescere mentem.
- „ Nam velut infirmo pueri, teneroque vagantur
- „ Corpore: sic animi sequitur sententia tenuis.
- „ Inde vbi robustis adoleuit viribus ætas,
- „ Consilium quoque maius, & auctior est animi vis.
- „ Post vbi iam validis quassatum est viribus æni
- „ Corpus, & obtusis ceciderunt viribus artus;
- „ Claudicat ingenium, delirat linguaque mēsq; ,
- „ Omnia deficiunt, atque vno tempore desunt.

Quare

Quare meritò animæ relinqui anſam conque-
 rendi cenſueris, tam cōmodum nunquam obtin-
 gere domicilium, vt non malè excipiantur: imò ex
 aſſiduitate laborū, animorum hebetatio quædam
 & languor naſcitur, vt annotauit Seneca, cum ta-
 mea corpus, ſine illa cadauer inutile corruptioni
 obnoxium, & abominabile relinquatur. Nihilo-
 minus quædam præſtari ab anima, quæ proſus ſi-
 ne corpore non valeret, manifeſtum eſt, velut a-
 limenta cōcoquere, ac diſtribuere, inutilia ſeque-
 ſtrare, & excernere, augmentum producere, vita-
 lem auram alternata pulſificatione trahere, pro-
 creare, ſentire, mouere. Quæ quidem omnia, ta-
 metſi quædam nec ſemper, nec vltra præſcriptum
 tempus, corporis ſaltem commoditati accepta
 viciffim reddi & iuitas poſtulat. Proinde cum cer-
 pus ſit animæ domicilium, vtique inter ſe co-
 hæret, alterumque patefacit alterum, quod etiam
 Paracellſum ratio coëgit confiteri. Eaque conſide-
 ratione, magnum philoſophiæ lumē Galenus, ne
 diſciplinarum confunderet meras, medicæque fa-
 cultatis limitibus iuſſu præceptoris ſe contineret,
 animæ ſubſtantiam à temperamento corporis
 noluit ſeparare, non quòd ſublimius de anima nil
 ſentiret (vt nonnulli ei temere impingunt) ſed
 quia aliter dixiſſe, non ſatis fuiſſet ſuo inſtituto
 congruum, conſultò reticuit.

*Lib. I. de
tranquil-
litate.*

*In para-
miro. c. 6.*

*Lib. de
fac. an.
ſub initio
de natura
humana.*

*Qui Corpori studium impendunt, in animi
quoque curam incidunt.*

CAPVT III.



VI autem propius animi, corporis-
que affinitatem, latentemque ener-
giam volet cognoscere, tempera-
mentorum discrimen, & varietatem
diligenter expendat, ac maximopere indoles, in-
genia, mores & studia, comperiet discrepare. Et
quidem cholericos (vt vſitato more loquamur)
præcipites; ſanguineos, commodos; ſegnes pitui-
roſos; melancholicos, triſtes; & per ætates, alios
eſſe pueros, ab adoleſcentibus, & ſenio conſectis
etiam in propria conſideratione. Quin etiam cœ-
lum, ſolum, focus, dies, ac hora, ventus & aura,
otium & motus, inſignem vtrique mutationem
inuehunt. Similiter & ſtudij curæque genus, vi-
gilię quoque & ſomnus: denique vt variæ vale-
tudinis differentię, ita bene, vel male ſe habent,
vel à morbis certatim affliguntur, adeoque vir-
tutibus, & vitijs non ſemper æqualis patet op-
portunitas. non enim (vt dici ſolet) e quouis
ligno fit Mercurius. Sed ne prolixitas hic tedium
afferat, lubens ad Hippocratis librum de Aëre,
aquâ, & locis, l. bro de dieta & morbis popula-
ribus

ribus recurēdum iudico. Galenus dilucidè peculiari commentario, quod animi mores corporis temperaturā sequantur, demonstrauit, scriptūque de animi affectibus tūm dignoscendis, tūm curandi, insignes commentarios. Porro Hippocrates mirus naturæ contemplator diætæ humanæ constitutioni congruenter accommodandę, præscribendęque intētus, laboris, & victus opportunitates tanta industria, ac cura pertractauit, vt omnem suam operam pōnē in animæ solius commoditatem direxisse videri possit: cumque temperamento sapientiæ causam tribuit, diæteticis beneficio animam & meliorem, & deteriorem effici posse docet, ea scilicet cura adhibita, qua igni fomes sufficiat, nec eum suffocet, aut obscurer, quod immoderantia promptè efficere solet, à qua labefactato ipsius vigore ab animæ motu dependente corpus celerrimè senescit, & ægrotat, minus verò si habitaculum anima commodum fortiatur ex cuius *σύνεσις*, & contempera-

*Lib. de
diæt.*

*Lib. 2. de
diæt.*

*Hiero.
phyl.*

tionē sit vt mens vel sapiat, vel desipiat, hoc est, functiones tales proferat, ex quibus intelligatur vel probè, vel malè collocata. Hierophylus tradidit eam maximè gaudere, & perspicaciorem fieri corporis siccitate, quæ in humorum tūm puritate, & analogia, tūm complexionis commoderatione est constituta. Eo opere quod Gal. de sani-

tate tuendâ posteritati transmissit, libello item de parvâ spherâ commendatione, ac alibi sic salubritatis leges composuit, vt spiritui non mirâs quàm corpori prouidisse appareat, præsertim in infantibus, quos cantilenis, tintinabulis, crepitaculis, & cymbalis, aut alijs musicis harmonijs monet excitandos. Similiter Aëtius, Oribasius, Paulus, & inter Latinos Cor. Celsus, ceterique Medicinæ principes in victu per singulas ætates definiendo, dum corporis nomen exprimunt, simul animæ, animi, mentisq; pœnè faciunt mentionem, nempe vtriusque fædere, & societatis lege ita exigente.

*Natura quadam propensione & audimus libenter
& loquimur de ijs que ad alteram hominis
partem spectant.*

CAPVT IIII.



QUI olim sacra proficiebantur, velut Orpheus, & Trismegistus ille Mercurius, tametsi diuina suo tractarent more, ne quidem vel ipsi ab ijs abstinuere, quæ ad vitæ curam requiruntur. Quin ex intimis naturæ penetralibus, cœu fatale quoddam, ingenitumque desiderium prorumpere cernimus, quo illa de vtriusque portionis totius

minis conseruatione sollicita est : non solum enim libenter , sed etiam curiosè occasionem quilibet captat , de ijs & audire , & loqui , quæ tum animo seruiunt tum cuticulam promouent , nunc per cibos & potus , nunc per aliud quodlibet medicæ materiæ genus. Cui consonum plane est , quòd vulgo ex pari instinctu , tam eos qui animæ , quàm corporis curam gerunt , promiscuè medicos appellant : & vt in summa dicatur , Philosophi quique , siue de natura , siue de moribus disserant , Plato , Aristoteles , Plutarchus , Seneca , omnes vtrumque hoc argumentum miscuere . Hinc Galenus non alium probat Medicum , nisi qui philosophiâ (quæ ipsi diuinarum rerum peritia habebatur) fuerit imbutus . Nec memoracione dignissimum Senem Hippocratem puduit medicum ἰατρίων nominare , eaque quæ ad Sapientiam spectant in medicinâ haberi dicere , esseque veri medici animo implexa , in quo veritatis amorem , ac studium , iustitiæque cultum omnino requirit .



*Promiscua corporis, animique sollicitudo sacris
litteris detegitur.*

CAPVT V.

SED ne quis existimet vana illa esse,
& pro ingenij cuiusq; facultate con-
ficta, diuinarū rerum internuntium
Moysen (à quo fortassis Plato sapien-
tiæ micæ aliquot est mutuatus) operæpretium ar-
bitror consulere: quem si quis persuasum habeat
mysteria sacro hausta eloquio, diætetica norma,
quæ in cibis licita iuxtà ac vetita contineret, haud
alio locupletasse scopo, quàm vt pro nudis cere-
monijs enarraret, superstitiose satis opinari videretur:
quod è suilla (vt vna plurium exemplo sit)
haud difficulter intelligitur. cum enim lepræ ob-
noxia sit, quantumuis succo, & sapore placeat, tali
prohibitione & continere voluit in officio, & à
tanta calamitate (quam illa tota sua specie, &
substantia inducere procliuis est) populum præ-
seruare. Pari ratione accipiendum, quòd manna,
& coturnices dederit sine labore, curaquæ homi-
num, vt inquit Philo, non è terra, more consueto
editum, sed cælitus exhibitum cibum, prodigiosa
beneficentia: verùm tamen, afflictionemne o-
portet dicere, an potius vbertatem, & copiam,
quæ

quæ inuiter ad securè viuendum sub diuinis legibus? Tali vero apparatu opportunissime genti illi dilectæ, delectæque prouidit, vt inde tali cura redderet morigram, & studio salubritatis sibi deuinctam. Nec aliam diuina illa sapientia cum in terris doctoris munere fungeretur, formam amplexa est, qua homines à vitijs abstraheret, & ad virtutes stimularet. non enim qui Saluator ad salutem immortalem humani generis assumpserat carnem humanam, sibi satis esse ratus est ad persuadendum parœmijs, tropis, similitudinibus, alijsque quibuscumque argumentorum schematibus à cibis, & potibus, cœnis, conuiuijsque, & alijs naturæ, corporisque commoditatibus desumptis, contendere, nisi etiam adderet corporalia beneficia sanando languores, curando morbos, in vitam defunctos reuocando. Ijs quippe vtilitatibus quas vulgus semper maximo in pretio habet, efficacissime sibi populi conciliauit amicitiam, auctoritatem, fidem. Nam & Salomone teste, ex ijs quæ *Sap. 13.* specie delectant, dominator eorum speciosior ag- *Item* noscitur: quam ob rem disputauit super lignis à *3. Reg. 4.* cedro, quæ est in Libano, vsque ad hyssopum, quæ egreditur de pariete, & disseruit de iumentis, & volucris, & reptilibus, & piscibus. Quin ex visibilibus, ter maximo Paulo autore, inuisibilis intelligitur Deus. Quorum ille inter cetera ebrie- *Prou. 20.* tatem

*Ad Ti-
moth.*

tatem tradit aduersam sapientiæ, hic verò vinum
 consulit tanquàm congruum sanitati. Quod
 quanquam peculiariter ad animi scopum non
 pertineat, sicut nec ad Medicum propriè spectat,
 mores virtutesque tractare, tamen sic paruiâ,
 comparatum est, vt animi dissolutione, atque
 proteruiâ, nec corpora valere, nec per corporum
 lasciuia virtutum disciplina possit subsistere.
 Eaque propter virtutum magister medica præ-
 cepta colligit, & medicus sapientiæ leges debet &
 callere, & applicare. Quod maxime perspicitur
 in directione puerilis ætatis, quæ vt ad om-
 nem motum est flexilis, maiore curâ indiget,
 quæ plurimùm consistit in delectu pij, probi-
 que pedagogi, & sobriæ nutricis. Quanquam
 etiam ei incumbat, passim dum pro officio cum
 omnibus assidue conuersandum est, vitia quæ-
 que reprehendere, ex quibus ferè contingit sa-
 nitatis robur dissolui, & morbos suscitari. Vn-
 de iure astringitur, quæ ad animæ expiationem
 circa ægrotos requiruntur, sollicitè, & tempesti-
 uè procurare. Quod Platonem monuisse legi-
 mus scribentem in hunc modum. Quemad-
 modum oculos sine capite curare non decet, ne-
 que sine reliquo corpore caput, ita neque sine a-
 nimâ corpus. Quibus in Ecclesiastico hæc ele-
 ganter consentiunt: Fili in tua infirmitate ne de-

*In Char-
mide.*

spicias

spicias te ipsum, sed ora Dominum, & ipse cura-
 bit te: Avertere à delicto, & dirige manus, & ab
 omni delicto munda cor tuum. Da suavitatem,
 & memoriam similagini, & impingua oblationem,
 & da locum medico. Et enim illum Dominus
 creavit, & non discedat à te, quia opera eius
 sunt necessaria. Est enim tempus quando in manus
 illorum incurras, ipsi vero dominum deprecabuntur,
 ut dirigat requiem eorum, & sanitatem propter
 conuersationem illorum. Hæc ibi de Medico. Cum
 verò energumenum exorcismo, & liberatione instituenda
 est actio, constat multum conducere egregiam corporis
 purgationem. Omitto alia quæ adhiberi solent,
 saltem sub specie corporalis remedij, cuiusmodi
 est fumus incenso iecore, cordisque particula piscis à
 Raphaelè ostensi, excitatus: & radix quæ dicitur à
 Salomone demonstrata, cuius virtute, Iosephi testimonio,
 per odorantium nares dæmonium extrahebatur. Verum
 propriæ virtute talia contigerint, an latente mysterio,
 R. P. Petro Thyraeo, alijsque eiusdem disciplinæ
 doctissimis viris, qui corporalem potestatem in Spiritu
 denegant quidquam posse, discutiendum relinquo.
 Ceterum ex his, & multis alijs argumentis, mutuâ membrorum,
 ac mentis concatenatione perspecta,

Tob. 6.

Iosephus.

 Parte 3.
 de dæmoniis
 cap. 48.

Dont. à
Soto lib.
1. de nat.
& grat.
cap. 3.

Pæda. l. 2.
cap. 1.

Theologi non erubescunt pronuntiare, naturalis Philosophiæ (cuius non infima pars est quæ de sanitate differt) considerationem sacris literis, & rebus fidei intelligendis, haud paruo esse ad-
 miniculo, præsertim si Clementis Alexandrini accedat consilium de animæ expurgando oculo (quod hominis proprium est) castæque, & sancta carne tuenda: unde cœtus fidelium, dum pro communi salute ad Deum fundit preces, à primis institutoribus edoctus, quotidianum panem, etiam corporalem, ex Christi formula semper postulare consuevit, ita sanè, ut nullo vnquam tempore desinat repetere, & quod tantopere necessarium est commendare, ad hoc suauissima varietate conceptis, editisque verbis tantâ viro-
 rum, doctrina, virtute, & auctoritate præcellentium industria ut & pellatur fastidium, & exci-
 tetur deuotio. Hinc ex magno illo Gregorio canitur.

Gregor.

Ne fœda sit vel lubrica
Compago nostri corporis.

Ambros.

Ex Ambrosio.
Sint pura cordis intima,
Absistat & vecordia:
Carnis terat superbiam
Potus, cibi que parcitas.

Idem.

Item ex eodem.

*Ne corpus adsit sordidum
Nec torpor instet cordium,
Nec criminis contagio
Torpeſcat ardor ſpiritus.*

Etiam in vlu eſt hæc formula:

*Sic corpus extrà conteri,
Dona, per abſtinentiam,
Ieiunet vt mens ſobria
A labe prorsus criminum.*

Sed hoc ex hymnis illius frequentius.

*Hostemque noſtrum comprime,
Ne polluantur corpora.*

Et verò quoties ſalutem mentis, & corporis ſolitus agitare? nunc, vt mente, & corpore pariter expediti, quæ Dei ſunt, liberis mentibus exequamur; nunc, vt ſic tranſeamus per bona temporalia, vt non amittamus æterna: vel, à cunctis aduerſitatibus liberemur in corpore, & à prauis cogitationibus mundemur in mente. Per ſingulos dies dicitur, Gubernare dignare Domine Deus, Rex cæli & terræ, hodie corda, & corpora noſtra, ſenſus, & actus noſtros, &c. Quandoque etiam hoc pacto.

*Mundo corde, & corpore
Paradyſo redde tuo.*

Et, quod noſtrum maxime confirmat inſtitutum, etiam talis precatiuncula pronuntiatur in

officio: Deus qui miro ordine Angelorum ministeria, hominumque dispensas, concede propitius, ut quibus tibi ministrantibus in cælo semper assistitur, ab his in terrâ vita nostra muniat. Sed quoniam ex ijs quæ hæcenus dicta sunt, extra omnem esse controuersiam satis intelligitur, animam à corpore, & vicissim corpus ab animâ ab hac internâ coniunctione inuitabili nexu, communionêue seorsum omnino sumi non posse, iustissimam mihi relinqui occasionem arbitratus sum, expendendi nûm ea quæ ab Ecclesiâ ex diuini magistratus sanctione præscripta, præceptaque habentur de abstinentiâ, & maximè Christianorum ieiunio, doctrinæ medicæ ad Hippocratis, & Galeni, eiusdemque classis professorum sententiam congrua, ac consona comparatur. Quod ut crederem, coëgit Christiana illa Respublica, cuius constitutiones, gubernatio, & œconomia antiquissimam habent originem: regiturque ipsa, & ducitur præceptis, legibus, sanctionibusque perpetuis, conformibus rationi, ac æquitati sine vllâ vacillatione consentientibus. Cumque hoc solum veram, puram putâmque sapientiæ indicet, testeturque scaturiginem, alibi quàm hinc tentare, quod quærendum, expiscandumque proposui, scilicet ex tortuosis, procellesisque Euripis, non solum temerarium, sed:

sed planè ridiculum debere iudicari. Nihil enim solidi ab ijs expectare licet, qui non ita pridem sibi omnia sine titulo vendicant, aut olim arroganter aggressi in neruum proflus eruperunt, tanquam firmamento quo sustinerentur destituti. Ergò ut somnia prætereo illos, imò ceu fumum potius quendam ex viginosâ, putrescente-que materiâ, hinc inde leuem, vagantem, caliginosamque flammam profundentem, in quâ splendoris lucidi nihil appareat, sed tandem suffocatis lambentibus scintillis, prorsus euanescit, nihil deinceps relinquens præter factorem, & abominationem. Verùm de his prolixius, ut clarior instituti nostri ratio probaretur, atque pateret, quo vel à paucioribus agnoscitur, vel à pluribus fortassis irridetur. Proinde finem dicendi prædictis imponimus, ad ea quæ initio pollicebamur orationem translaturi.

IEIUNIO, ET ABSTINENTIA

Liber II.

*Ieiunandi leges à Catholicâ Ecclesiâ desumendas anti-
quitas, consensio, autoritas, amplitudo, splendor,
dignitas demonstrant.*

CAPVT PRIMVM.



QVEMADMODVM natura pro cli-
matis, loci, conditionisq̃ue diuer-
sitate hominum cœtus disiunxit, ita
opinionum varietas animos homi-
num in infinitas cāsque dissentientes sectas cœu
turmas diremit, & separauit. Quô fit vt tot, tanta-
q̃ue in orbe sententiarum discrimina hab. antur,
multiq̃ue qui parum prospiciunt errore vagen-
tur, nec quod sequantur faciliè inueniant. Quod
tamen non admodum foret difficile, si quisque
sincerè veritatem quæreret. Cùm enim vnica, &
immutabilis ea sit, impossibile est ipsam apud
omnes in tantâ dissonantiâ iudiciorum inueniri:
sed nec ad plures pertinere verisimile est, quod
omnino partitionem recuset. Quare in eam ho-
minum societatem oculos conijcere decet, quæ
quam longissime, latissimèque diffusa maximè
emineat, & clarissimè conspiciatur, codicillorum
præ-

præterea antiquitate sibi auctoritatem concilia-
 uerit, & splendorem, consensione denique Sa-
 pientia laudem sit consecuta. Eam autem esse
 dignam Rempublicam quæ æ optima iudicetur, eo
 magis innotescet, si gubernatio eo ordine insti-
 tuta sit, ut circa summum principatum, aliosque
 magistratus nec pietas desit, nec reuerentia, sint-
 que qui præsunt boni, & sapientes, qui semper
 considerant & utilitatem eorum quos guber-
 nant, & in quem finem conspirent, amicitiaque
 sese mutuo complectantur. Atque talem quidem
 se sola exhibet quæ Catholica Ecclesia ab auis, &
 atavis, in toto semper titulo est nuncupata, mul-
 tis oraculis olim præuisa, umbris, figuris, exem-
 pli que prænuntiata, potissimum per Israëliti-
 cum populum expressa. hunc in regnum sacer-
 dotale olim diuini nominis maiestatem assem-
 pisse sacra testantur literæ, gentemque sanctam
 appellasse. Dignus Petrus primus ille sacrae mo- 1. Pet. 2.
 narchiæ ductor, haud dubitauit id Christianis po-
 riore iure attribuere, vos (inquiens) genus ele-
 ctum, regale sacerdotium, gens sancta, populus
 acquisitionis, populus Dei; nempe illos sub suo
 genitrici minime comprehendens, quibus Sacerdo-
 tij nomen prorsus esset inuisum. Cum itaque in
 tam elegantem, suauiter, sapienterque constitu-
 tam Rempublicam perfectamque Christianorum

ciuitatem inciderimus, leges, statutaque, quibus illa tanquam manibus circumuallatur, & protegitur, non suspicere, & quasi pro nœnijs habere non solum absurdum, sed stolidum, & impium censeatur. Quapropter ea quę circa abstinentiam ita præscripta sunt, sine vlllo metu tot tantisq; rationibus instigati plana, perspicuaque reddere contendemus.

Æquiuoca ieiunij vox explicatur.

CAPVT II.



SED eximenda primùm est abstinentiæ, & ieiunij vocum homologia, quâ nixi malitiosi quidam incautos, ac rudes nonnullos in errorem pertraxerunt. nam vt abstinere, sic & ieiunare varijs modis intelligitur. quicumque enim a re quapiam, siue illa animi, siue corporis tùm commoda, tùm detrimenta cōcernat, sibi temperant, continentur, dicuntur abstinere. Sic inter ceteros Lactantius, manus ab homicidio, & prostitutis abstinere vetus esse præceptum perhibet: alijs, ludo, epulis, vino, carnibus, à potatione, ab actibus prauis, demum licitis, & interdictis, salubribus iuxtà ac noxij abstinere dicimur. Ieiunium

*Cap. 6.
dist. Inſt.*

autem quamuis & ipsum latè subinde extendatur, fere tamen arctioribus limitibus constringitur. Nam magnum quidem, & generale ab insigni illo Christianæ Scholæ lumine D. Augustino describitur, abstinere ab iniquitatibus, & illicitis voluptatibus huius sæculi & in hoc seculo, quasi quadragesimam abstinentiæ celebramus, cùm bene vivimus, & ab illicitis (inquit) voluptatibus abstinemus. Alexandrinus etiam, Ieiunia significare (ait) omnem generaliter abstinentiam ab omnibus malis, tam quæ actu fiunt, quàm quæ verbis, & ipsâ cogitatione. Idem Origenes aperte confirmat. Ieiunia à malis actis, abstinere à malis sermonibus, continere à cogitationibus pessimis. Ad eundem modum venerabilis Beda scriptum reliquit: Ieiunium generale est, non solum ab escis, sed à cunctis illecebris abstinere carnalibus, imò ab omnibus vitiorum passionibus. Calumniam etiam ipse Cicero, terram Virgil. Cupidinè Lucret. D. Ambrosius mentem, imò & perfidiam ieiunam nuncupavit. Quia & oratio parùm fecunda, facundaque, passim ieiuna appellatur: in illis siquidè velut succus quidam requiritur ad ipsorum splendorem, vigoremque, metaphoricè nimirum, quemadmodum cogitationes, affectionesque animæ reputantur alimenta, quorû abstinentia ieiunium

*Tra8. 17.
in loim.*

*Clem.
Alexan.
lib. 6.
stromat.*

*In leuit.
c. 16.
honi. 20.
Beda in
Lucam.
Bernard.
serm. 3.
de qua-
drag.*

*Ieiunium
spirituale.*

nuncupatur spiritale. Verùm propiùs, ac propriè
ieiunium ad edulia & comestionem pertinet, &
maximè, vt disertissimus ille Leo cognomine
Magnus indicat, ad cibi diminutionem. Quod et-
iam Græci appositè exprimere videntur voca-
bulo τῆς νηστείας. etymologia quasi ἀπὸ τοῦ μὴ
ἐσθίειν, id est, à non comedendo, siue corpo-
ris vacuitate deducta, vt crapulæ, saturitatie, seu
(vt quidam appellat) panariæ ebrietati è diametro
sit aduersa. Nam & ieiunium intestinum idcirco
medici indigetârunt, quòd minimum Chyli reti-
neat, ac præ ceteris magis vacuum inueniatur.

*Cælius
Rhode.*

*Corpora-
le Ieiun-
ium.*

Ceterum huiusmodi à cibis corporis necessitati,
seu nature genio seruientibus abstinentia, corpo-
ralis ieiunij nomine designatur: eo tamen discri-
mine, vt vitæ frugalitatem, quam sobrietatem,
parsimoniâque licet appellare, sub se comple-
ctatur, quam theologi Morale ieiunium vocant.

*Morale
Ieiunium.*

Naturale.

Deinde alterum censetur Naturale Ieiunium,
quo natura prorsus cibo, & potu fraudatur, quale
medici requirunt, vt medicamenta purgantia
congruè assumantur, & Christianorum pietas ad
communis sacre reuerentiam exigit, penuria
imperat, morbus subinde cogit, & scelestâ quo-
rundam voluntas perfidè ad necis propriæ conci-
liationem suscipit Quibus & tertium ieiunij cor-
poralis genus accedit ex religionis præscripto in-
stitu-

*Præceptū
ieiun.*

stitutum, cibi nempe subtractio, carentiaque non perpetua, sed temporis spatio designata.

Quæ hîc dicuntur de corporali ieiunio intelligenda.

CAPVT III.



PORRÒ de corporali ieiunio, stat abſtinentiâ à cibo, quicquid de ieiunio præcipitur, intelligi neceſſum eſt. Nam Spirituale illud quod dicitur ieiunium non ſimpliciter, ſed vel magnum, vel generale, vt paulò antè citata autorum verba indicant, ob metaphoram profertur, neque afflictionem parit. Etenim

Nil conſcire ſibi, nulli pallescere culpâ

iuge eſt conuiuium, ad quod inuitat, ac trahit ratio, perſuadetque haud egrè, dum ſemotis prauorum affectuum nubeculis, liberè dominatur, vt quiſque libentiùs interne ſuauitatis epulis delectetur, eaſque ſtudeat ſemper habere familiares. Verùm dum ſpirituale vocatum ieiuniũ perpetuum eſſe cognoscitur, non item ſemper corporale, hoc tamen ſibi illud ieiunium perpetuò poſtulat ſociari, naturâ alioquin per vices reſtaurationem requirente. Non enim, quod eleganter apud Leonem legimus, in ſolâ abſtinentiâ à cibis ſtat noſtri ſumma ieiunij, aut fructuoſè cor-

*Serm. 4.
quarag.*

D


pori

pori esca subtrahitur nisi mens ab iniquitate re-
uocetur: Indignum quippè foret ieiunantium
mores à puritate perfectæ continentiae discrepare.
Proindè de spirituali accipi non potest, quòd
Regius ille psaltes, post delicias corpori suo sub-
tractas conqueritur, genua sua infirmata esse à je-
iunio, & carnem à suo vigore immutatam, pro-
pter deficientem pinguedinem, quam scilicet je-
iunium, ciborumque defectus assumpsisset. Sed
nec ad temporum distincta interualla a diuilex
illa potest, quæ vitia, morèsque prauos prohibet,
quam etiam Scriptores, quantumlibet scelesti, &
improbi inuiolabilem docuerunt, adeoque co-
rum qui vel ieiunia damnârunt, aut eorundem
obseruatiâ per tempora distributam improbâ-
runt, seu aliter pro ventris imperio confinxerunt:
temerè, frustra, & absque ratione commenta (ve-
lut ab Augustino contra Aërianos, Hieronymo
contra Iovinianum, alijsque doctissimis viris ad-
uersus reliquam gastrimargorum turbam acriter
infudatum est) conuellendi, & refutandi stu-
dium susciperetur, cum nemo eorum sit quorum
& lingua, & calamus non perpetuò commenda-
dauert virtutem. Sic igitur, & Prophetarum
monita, Moysis de ieiuniorum solemnitatibus
instituta lex, Saluatorisque circa Pharisaicas, fu-
catasque ieiunâdi consuetas obseruantias intelli-
genda:

gendæ sunt reprehensiones, quod ea iuxta spiritualem sensum ex virtutum intermissione nullo niterentur fundamento. Sed nec decuerat metaphoris toties repetitis obscurare, quæ æ planè, ac sæpius sacrorum oraculorum contextu fuerant commemorata. Quare de corporali ieiunio tantum sermonem hic institui iam satis superque sit prælibatum. Proinde ieiuniorum, & abstinentiæ historias non minus utiliter quam iucundè producturi videmur tum ad confirmationem eorum quæ modo diximus, tum ad illustrationem eorum quæ postea meditamur.

*A cibis abstinendum esse ab origine ieiunij,
& prophanis exemplis liquidò
probat.*

CAPVT IIII.



LRVM profectò est rem nullam tam sacram, tam longâ, ac certâ origine ductam, tam clarè denique explicatam, quæ non etiam nunc in dubium vocetur, ne dicam tanquam supposititia rejiciatur. Tantumq; valere apud quosdam opinionem, ac prauam volutatem vt nec oraculis fidem adhibeant, ne ij quidem locis vbi seipsa expresso

velut scholio explicant, & interpretantur. Quo fit vt & praxim sacrarum rerum rideant, & calumnientur, veraque disciplinæ vincula dissoluant, abrum pantque, Sollicitè enim hoc machinantur qui in ventrem credunt instar τῷ ὄντι piscis (vt tradunt Philosophi) cor in ventre habentes ἀκέφαλοι, helluones, voluptarij, victum in dies persequentes perinde ac non victuri, ad ingluuiem nati, nullumque suis cupiditatibus frænum instar indomitorum equorum imponentes, eam affectantes liberratem, quæ lege careat, & pyraustarum in morem in interitum deducat: quod quàm improbè circa abstinentiæ, ieiunijque propositum contingat, luce meridianâ manifestius perspicitur, si abstinentiæ institutionem ab ipsorum protoplastorum ortu principia coepisse, Deo autore, repetamus. Ipsis enim in deliciarum horto primùm collocatis, permissum est de fructibus lignorum vesci, præterquam ex ligno scientiæ boni, & mali, de quo præceperat Deus, ne comederent: & mulier videns quod bonum esset lignum ad vescendum, & pulchrum oculis, aspectuque delectabile, tulisse narratur de fructu illius, & comedisse, dedisseque viro suo, qui etiam comedit. Sic enim vterque abstinentiæ legem violauit, quæ in non comedendo fructu fuerat constituta: adeoque corua homini

D: Basil.
Serm. de
ieiun.

Basil.
Serm. 1.
de Ieiun.

homini ieiunij lex extitit, atque ipsa in paradyso commemoratio ieiunij quædam est imago, non solum (inquit Basilius) ob paucorum ibi indigentiam, sed quoniam quanta cogitatio postea reperit nobis in paradyso manentibus excogitata non erant. Sancti omnes velut hæreditatem quandam ex Patribus accipientes ieiunium ita seruârunt, vt pater filio per manus ad hanc vsque diem traderet, neq; in paradyso terrestri viuum, non carniuum esus; post diluuium vinum reperi- tum, & niues inuentæ deliciæ, victus ille parcus, olera, herbæque abierunt. Porro vt extra disceptationem Scriptura sacra assereret, sæpius cibum, panem, carnem, sanguinem adijcit quandò de subtractione alimentorum incidit occasio, vti in sequentibus exemplis plenius intelligetur, cum magnâ eorum confusione, qui obstinatè dant operam vt gulæ negotium tueantur, dum conscientix suæ prætextu non cessant repetere, quod olim quibusdam in ore haberi solitum commemorat Hieronymus: Cur me abstineam à cibis quos Deus creauit ad vtendum? Pudor farè, eos qui Christiano optant censeri nomine, etiam solem sic velle obscurare, cuius lucem & ipsi prophani sapientes re ipsâ prodiderunt. Nam idcirco abstinentiæ laude habentur celebres, Zoroastes, quòd in deserto viciuauerit caseo annis viginti:

*Hieron.
ad læ-
tam.*

Ptolomeus Lagi filius, Diogenes Cynicus, Syrusque rex præter panem vix corpori quicquam concesserint, nempe ne victus indulgentiâ præclaræ animi functiones obscurarentur, aut legniores euaderent, nihil ceterorum alimentorum, aut parum admodum comedi bant. Quo studio Aegyptios quoque Sacerdotes extollit Herodotus quasi idcirco multa de divinitate consecutos; addit Origenes illos insuper ovis, capris, bubus, piscibus abstinuisse. Gaudentius Merula Sauromatas, qui ultra Boristhenem sunt, & paludem Mæotidem Boream versus, cibos semper capere diebus alternis, medio abstinere commemorat, quod & a Plinio dictum prius. Anchimolus, & Moschus Ælienses Sophistæ totâ vitâ hydropotæ fuerunt, solisque ficibus desiderio ventris satisfecerunt. Pythagoras animatis omnibus, & fabis sibi interdixit. Appollonius Tyanae is a vino, & carnibus abstinebat. Philinus, Theophrasto autore, solo lacte totâ vitâ usus est. Athenienses execrabantur edendi aviditatem, ob quam Bæotios pingues, & rudes fauoscque nuncupârunt. Galba certe persuasi non sibi habuit, nullos propterea minus metuendos ijs qui de solo victu cogitant.

*Contra
Celsum
lib. 5.*

*Lib. memorab.
cap. 2.*

*Lib. 7.
cap. 2.*

*Orig. con.
Celsum.
lib. 5.*

*Theo-
phrast.*

*Suet. in
Vulio.*

*Quâ methodo jeunârunt qui præ ceteris in lege
veteri floruerunt.*

CAPVT V.

SED ENIM ijs de abſtinentiâ ſic expoſitis, potiore iure jeiunium de alimonix priuatione, qualis illa Sauroinatarum accipietur. Quomodo Heliam quadraginta diebus, & quadraginta noctibus ambulâſſe vſque ad montem Dei Oreb in fortitudine ſubcineritij panis, de quo comedit, & hauſtu aquæ quam bibit, ſacræ docent litteræ: & ipſi quadraginta martyres ſic interpreta-
ti ſunt, quando quadragenarij numeri memoriam ſacram recolentes, ne quadageſima corona deceſſet, Dominum deprecati ſunt vnâ omnium hac oratione. Eſt Domine in honore quadragenarius numerus, quem tu quadraginta dierum jeiunio decorâſti, per quẽ diuina lex ingreſſa eſt in orbem terrarum: Helias quadraginta dierum jeiunio Deum querens eius viſionem conſecutus eſt. Sic illi. Eandem illam periodum jeiunandi ter perſoluit Moyſes, ſemel vt decalogum ſuſciperet, bis vt populi peccatum expiaret. Quod eleganter magnus ille Baſilius explicuit his verbis.

*Reg. 3.
cap. 2.*

*Breuiar.
roman.*

Quis hoc ieiunium aliter intelligat, quàm de
 abstinentiâ cibi & potus, per quam Propheta ille
 ter maximus tabulas decalogi accipere meruit di-
 gito Dei scriptas, quando gula vna miserabilis
 populi illas cassas, & irritas fecisset, expressè sub-
 iungitur: Sedit enim populus manducare, & bi-
 bere, & surrexerunt ludere. Ninivitarum tam ri-
 gida fuisse abstinencia legitur, vt nec infantibus
 (de brutis animantibus præterco) vel papillæ v-
 sum per triduum permiserint. Dauid, & viri eius
 ieiunauerunt vsque ad vesperam super Saul, &
 super Ionathan filium eius. Idem ieiunauit ieiunio,
 nec comedit cibum donec filius obijisset.
 Quin & impijssimus Achab vsu alimentorum
 sibi interdicto proijciens se in lectulum, notatur
 non comedisse panem. Iosaphat timore perter-
 ritus ad rogandum Dominum se contulit, & præ-
 dicauit ieiunium vniuerso Iuda. Viri Iabes sepe-
 lientes Saul ieiunauère septem diebus. De Samp-
 sone certissimum est, quòd inatti præceperit
 Angelus, ne attingeret quæcunque ex vite pro-
 cederent, non vinum, non siceram biberet; vt
 meritò a D. Basilio notatum sit, Ieiunium con-
 cepit, ieiunium nutriuit, ieiunium fortem effe-
 cit. Iudith ieiunauit omnibus diebus vitæ suæ
 præter sabbatha, & neomenias, & festa domus
 Israël. Hester iussit Iudæos secùm ieiunare, mo-
 dum

dum exprimens, non edatis, neque bibatis tribus diebus, & tribus noctibus, & ego cum ancillis meis similiter ieiunabo. Daniel tribus hebdomadarum diebus lugens, sic adiecit: Panem desiderabilem non comedi, & caro, & vinum non introierunt in os meum. Sara Raguelis filia Tobæ juniore desponsanda pertexit in superius cubiculum domus sue, & tribus diebus, & tribus noctibus non manducauit, neque bibit, unde & ab Asmodæo liberata est. Huiusmodi ieiunium prædicauit Esdras iuxta flauium Ahana ut affligerentur coram Domino, aitque postea, ieiunauimus autem, & rogauimus Deum nostrum, per hoc & euenit nobis prosperè. Tale ieiunium sanctificari præcepit Ioël. Tale est ieiunium quarti, & ieiunium quinti, & ieiunium septimi, & ieiunium decimi mensis ex præcepto Domini exercituum domui Iudæ in gaudium, & latitiam, & in solennitates præclaras, apud Zachariam. Simile ieiunium fuisse sentiendum est Iudæ Machabæi, sociorumque eius. Nec potest à prodiomo illo Christi Baptistâ eremiticæ philosophiæ principe huius nominis seiungi ieiunium, quem non alijs quàm locustis, & melle à septimo ætatis anno victinasse, & à sicera, coque quod inebriare potest semper abstinentie, ex ipsis veritatis archiuis accepimus.

Daniel
c. 10.

Tobie —
cap. 3.

Esdræ
lib. 1. c. 8.

Ioël. c. 2.
Zachar.
cap. 7.

Quater
in ann. o
ieiunium
à Iudeis
deservari
debuisse
Petrus
Salomon
de arcan.
Cathol.
verit.

lib. 1. c. 5.
ex doctrina
Rabbinorum.
Machab.
Luc.

*Quis propriè jeiunus, ex Græco, & anglo
idiomate declaratur.*

CAPUT VI.



ETERVM jeiunij observantissi-
mos fuisse Apostolos, aliosque Do-
mini discipulos, nimis clarè signifi-
cat Evangelica historia, præsertim si

Græcus consulatur *αυτόχρατος*, quod enim Latini habent, jeiunantibus omnibus dixisse Spiritum sanctum, Segregate mihi Paulum, & Barnabam, hoc ille voce *νηστεύοντων* exprimit, sicut postea, Tunc jeiunantes, & orantes posuit *νηστεύοντες*,

Act. c. 13.

Act. c. 9. *ύσταντες, & προσευξάμενοι.* Id de Paulo explicatiùs *Καὶ ἦν ἡμέρας τρεῖς μὴ βλέπων, καὶ ἐκ ἔφαγεν οὐδὲ ἐπιεν.* id est, & erat tribus diebus non videns, & non manducauit, neque bibit. Et iterùm, cùm Lystræ,

Act. c. 14. Iconij, & Antiochiæ Paulus, & Barnabas constituissent per singulas Ecclesias presbyteros, & orâssent cum jeiunationibus, Græcè *μετὰ νηστειῶν.* se commendârunt Domino. Et rursùm, cùm non esset tuta navigatio, Paulus *διὰ τὸ & τὴν νηστείαν.* suos consolabatur, commendabatque Deo. Sal-

Marc. c. 9 uator etiam genus quoddam demoniorum ejci non posse discipulis respondit, *εἰ μὴ ἐν προσευχῇ, & νηστείᾳ.* Quapropter *νητεία, νητεῖν, & νησιμὸς*

VOCES

voces accommodatissimæ sunt, etymologicè ἀπο τῆς ἐν ἐσθίᾳ deductæ, quod sonat non comedere, vt *νηστία* non comestio intelligatur, quasi cibi carentia, atque priuatio, vnâ voce j. iunatio. Iam jeiunij vocabulum toto orbe apud omnes inualuit, neque enim quisquam tam alienus à communi sensu reperitur qui ieiunum quempiam dixerit, qui cibi quantulumcunque ab ipso dici exordio sumpserit; vnde & soluisse, fregisse-que ieiunium talis vulgò dicitur, adeò sanè rei accommodatâ phrasi, vt Angli haud aliter jentaculum efferre hæctenus conluèrint, quàm *Breakfaste* id est, fractione jeiunij.

*Stricteſſimè jeiuuârunt proto-Chriſtiani, ac
maximè Apoſtoli.*

CAPVT VII.



ED non abs re futurum arbitramur, si priusquàm longiùs excurramus, qualia priscorum Christianorum, & qui deinceps secuti sunt jeiunia in medium proferamus, vt ex ijs quæ sponte suscepta sunt, quæ fuerit Ecclesiæ Catholicæ in sanciendoſt abſtinentiæ legibus pia prudentia, sine negotio demonſtremus. Siquidem incredibilia fuiſſe jeiunia vtriuſque ſexus religioſorum

*Demo-
rib Eccle-
siae c. 32.
et 33.*

*Libro
Quod
probat.*

*Hieron.
de Script.
Eccles.
Lib. de
vita con-
templat.*

Mediolani, & Romæ irrefragabili D. Augustini
auctoritate assertum est, qui etiam solo pane
quosdam in desertissimis locis vixisse, per certa
sibi temporum interalla allato, annotavit. Phi-
lo iste philosophus natione Iudæus in Syriâ, Pa-
læstinâ & apud Aegyptios circa Alexandriam,
Esfesos à sanctitate dictos circiter quater mille
commemoratur summâ religione Deo seruivisse
(D. Hieronymus de Christianis id interpretan-
dum monuit) addens alibi, nec cibum, nec po-
tum quinquam sumpsisse ante solis occasum,
frugalitatis, & temperantiæ studiosissimos, non
nullos ex his vix tertio quoque die famem sen-
sisse, nec defuisse qui duplum perdurarent eius
temporis, & vix sexto die degustasse cibum, as-
fectos, sicut Cicadæ, rore viuere, septimum verò
diem vix festum, sacratumque honore dignatos
eximio, quo post curam animi corpus quoque
reficiebant, sicut iumento relaxantes laborem
continuum, in cibatu vti solitos pane simplici,
sal vicem supplēsse opsonij; qui deliciares ha-
berentur, hyssopum pro condimento adiecisse,
potum è fluentis hausisse (nam vinum habebant
pro veneno afferente dementia) contenti pla-
care dominas à naturâ mortalibus additas fa-
mem, sitimque absque omnibus lenocinijs, ab-
stinendo rebus sine quibus non licet viuere Hec

Philo.

Philo. Sed à B. Marco Euangelista B. Petri discipulo, ex cuius ore (Eusebio teste) Euangelium exceperat, Alexandrini fidei rudimenta (vt Petrus Damianus meminit) ieiunij, continentiq; præcepta acceperunt. Quo fit, vt Ecclesiastici quoque Magistratus coryphaeum, ac Christi successorem D. Petrum imitar magistri sui ieiunium coluisse credendum sit, cuius doctrinam Marcus ita auidè hausisset, & tam fideliter suis discipulis Alexandriae exposuisset. Accedit quòd à Domini in cælum ascensione, ipse D. Petrus, vix alio cibo vsus fuisse tradatur quàm pane cum oliuis, cum olusculis raro. addit Nazianzenus lupinis famem pellerè consueisse. Quid quòd lachrimis assiduus ipsi semper stillarint oculi? quibus genialior nutriticus sistendis solet esse remedio, & contrarius afflictioni, quam Dauid, audito quòd mortuus esset filius, cum vellet deponere, petiuit, vt ponerent ei panem & comedit, quo erectis corporis viribus pelleret lachrimarum expressorem. D. Iacobum Domini fratrem agnomina- tum, & Bartholomæum inter Apostolos nobilitate illustrem habitum, haud credi potest, in ieiunij obseruatione cuiquam cessisse, quando ex nocturnis, atque diurnis genu-flexionibus (vel centies repetitis) patellæ ad tibiarum flexum camclorum in modum occalluisse, ex historijs

*D. Clem.
recogn.
lib. 7. ad
Iac. frēm
Domini.
Nazian.
in orat.
de amore
paup.*

*Reg. 2.
c. 12.*

*Egesippus
apud
Euseb.
hist. lib.
2. cap. 22.*

*Clem.
Alexan.
ped lib.
2. cap. 1.*

*Epiphani-
um. Cōp.*

*Epistolæ
Canon.
ad Bassi-
lium.
Ad Phi-
lipp.*

constet. Egesippus apud Eusebium illum refert
nunquam carnes in cibum, aut vinum in potum
adhibuisse. D. Mathæus a carnibus abstinens, se-
minibus, baccis, oleribusque victitans, putâne
ceteris jeiunauerit minù. ? In vitâ D. Thomæ
quem Germanis quoque prædicâsse credibile est,
refertur crebrò jeiunium septem dierum obser-
uatum. Ἐσποφάγῳ, siue siccorum elum, Apo-
stolorum tempore in vsu fuisse Epiphanius au-
tor est, ad eò ut per sex dies paschatis omnes po-
pulos in eâ perseverâsse testetur, nullo alio cibo
quàm pane, fabis, & aquâ ad vesperam vrentes.
Dionysius Alexandrinus idem confirmat, quos-
dam sex integròs dies, duòs, trēs, quatuor jeiunos
transegisse. Martyr Ignatius, Consuetudinem ser-
uari præcipit, quâ quartâ, & sextâ feriis moris
erat j iunare.

*Anachoretarum, & Ægyptiorum patrum
spontanea paradigmata.*

CAPVT 8.



EGYPTII Patres virtutem absti-
nentiae coluerunt, quam esse totius
monastice vitæ fundamentum sta-
tuebant: inter quos Paulus ille Ana-
choretarum primus, dimidiato duptaxat pane,
quem

quem coruus quotidie attulisset in deserto victi-
tauit. Verum cum Antonius verè magnus ad
eum accessisset, duplicata annona est, integer
videlicet panis similiter a coruo subministratus,
fonte limpidò vtriusque sicut leuante. Alioquin
Antonius panem solum cum sale, & aquam
post biduanam, triduanam inediam non rarè
comedere solitus est. Hilarion autem sanctissi-
mus à primâ adolescentiâ in Palæstinâ sic abs-
tinuit, vt primò nisi crudissimis herbis, po-
steà coctis, sed sine oleo, deindè ficibus, &
oleo vesceretur, nec demùm nisi ætate incli-
natâ panem admitteret. Eam jeiunandi nor-
mam, per totam pœnè vitam arctè, solicite-
que seruârunt, vt ne per infirmitatem quidem
viuendi securitatem relaxarent, nec ante ves-
peram cibi vel minimùm attingerent. Stupen-
dum est Ioannem, Andream, & Philippum,
quos in Ægypti solitudine reperit Pachomius
hebdomadatum continuata jeiunia soluere so-
litos Dominicis diebus, quandò ab Angelo sin-
gulos panes accipiebant, addito altero pane cum
accessisset Pachomius. Refert Cassianus Mona-

*De spir.
ga^lri.
Lib. 5.
c. 26.*

chum quendam nunquàm sibi soli cibum in-
dulxisse, sed etiam si per totos quinq; dies ad eius
cellulâ nullus aduenisset refectionem iugiter dis-
tulisse donec sabbatho, vel dominico die deuotè

- „ congregationis obtentu procedens ad Eccle-
 „ siam, peregrinorum quempiam reperisset, quem
 „ exinde reducens ad cellulam, cōsolito eo refecti-
 „ onem corporis, non tām suæ necessitatis obren-
 „ tu, quàm humanitatis gratiâ, causâque fructus as-
 „ sumeret. Idem commemorat apud senem Pe-
 „ sium, Ioannem Abbatem solere dicere, solem
 „ nunquam ab annis 40. se reficientem vidisse.
 „ Sed nec Ephesius Anachoreta per totidem annos
 „ ante solis occasum comedit. Mutius abbas solis
 „ Dominicis pane vescabatur diuinitus, ceteris die-
 „ bus absque cibo permansit.

Lib. 5.

c. 27.

de spiritu

gastric-

mar.

*Nec suo numeri defuerunt Græci, quo summa
 sunt animi alacritate persmecti.*

CAPVT IX.



INTER Græcos, Elpidius Cappa-
 dox per viginti quinque annos tan-
 tùm bis in hebdomada, Dominicis
 nempe diebus, & feriâ quartâ cibo
 vesci dicitur cōsuevisse. Sampsonis Dolensis Ar-
 chiepiscopi ieiunia modò biduana, modò tridua-
 na, modò integræ fuerunt hebdomadae. De Epi-
 phanio quoque Cyprio legitur habitasse in loco
 quinque miliaribus seiuncto ab aquis; & sale,
 pane, & aquâ modicâ ad imitationem Hilarionis
 cuiusdam

cuiusdam monachi, se sustentasse, cibum subtrahens ad duos, tréque, sæpillimè quatuor dies, & subinde septem. Sed omnem admirationem superat quod de Nicolao Myreorum Archipræfule historię meminerunt, adhuc in cunis vagientem sic ieiunium amplecti cœpisse, vt quartâ, & sextâ feriâ semel tantum si geret vbera. Nobilissimus Ioannes ille Calybita apud Ascetas sexennio nihil nisi corpus Domini sumpsit. Eadem pœnè superat Simeonis Stilitis abstinencia, qui in columna annis quadraginta incredibili ieiunio perseverauerit.

D. Hier.

Metaphr.

Quid hoc in genere præstiterint Europæi.

CAPVT X.



ACTVM Temperantiæ insigniter exercuerunt Europæi; tantum valuit pœnitentiæ studium, tam gratus labor ieiuniorum, & obsequia diuina.

Tanta abstinencia fuit S. Genouex Parisiensis vt à decimo quinto ætatis anno, bis in septimanâ vesceretur pane hordeaceo, & fabis, continuando ad quinquagesimum annum, quandò Episcopi eam coëgere vt lac, & piscem adijceret. Carolus Magnus etiam cum periculo valetudinis, quòd esset procerus, & giganteæ molis, ieiunijs

Dionysius lib. 5.

Mutius lib. 8. & Regino lib. 4.

F

triduo

*Crom.
lib. 2. 8.*

*Bonaüet.
in vitâ
S. Franc.*

*Mola. in
Martyr.
Chron.
Brab.*

triduo corpus exercuit expeditione in Mauros susceptâ ad Anisum fluuium. Stephanus V Valachie Palatinus trecentis suorum profligauit Turcarum 12000. solique Deo victoriam acceptam referens, toto deinceps quatrIduo præter panem, & aquam cibo abstinuit. Ieiunio triduanO Cecilia Angelû virginItatis custodê promeruit. Seraphicus Franciscus, tanquâ alter Moyses ter quadragesimariam periodum ieiunando peregit. S. Dimipna ex hiberniâ patris furorem declinans, tribus mensibus ieiunio, & orationibus vacauit. Nobilissima Gertrudis mirum operè sese ieiunijs extenuauit. Quid dicâ de præclarâ illâ, ac sanctâ Pipini familiâ quæ tot ferè habuit sanctos quot principes? inter quos memorabilis illa Verona Caroli Magni proneptis, quæ secundò in Brabantîâ venit. I. ex arce paternâ mundi pompam execrâta Lembecû fratris visendi causâ, non dubium, quin in tam longo pedestri itinere sine viatico, sæpe grauissimâ esuritione laborauerit, cû ex oraculo cognoscere meruerit sese propè Louaniû in monte S. Crucis sepeliendâ. Beatissima Clara quadragesimam maiorem, & alteram D. Martini ieiunauit in pane, & aquâ; feriâ quartâ, & sextâ nihil cibi sumebat; triduanum quoque ieiuniû illi familiare Assisientis Episcopus, & B. Frâciscus inhibuerû, imperantes, vt nullum diem prætermitteret quo ad minimum

mum sesquinciã panis comederet. Romoaldus
 Camaldunensium institutor quindecim annis,
 non nisi ad finem hebdomadę cibũ capiebat, hoc
 censens esse omninò ieiunare, totũ diem sine villo
 cibo transigere. Catharina Senensis ieiunãdo tan- *Romund.*
 dem omnem cibum auersabatur, & triennio solo *m. vii. S.*
 synactico pane victitabat. Maria Ogniacensis vir- *De Vi-*
 go, & vidua Niuigellensis à festo exaltationis S. *ritaco.*
 Crucis vsque ad pascha obseruauit ieiunium per
 annos tres in pane, & aquã, fertur perseuerãsse si-
 ne cibo per 35. dies; ante obitum nihil diebus 53.
 gustauit præter viaticũ Christi. Nicolaus Tolent- *Bren.*
 tinus, annis triginta nunquã carnem, oua, lac, *Rom.*
 pisces, ac nè poma quidem in cibum adhibuit, se-
 cundã, quartã, & sextã ferijs, atque in honorem
 beatissimę Virginis Dei genitricis etiam sabbatho
 semper ieiunauit solo pane, & aquã contentus. S.
 M. B. Ignatius de Loiola societatis Iesv fundator *Petrus*
 insignis in abstinentiã fuit, itaque suis præluxit, *Maff.*
 vt Petrus faber in niue sub dio sine cibo & potu *De Vir-*
 omni prorsus sex dies peregerit. Franciscus Xau- *B. P. Ig-*
 rius Indiarũ, Chinæ, Iaponiæque miraculum, & *nat. l. i.*
 Apostolus cui saxũ cervical, somnus sæpè vix ho- *c. 21.*
 ræ vnius, labores summi, & itinerum difficulta- *Ribade-*
 tes maximæ ieiunus quatrduum fuit. Franciscus *ncia*
 Borgias ex duce Gandię tertius prò Soc. Iesv, *Payua.*
 Prepositus Generalis, cum adolescens obaeso ad-

*Andre.
Scotus
de vita
l. 3.
Ribade-
neir.*

modum, & crasso esset corpore, post assiduus ieiunij, ciborumque abstinentiâ à cenâ temperans adeò seipse maceravit, ut ventris cutem duplicarer, & togæ instar pellem quò vellet referret: vultum esse dixisses inanem.

Moschis etiam sua stata ieiunia.

CAPVT XI.

*Annal.
Societatis
Iesu 1581.
Anton
Possenn
in Mo-
scho.*




MOTA est Moschouia inter Barbaros haud infima, cû solet frugalitate uti, ut perpetuò victus paucus, & parabilis, eiusdemq̃ ietenoris, Cæpe, & brassicæ sint in præcipuo honore. formula ipsis est inuitadi, & absoluti prandij Clepda sol, id est, ad panem & sal. habet stata ieiuniorum tempora quibus carnibus, lactarijsque abstinet, in quadragesimâ Latinorum more, quam post sexagesimum inchoat, abstinetque carnibus, post quadragesimam verò etiam ovis, lactantibusque, mox à dominicâ Trinitatis vsque ad festum SS. Petri, & Pauli Apostolorum, & ex Calendis Augusti, quem famem sancti Petri dicit, adusque festum assumptiæ Deiparæ: Postremò in aduentu Domini, cuius ex idibus Nouembris initium ferunt, qui dies ibi sancto Philippo sacer est, ad natalem Domini. Per hebdomadam, festum

quar-

quartam, & sextam, diem præterea decollationis S. Ioanni Baptistæ, & exaltationis S. Crucis, sine carnibus, lactarij quæ traducunt Melchi, exceptâ paschalis hebdomadâ, ac tempore quod inter natalem Domini, epiphaniamquæ se intercedit, quibus temporibus perpetuò carnibus vescuntur. Cùm communicaturi sunt, quod ad arbitrium faciant, 2. 4. 6. ferijs ieiunant, quæ antiquata consuetudo quamvis ab ijs sit in suppositionem abiuerit, non leuiter ieiunium commendat. Qui apud illos Monachi sunt (sunt verò plurimi: exemplo sit monasterium sanctæ Trinitatis, in quo trecenti quinquaginta numerantur) carnibus omnino abstinent: victus illis tenuissimus ex sale, pane, piscibusque quos ipsi met capiunt.

Quid hac in parte fecerint, consilio inducili Sanctorum ordinum integerrimi viri, apud quos nondum antiquus rigor defuerit.

CAPVT XII.



CAETERVM durior planè rigor ille qui natâ primum Ecclesiâ exercebatur, quandò quisque corpus suum in seruitutem redigere, & mentem studio pietatis prorsus mancipare, pro feruoris (qui

tunc erat longè maximus) impetu contenderet, Christianis omnibus ciuitatem vnam quodammodò referētibus, quorum & cor esset omnibus vnum, & anima vna, nec quisquā peculiare quid, aut proprium possideret, sed esset multitudinis credētium veluti quoddam prytanēum, seu Academia vbi quisque assiduè de Christo, & regno Dei philosopharetur : nec erat vlli quippiam prius, potiusquē quàm spretis caducis rebus omnibus, æternam nocte diequē theologiam pertractare, tantâ animi voluptate, vt corporis curæ oblitus, vix tandem naturæ necessitatis memores, non nisi post multos sæpè dies de cibo famendo cogitarent. Sed cùm crescente fidelium multitudine feruor ille deficeret, & attereretur, prudenti patrum consilio ieiuniorum, & abstinentiæ ratio ad certas quasdam leges, & normas est deducta, quas, qui vellent ceteris religiosius viuere, non tam ex communi præcepto, quàm particulari præscripto sine vitæ discrimine, aut remissione amplecti possent. Proindè moderationes variae sunt adhibitæ, ex quibus omnibus liceret seligere, quas sibi sumpto periculo magis conuenire arbitrarentur : vndè fit vt in tam diuersâ formâ religionum, ieiuniorum obseruationem & florentem, & firmam perdurare videamus. Proindè meritò sibi gratulari Ecclesia potest, quòd

quod quanquàm in pluribus sit indulgentior, nondum hætenùs primam austeritatem amiserit, cumquæ omnia non possimus omnes, mo-

dos ieiuniorum, tanquàm prudens mater, per tempora, naturasquæ distribuit maximè accom-

modatos, ut qui non possent fortissima ferre ieiunia, & sustinere, in facilioribus subsisterent.

Quare diuersorum ordinum ductores suscitauit, qui tales suis regulas præscriberent, quas quisque suo seculo magis congruere iudicaret, quasquæ suscipere possent citrà temeritatem, cum pauci sint qui de ductione supernâ securi imprudenter, & indiscretè sese valetudinis aduersæ exponant periculo. Quibus sapienti consilio Diuus Hieronymus occurrens, eos admonet, Tantum modum ieiuniorum sibi imponant, quantum ferre possint.

*Hieron.
ad Nepot.
Basil.
reg c. 10.*

*D. Hier.
ubi su-
pra.*

Liber III.

*Publico, & communi Ecclesie præcepto impie
ab hereticis, & deficiis Christianis
detrahi quæ constet?*

CAPVT PRIMVM.



POSTQVAM abstinentiæ, jeiuniorumque ratio ab antiquitate, v-
susque perpetuitate in vtroneis, &
legibus varijs confirmata est, à con-
silijs tandem ad publicum, & commune (vt D.
loquitur Hieronymus) præceptum ab Ecclesiâ
Catholica omnibus impositum progredimur.
Sed nè quis existimet, quod maligni quidam, at-
que peruersi homines in circulis, ac tabernis odio
sanctioris disciplinæ passim apud indoctum vul-
gus obstrepunt, alimentorum subtractione ne-
ce occasionem dari, ac proinde abstinentiæ mu-
nus Sanctorum sinelacris, quæ capitum duri-
tiæ ferendo sunt, esse committendum, sacros Le-
gislatores, sanctæ Ciuitatis archidia, atque vni-
uersi saluatoris regni sanctiones, vtitatæque ver-
ba

*Ad Ne-
por.*

ba perlustranda censeo. Sic quæ ieiunij sit finitioquæ præscripta formula, ordo, modus mensura, finis, voluntas nullo negotio cognoscetur.

*Quandò antiquitùs solutum ieiunium, autoritate,
exemplo, ritibus ostensum; quid nunc
positum in more?*

CAPVT II.

DI V V S Augustinus, cuius summa est *Aug. ad*
tùm autoritas, tum in docendo fides, ad *Casula-*
num.
Casulanũ, testatur ieiunium veteribus *Epist. 86.*
cœnam sine prandio significasse. Idem D. Ambr. *Amb.*
indicat, pauperibus prandium ieiunij tempore, *serm. 33.*
ceteris putà denegatum, dari præcipiens: quod
anachoretarum consuetudo confirmat, quam hi-
storix meminerunt antè seram vesperam nihil
prorsùs corporum refectiõni indulgisse, ad eò se-
uerè, vt quandoque haud infrequens fuisse appa-
reat potus quoque vsum tam diu fuisse suspen-
sum, vt ex Prudentij carmine de Fructuoso Tar- *Peri Ste-*
raconensi Episcopo iam igne cremando satis *phan.*
hym. 6.
colligitur.

*Quosdam de populo videt Sacerdos
Libandum sibi poculum offerenteis,
Ieiunamus, ait, recusò potum.*

Nondum nona diem resignat hora:

Nunquam conuiolabius dicatum,

Nec mors ipsa meum sacrum resoluet.

Sic Christus sitiens crucis sub horâ,

Oblatum sibi poculum recusans,

Nec libare volens, sitim peregit.

Haud paucis solemne etiam nūm dūm lex ieiunij viger in finem lucentis dici pactum differre, quod vulgò dicitur, donec sydera cælō micent, præcipuis utpotè profectis Natalis Domini, eiusque prodromi Baptistæ, Assumptę deiparæ, ac omnium sanctorum, in capite Ieiunij quod Cinerum ceremonijs decoratur, parasceues, & Sabbatho sancto, quibus feri è diebus lacticiuijs, ut alibi, sic in Eburonibus abstinent. Haud obscurè, cœnandi illum ritum prædicat pulsus campanæ quibusdam in locis dari solitus, eā horā quā vespertinum officium extrā quadragesimam absoluitur (Groeninga testis esse potest ubi is sonus ieiunij appellatur) quantumuis res ipsa euanuerit. Sed & antemeridianā per quadragesimam toto orbe, nonnullisque in locis per solemniora ieiunia vespertinarum modulationum anticipatione hoc ipsum innuitur. Nām religiosorum mensē benedicendi designata formula etiam continet, ut quoties semel in die tantum comeditur, omnia, sicut in cœnā præscribitur, recitentur, atque cœna tandem in prandium commutata, licet post diurnos

Sonus ieiunij campanæ excitatur.

Breu. Rom.

diurnos labores, & exercitia salubriùs somnus succederet, nisi comestationibus, & ingurgitationibus in abusum versa, fortè vtilitatem vila sit amisisse; non caret tamen consilio ea anteuersio, maximè æuo iam attritâ humanâ naturâ, quæ faciliè diurnis vigilijs, & occupationibus nimium exhaurienda succumberet.

*Semel edendum per diem; quâ horâ?
quamdiu? quantum?*

CAPVT III.



ORRÒ cænetné, aut prandeat quispiam, modò ieiunet neque controuertitur, neque magnoperè refert si semel in die duntaxat reficiatur, die, inquam, naturali horarum quatuor & viginti, câ lege vt ieiunandi periodus à mediâ nocte in mediam noctem ducatur, quâ pluries quàm semel vesci nefas sine causâ verâ, aut putatitiâ, aut dispensatione. Etenim de ieiunij essentiâ est vnica comestio, quam violari tradunt, cùm câ mente quis recedit à mensâ dùm naturæ satisfactum existimans eodem se recipit vndè fuerat digressus, quantumuis bellaria tantùm, vel cupedias, tragemata incrustata saccharo, gulæ

*Nat. in
man. c.
21. nu. 11.*

irritamenta vel id genus alia ingurgitet. Sed hîc D. Augustini meminisse oportebit, qui tunc parciùs viuendum, productiusq̃ue ieiunandum pronuntiauit. Nec præuenienda hora, quam D. Thomas prudenter finiri notat ad nonam, vel circiter, grossâ scilicet (vt ipse loquitur) æstimatione, ea nobis meridies. Vndè in Atrebatensi insigni Ecclesiâ, & alijs locis, vbi ceremoniarum Ecclesiasticarum rigor est exactissimus, vix vnquàm per quadragesimam vespertinæ preces antè meridiem absoluuntur. Sed nè quis vnicæ refectio- nis nomine, sibi licere arbitretur mensam in plu- res horas protrahere, scû quamdiù sol luxerit ab esu se continuisse, ac deinceps à solis recessu, si non in summum diluculum Saracenorum, Ma- humetanorumq̃ue supersticioso ritu, mēstruum quotannis ieiunium per tenebras integras inso- lentissimâ pergræcatione peragentium, saltem in plurimam noctem liberam genio indulgendi occasionem relinqui, alibi cautum est, nè vltra duas horas, saltem Ecclesiastici conuiuium pro- rogent, ac in vniuersum à crapulâ, & ebrietate tûm, si vnquàm, Christiani quàm longissimè ab- sint. Monuit Arabum Princeps nil deterius esse quàm diuersa nutrientia simul adiungere, & post illud in comestione tempus prolongare, ratio- nem addit, quòd cû postremum nutriens adue- nciit,

*Synod.
Mechlin.*

*Auicen.
1. 1. fen. 3.
doct. 2.*

nerit primum iam incepit digeri, nutrientis ergò partes in digerendo non simulantur. Verùm nè longiùs excurram, lubet Angelicum doctorem consulere, qui, vt in ijs quæ Ecclesiæ decreta concernunt est exactissimus, ità poterit ipse vnus de vniuersi Senatus Catholici sententiâ satis superque respondere.

*Ieiunij forma, differentia, de eodem
sanctiones.*

CAPVT IIII.



IEIVNIUM virtutis abstinentiæ *D. Thom.*
actus est omnibus qui non habent *2.2.9. 147.*
speciale impedimentum, certis, ac
definitis temporibus prudenter ab
Ecclesiâ designatum, præceptus, ad cuius obser-
uationem, vt non sæpius quàm semel in die, idque
circiter horam nonam quis comedat, atque à car-
nibus, ouis, & lacticiinijs abstineat, rectè, sapien-
terque est ab Ecclesiâ sancitum; hæc D. Thomas.
Quo decreto adeò clarè, atque perspicuè tota ie-
iunandi ratio explicatur, vt nisi qui nolit, dubita-
re possit. Nàm de indictis, imperatisque ieiunijs,
quæ Ecclesiastica diximus nominari, solùm in-
telligitur, quandò de ieiunij salubritate ambigi-
tur. Quæ enim sponte suscipiuntur, siuè ex voto,
siuè

siue deuotione, seu aliter ex arbitrio, quia particularia sunt tanquam legi non subiecta, hinc non comprehenduntur, ut nec naturalia quae talia, multoque minus metaphorica, seu alio quouis nomine appellata, ac proinde hoc loco breuitatis ergo praetermissa. Moralia tamen in victus parsimoniam, & moderationem posita, licet propria ratione consistant, ieiunijs Ecclesiasticis ita necessario coniunguntur, ut si illa his subtrahas non dicaris recte ieiunasse. Sed & nos semper decet moraliter ieiunos esse, quod non tam in non comedendo, quam in omni excessu, & intemperantia fugiendis censetur. Unde prudenter decretum est. Sint tibi ieiunia pura, casta, simplicia, moderata, & non superstitiosa, ieiunia continua, id est, quotidie prandere, quotidie esurire. Et paulo antea. Sint tibi quotidiana ieiunia, refectio satietatem fugiens, nihil enim prodest bi-duo, vel tri-duo portare vacuum ventrem, si post pariter obstruatur. Quocirca magni Leonis seruanda sententia, edendi nobis esse moderandam libertatem, nimirum ne per imprudentiam defectu nimio quis frangat naturam, morbumque conciliet, aut necem, quod nullam unquam ratione Ecclesia permisit, quae discretionem semper habet maxime commendatam. Quia nimia victus continentia debilitatem facit, ut ea pars

anime,

D. 5.
Sint ti-
bi 2.

D. 5.
Sint ti-
bi 1.

animæ, quæ in contemplatione versatur in mestitia sit, & in fastidio sermonis. Oportere quæ ad motiones corporis cibos etiam accommodare (quemadmodum Diadochus Photices in vetere Epiro Episcopus monuit) ut dum corpus valet quantum conueniat castigetur, dum verò non valet moderatè leniatur. Nec enim infirmo corpore esse debet qui certat, sed ita firmo sustinendo certamini par ut esse possit, ut anima etiam laboribus corporis conuenienter purgari queat. Nec alterum extremum admittitur quo homines brutis similes efficiuntur vere ἄσπῳτοι, tanquam ἄσπῳτοι; hoc est, à salute alieni per elisionem clementi, eorum significato sine, qui est ex prodigalitate perditio, ventrem scilicet replere, & grauare cibo, quod valdè inutile inter ceteros diuus Basiliius indicat etiam corpori ad omne tempus, quia & grauatur in somnum, & ex his etiam ledi faciliè potest; & certè ab alio quoque annotatum est, cum semper malum sit immoderatio, ea in nutrimenti maxime reprobatur, quòd in ventrem infania sit, quam græci idcirco γαστριμαργίαν nuncupârunt, vel λαιμαργίαν circa guttur insaniam, quæ ab omnibus sanctæ disciplinæ professoribus sedulo, & grauiter fuit explosa, ut ipse præceperat Saluator attenderent sibi omnes, ne

S. Diadochus de perf. spir. c. 45.

In ieiunio vires seruandas.

Clem. Alex. paedag. l. 2. c. 10.

In Reg. monach. c. 10.

Luc. 21.

fortè grauentur corda crapulâ , & ebrietate. Nec alia statuitur mensura quòd naturæ varient, & accuratiùs circa illam quippiam definiri in particulari sine iniuriâ non possit, dùm quòd vni satis est, alteri subindè nequaquam sufficiat: adeò vt consulto sub generali commonitione mensuræ præceptum finiatur dùm accuratior lex nulla suppetat, quàm ea quæ quotidie ex D. Petro repetitur, Fratres sobrii estote.

*Quibus cibis vesci licitum monstratum ex concilijs.
Simplicem eodem tempore conuenire, qui tamen
omnem varietatem non excludat, prohiberi
luxum, modestiam commendari.*

CAPVT V.

*Conc.
Trid.
ses 25.*



CIBORVM delectum imperat Oecumenica tridentina Synodus, illos excludens, quos superiore æuo sciuerat interdictos, inter quos caro, oua potissimùm, & lacticia interdum censentur quòd ea maximè inflamment, ac stimulent. In Concilio Toletano Martini Papæ tempore, scuerè olim cauebatur esus carniū in quadragesimâ. Quisquis enim tùm sine ineuitabili necessitate, atque fragilitate, & euidenti languore, scū etiam impossibilitate gratis esum carniū præsum.

*Conc.
Tolet.
c. 9.*

sumpsisset attentare, non solum reus foret resurrectionis Dominicæ, verum etiam alienus ab eiusdem diei sanctâ communione, & hoc illi cum malletur ad pœnam, ut ipsius anni tempore, ab omni esu carniū abstinere gulam, quia sacris diebus abstinentiæ oblitus esset disciplinam: illi vero quos aut ætas incuruat, aut languor extenuat, aut necessitas arceat, non antè prohibita violare præsumerent, quàm à sacerdote permissum perciperent. Ità Concilium. Et ex adiunctis sextæ Synodo Can. 56. Visum esse dicitur, ut omnis Dei Ecclesia vnum ordinem sequens ieiunium perficiat, & abstinere ab ovīs, & caseo, quæ quidem sunt fructus, & fætus eorum à quibus abstinemus. Quid? quòd Origenes quandò ieiunamus nos hortatur non solum à gustandis carnibus abstinere, sed etiam à vino, & superfluis escis? ad id maioribus nostris cordi fuit, omnē libidinis fomitem sacris illis temporibus reprimere. D. Clemens eadem de causâ vino in hebdomadâ sanctâ plerosque sibi meminit interdixisse, addens eo quoque tempore panem, salem, & olera, & aquam mensæ tantum adhibita. Græcorum fuisse morem ieiunij tempore vinum non bibere clarissima illa græciæ lumina Basilium, & Chrysostomum autores habet. Pisces, legumina, fructus, oleum, panificia, quæque his similia pro arbitratu

*Orig. lib.
3. in Iob.*

*D. Clemens in
const.
Apost.
lib. 5. c. 17.*

*Basil.
orig. l. 1.
de ieiun.
Chrys. ad
populum
hom. 6.*

*Lib. 2.
Col.*

bitratu cuiusque, & facultate conceduntur. Præceptoris Originis Pedagogus, dùm piè instruit Christianũ ex Antiphanis Delij Medici sententiã, vel vnã hanc dicentis morborum causam ciborum varietatem, docet sectãdam simplicem, & non nimio studio comparandam cibos condiendi rationem, quã fiant in maiori pretio coci quã agricolæ: non quòd omninò à varijs cibis abstinendum, sed in ijs non esse ponendum studium, respuendaque admodum multiplices qualitates, quæ varia detrimenta pariunt, malas corporum habitudines, & stomachorum subuersiones, cùm corruptus, & cõstupratus sit gustus miserâ, & infauistã quãdam condiendi arte, & inani in bellarijs faciendis artificio, audent enim appellare nutritionem deliciarum exercitationem, quæ in noxias voluptates dilabitur. Neque enim nostrum nutritio munus est, neque institutum, scopus uè noster voluptas; sed ea nutritio est propter nostram hîc mansionem, quam ad incorruptionem ratio instituit, ac ideo secernitur, & seligitur alimentum. Verũ apud homines nullum habet terminum delicata ingluuies: in liba enim, placentas, bellaria prouecta est, merendarum, & cænæ appendicum multitudinem inueniens, omnes qualitates aucupans. Equidem mihi videtur, ait ille, homo qui est eiusmodi,

nil

*Idem loco
citato.*

nil esse aliud quàm bucca, & maxilla, vel, vt verbo dicam, verus ὀψάριος. Quo genere continentur qui fungis, limacibus, carduis, lampetris fortè, & alijs etsi bonis, lautitiæ tamen studio, industriâ, atque ingenio sic abutuntur, vt non quiescant donec in condimentum vniuersas ἀρωματοπωλείων thecas exhauferint, præter mentem Ecclesiæ, quæ gulam detestata ab ijs omnibus abhorret quæ concupiscentiæ, ac libidini fomitem subministrant. Siquidem Gregorius ad Augustinum Angliæ Episcopum scribit par esse, vt nos qui his diebus à carnibus abstinemus, ab omnibus quæ sementinam trahunt originem, ieiunemus: & caueamus à sollicitis, & anxijis ciborum indagatoribus circa cochlear, & mortarium totam vitam consummentibus, quique edaces, atque adeò omnium homines materiam, ignis instar, apprehendunt. Qui etiam facilem; & parabilem cibum, nempe panem effeminant, quod frumenti est nutriendi excribrantes, vt quod est alimenti necessarium sit probrum voluptatis. Caluino ascribit Bolesecus ex polline frumenti purissimo rosaceo liquore, saccharo, & aniso domestici pistoris manu subactò biscoctum panem pinsi solere, nec alio vesci consueuisse. Cui sunt haud absimiles, qui nescio quâ vanâ gloriâ

Greg.
mag. ad
August.

In Vita
Caluini
cap. 14.

frugalem, ac moderatum victum abiurant, ad longè petitas, & raras ciskas anxie anhelantes; ex freto Siculo murenas, Meandri anguillas, & qui in Medo sunt hædos, & qui in Scyatho mugiles, Pelôri conchas, & abydena ostria, mænas quæ sunt in libarâ, bolum mantiricum, nec non betas ascreoticas, & pectines metymneos, & psettas atticas, turdos daphnios, caricæ chelidonias, propter quas in Græciam cum quinquies mille millibus infelix Persa profectus est. Phasidis aues, prætereà attagenas Aegyptias, medicum paunem avidè desiderant, & cùm per facultates licet comparant. Perindè ac ij qui nisi Capos Brugeses, aut Domburganos (municipium est in VValacriâ Zeelandorum) habeant, cuncta fastidiunt; sicut de accipensere in Bachariâ Plautus probè eiusmodi gastrimargos exprimit.

Plant.
in Bac-
char.

*Quis est mortalis tantâ fortunâ affectus unquam
Quàm ego nunc sum, cuius hæc ventri portatur
pompa?*

*Vel nunc qui mihi in mari accipenser latuit an-
tè hæc,*

*Cuius ego latus in latebras reddam meis denti-
bus, & manibus.*

Huius accipenseris, siue Sturionis, ut placet Rondeletio, fucum exhibet Anglia, lardo, simili-
liter ut sturio solet, aceto, muriâque condito,
quod

Rondel.
l. 16. de
piscib.

quod ex aruinâ suillâ procuratur, suis quinis, septeni quæ ordine vnis post alteras collocatis, & conclusis vt succedens prioris semper excrementa rostro excipiat, nec alio vescatur cibo, donec vltima post tam varias illarum sordium digestionem in solidam, ac firmam accipenseris emulam saginam degenerârit, quam in ieiunijs non tolerari satis ex præcedentibus liquet. Nil attinet Heliogabali ingluuiem qui nunquam minùs est 100 HS epulatus est, & Vitellij qui, si Platine credimus, nullum piscem gustâisset, nisi aureo hamo ex funiculo serico inescatum, meminisse; quia ad sustentationem corporis nil faciunt, & in modestiam cum voracibus, & helluonibus (quæ ieiunantes cum primis decet, & Christianos quouis tempore) grauissimè impingunt. Huc spectat quod ad Nazianzenum scribit Basilus, edere non cum impetu vt gulæ rabiem quandam præ se ferat, sed honestè, paulatimque mandere oportere. Nàm D. Petrus modestos omnes esse iubet; Et Paulus modestiam innotescere omnibus hominibus, ita diætante ratione. Nàm aliter inferiores essemus brutis animantibus, quæ non solum modum naturæ suæ congruum, sed etiam delectum sequuntur (vnumquodque pro suo instinctu, & appetitione) nec vel in aliud, vel amplius feruntur vt necessitati sati fecerint, quemadmo-

Plat. in vit. pontif.

Basil. de Vita Solit.

1. Pet. 2.

Ad Philip. 4.

dùm bos pascam, auenam equus, asinus carduos, fœnum mulus, orisam elephas, lepus sonchos, & sic cetera ferè summâ cum temperatione prosequuntur, & sumunt. Atqui Patres olim sub lege naturæ præsertim vsque ad diluuium, quique fuerant sanctiores cum ritibus, & sacrificijs suis, & ieiunia iunxisse, & à carnibus abstinnisse, non est equum dubitare. Bellè videtur aurei illius seculi homines discripsisse Seuerinus

*Seuerinus Boët.
de Consolat.*

Boëtius,

*Facili qui sera sotebant
Ieiunia soluere glande,
Nec Bacchica munera nôrant
Liquido confundere melle.
Sommos dabat herba salubres,
Potum quoque lubricus amnis.*

*Præcipui ieiunio inscripti dies; sacre quadragesimæ
tempus semper in Martium incidit.*

CAPVT VI.



POSTULAT ieiunium vt quo ordine à legislatoribus sit institutum, quibusque temporibus obseruandum referamus: hoc enim decet eam legem quam semper Ecclesia est secuta, autore sanè Deo, cuiusque Apostolis, traditione videlicet
omni

omni scripto, ipsiſque concilijs longè antiquiore. Quibus autem diebus non oporteat ieiunare, & quibus oporteat præcepto Domini, vel Apostolorum non se inuenire definitum D. fatetur Augustinus. Verùm in his rebus, in quibus nihil statuit scriptura diuina, mos populi, vel instituta maiorum pro lege tenenda sunt. Vnde Ambrosius loci consuetudinem sequebatur. Quando hic sum (inquit) Mediolani scilicet, non ieiuno sabbatho, quando sum Romæ ieiuno. Nàm plebs Romana frequenter ieiunabat quartâ, & sextâ ferijs, & sabbatho quo D. Petrus Dominicâ cum Simone mago certaturus ieiunârat, & sepultura recolitur nostri Saluatoris, eiusque pietissimæ matris memoria. In Oriente, & Occidente Christianorum tunc nemo ieiunabat, Dominicâ verò ieiunare pro scandalo est, eodem diuo Augustino autore. Innocentius Papa tertius triplex solenne ieiunium, quod generaliter indicit Ecclesia, diuidit, primum in quatuor temporum obseruantiam, secundum in quadragesimæ abstinentiam, tertium in festiuitatum vigilas, quodlibet eorum certis temporibus, certisque diebus, certis rationibus, certisque causis est institutum. Habemus, inquit Origenes, quadragesimæ dies ieiunij consecratos, habemus quartam, & sextam septimanæ dies quibus solenniter

*August.
ad Casul.
80.*

*D. Ambrosius
ad Ereat.
Monu.*

*Innoc.
serm. 1.
in aſſenſu
tu Domini.*

*Orig. in
leuit. c.
16. hom.
20.*

Calix.
Epist. 1.

Pet. Ga-
latinus
l. 3. de ar-
ca. Ca-
thol. ve-
rit. c. 5.

ieiunamus. Calixtus Papa tribus ieiunijs quar-
tum adiecit, quemadmodum in veteri testamen-
to quater in anno ieiunabant ante Pascha, Pen-
tecosten, scenophegiam in septembri, & antè
encæniam, & nunc quidem singulis trimestribus
tribus diebus. Tempora hæc memoriæ causa car-
mine isto exprimuntur.

Spiritus, & Cineres, est crux, & Lucia virgo.

Concil.
Brac.

Concilium Bracharense Apostolorum pro-
festis omnibus præter Philippi, & Iacobi, & Ioan-
nis Evangelistę decernit ieiunandum. De S Bar-
tholomæo variat consuetudo. In Festis solemoni-
bus præmittitur ieiunium Pentecostes, omnium
Sanctorum, Assumptæ Virginis Matris, Nata-
lis Domini. Hipponensis Antistes Sacerdotem
quendam, qui die ieiunij natalis Domini, quo
Gippitana Ecclesia, sicut ceteræ, ieiunabat, pran-
sus fuerat, & cænauerat abdicandum putauit.

Epistol.
236.

In Martyrum classe ieiunio pridiano hono-
ratur Laurentius. Quamquam inter pascha, &
Pentecosten ieiuniorum lege dies soluti sint, Ro-
gationibus tamen abstinetur à carnibus, sed vl-
trà meridiem non ieiunatur quod necessitas ex-
torset, ob luem grauissimè Magno Pontifice Gre-
gorio sæuientem in festo Marci, id est, litanij
maioribus: minoribus verò, quæ triduo Ascen-
sioni Dominicæ præmittuntur, a B. Mamerto

Paulus
montif-
casini
mon.

minore

minore licet, & tantùm Episcopo apud Viennam institutis, & postea per Ecclesiæ consuetudinem confirmatis, simile malum pio hoc opere auertitur.

Ad Faustum Manichæum Ecclesiæ Doctor sic scribit, hîc inter omnes, & æquè per orbem terrarum quotannis omni cum studio constat quadragesimam in conuentu Catholico celebrari: & vt de gestis cum Emerito Donatistâ recolit, annis, inquit, singulis ieiuniorum dies, id est, quadragesimam ante pascha. Si quisquam vnâ diem abstinendo prætermiserit (cense Ambrosius) totam quadragesimam violâsse. Vndè Concilio Laodicensi statuitur, non oportere in quadragesimâ vltimæ septimanæ quintâ feriâ ieiunium soluerè, totamque quadragesimam sine veneratione transire, magisque conuenire omnem quadragesimam districto venerari ieiunio. Et alibi, Si quis Episcopus, aut Presbyter, aut Diaconus, aut Lector; aut Cantor sacram quadragesimam paschæ, aut quartam feriam, aut parasceuen non ieiunauerit deponitor, præterquàm si imbecillitate impediatur corporis; sin laicus sit, communione priuator. Et D. Hieronymus omnem Christianorum vitam in-

*August.
lib 30.
c.3.*

*Conc.
Laod.
50.*

*Can. A-
post. 52.*

*Hieron.
Jerm. de
quadrag.*

*Innocent.
3 in Ad-
uent. Do-
mini
serm. 1.*

pro peccatis nostris quot pro sceleribus nostris Dominus ieiunauit. Sed & 40. diebus, & noctibus Deus in diluuiò aquas effudit ab ylli, totidem nuntij missi explorauerunt etiam Israël promissam, Israël 40. annis angelorum pane in deserto nutritus est, Ionas subuersionem Ninuæ 40. dierum spatio prophetauit, & Christus 40. diebus post resurrectionem mansit in terris. Propter sacramentum ergò ieiunamus quadraginta diebus; nam quadragenarius est superabundans & ex suis partibus aggregatus ascendit ad quinquagenarium, cuius partes aggregatae sunt septem, vicensarius, denarius, octonarius, quinquarius, quaternarius, senarius, & vnitas, quæ simul iunctæ reddunt quinquagenarium, in quo notatur Iubilæum.

*Gregor.
magnus
in Euang.*

Lex præcipit omnium rerum decimas persolvere; habet autem annus solaris dies 365. & quadrantem, quorum decimæ sunt dies 36. cum dimidio, & decimâ parte quadrantis, vt autem quadragenarius numerus compleatur dierum, additur decima decimæ, quam ex præcepto legis minores leuitæ summo sacerdoti reddebant: Ecclesia quoque decimam temporis decimâs Christo, qui est Pontifex futurorum bonorum, de 35. diebus accepit pro decimâ decimæ tres dies, & dimidium ad complendum quadragenarium, &

quia

quia non restabat adhuc decimare nisi vnū diem
& quadrante[m] & decimam partem quadrantis,
ideò distulit, cum misâ ieiuniū vsque ad noctem
in sabbatho sancto Paschali, secundum quod di-
citur, Deus qui hanc sacratissimam noctem, &c.

Hinc quadragesima ieiuniorum habet autori-
tatem sicut ad Ianuarium legitur. Chrysostomus
quadragesimam omnium asserit conscientiam
inflectere etiam imperatorum. Quod clariùs Ber-
nardus habet, Haetenus, inquit, vsque ad no-
nam ieiunauimus soli, nunc (in quadragesimâ)
nobiscum ieiunabunt pariter vniuersi, Reges, &
principes, nobiles, & ignobiles, clerus, & popu-
lus, simul in vnū diues, & pauper. Hoc præcepto
vt adueniente ieiunio & si millies quis exhortetur,
& infinita crucient, & cogant vinum delibare,
vel aliud quid lege ieiunij non concessum gustare,
omnia quis mallet pati quàm prohibitum tangere
nutrimentum, exemplo Eleazari, & Machabeorum:
Nec certè leue peccatum esse, ait Ambrosius,
indictam fidelibus quadragesimam violare,
& ieiunia cōsecrata ventris voracitate dissoluere:
siquidem Leonis sententiâ, impium est negligere
prædicatum, quod in natalitijs fieri à Diacono solebat,
ne de tempore cuiquam non constaret. Porro qui
Telesphorum autorem (quod Platina credidit) quadragenarij
ieiunij

*August.
ad Ianu.
Epist. 119.
Chrysost.
hom. 2. in
Genes.
Bernard.
serm. 3.
de quadr.*

*Chrysost.
hom. 8.
ad pop.
Antioch.*

*Mach.
lib. 1.*

*Ambr.
serm. 25.*

*Telesph.
in epist.
Plat. in
viii
Telesph.*

fecerunt, quàm grauius errent, illius epistola conuincit: Cognoscite inquit à nobis, & à cunctis Episcopis in hac sanctâ, & Apostolicâ sede congregatis statutum esse vt septem hebdomadas plenas antè sanctum Pascha omnes Clerici à carne ieiuent; ea quippe Clericos concernit exhortatio, vt abstinentiâ biduo laicos anteuertant. Ceterum tamen si Christus quadragenario exemplo nos excitans ab Epiphaniæ festo ieiunium sit auspicatus, Ecclesiæ Proceres mysterij ergò serius aggrediendum sanxerunt, quod præparandis animis Paschati iunctum voluerunt vt tempore maximè confini, & contiguo dominicæ passioni, vt proindè semper quadragesima in Martium incidat, qui est veris initium.

Hoc præceptum vniuersale quidem, non omnes tamen obligat. In quos cadat dispensatio?

CAPVT VII.

*Basilus
Orat. De
ieiun.*



T ordinem quidem illum omnes lubentissimè qui verè Christiani sunt similiter & audiunt, & amplectuntur, exercitus, iter facientes terrâ, marique, mercatores omnes, adè vt nec insula vlla, nec continens, non ciuitas, non gens, non denique locus vllus tam desertus, vbi hoc ieiunandi

di mandatum non fuerit auditum. Vndè nullus
 jejunantium numero sese subtrahat monet Basi-
 lius; in quo & generationes cunèx, sexus om-
 nis, etas, ordo includuntur. Nihilominus qui le-
 ges tulerunt, eâ vfi sunt prudentiâ, & discretio-
 ne vt nè cui plus oneris imposerent quàm ratio
 ferre posse iudicaret, vt libera remanserit proui-
 dendi, conuiuendique potestas penes animarum
 Curatores medicorum iudicio instructos. Quo
 fit vt in eiusmodi decretis id attendatur, quod
 communiter, & in pluribus accidit. Si quid ex
 speciali causâ, inquit D. Thomas, in aliquo inue-
 niatur, quod obseruantie statuto repugnet non
 intendit talem Legislatores ad statuti obseruan-
 tiam obligare, in quo tamen est discretio adhi-
 benda. Nam, si causâ sit euident, per seipsum po-
 test homo statuti obseruantiam prætere, præfer-
 tim consuetudine interueniente, vel si non pos-
 set facilè recursus ad superiorem haberi; si quid
 verò dubij occurreret, pro dispensatione ad eun-
 dus foret qui valeret autoritate, nempè tutissimâ
 viâ nè ἡ φιλαυτία se ingerat; ceci enim in propriâ
 causâ vt plurimum sumus. Sed hæc est discre-
 tio Ecclesiæ, vt malit ampliùs paulò indulgere
 quàm naturam periculo exponere: ideoque pa-
 titur symbolum vespertinum, collationis nomi-
 ne notissimum, modò illud sobriè fiat, & ali-

D. Thom.

2.2.9.

1.2.7. a 4.

ter longè à cænâ, vel prandio differat, quàm quod mappæ sint breuiores, & reliquæ tantùm quæ ex prandio supererant apponantur: loco etiam medicine, dùm bibendi virget necessitas, frustum per diem conceditur comedere.

Pueri primùm eximuntur in annum primum & vigesimū, assuescere tamen à teneris consultissimum est: etiam senes si annum excesserint sexagesimum, & impotentes sint. Omnibus interim audendum aliquid, tentandęque vires, ut ij qui hæc profitentur latiùs, explicant. Infirmi quoque, prægnantes, quiq̃ue egrotis assunt dùm periculum est, fabri ferrarij, lignarij, agricolæ, & qui graui labore victum comparare debent, qui profitentur, concionantur, confessiones excipiant, modò aliter ea munia obire non possint, peregrinationes necessarias subeunt. Præcipit Gregorius Magnus Rauennâti Episcopo Mariano Hæc: inopto iſi laboranti, ne præsumeret ieiunare, nisi fortè quinque vicibus in anno, videlicet si solemnitas grandis exigeret. Simile scribit Augustinus de Cenobitis, fuisse liberum ut quisque valetudinis rationem haberet, & nō fuisse quenquam adactum ad id, quod ferre non posset, sed abstinentias iſtitutas lege caritatis, & multos inter eos fuisse qui eos ipsos cibos acciperent ægroti, à quibus sani & incolumes temperarent;

Gabr in
4. d. 16.

a. 1. not.

4.

Ros. ver.

jeiun. §

19. Sil

uest. q. 3.

Caiet.

in sum.

verb.

jeiun.

c. 3.

Idem 2. 2.

q. 147.

a. 3. Gab.

in 4. d.

15. q. 3. a.

1. n. 4.

Greg. lib.

9. Indic.

4. Epi-

ſtolâ 28.

Aug de

morib.

Ecleſ.

c. 3. 33.

pat consilio cum diuo Paulo, Timotheo vi-
num modicum imperabat. Interrogatus Ab-
bas Sisoy quomodo inueniri Deus possit, in je-
iunio, an in labore, vigilijs, aut misericordiâ?
respondit in his, & in discretionem. Ex quibus
liquidò colligitur rectè de ieiunio conclusisse
Prudentium,

Prud.
cathem.

*Ergò ne linum fragilem solutæ
Deserant vires, & aquosus albis
Humor in Venis dominetur, ægrum
Corpus eneruans;
Laxus, ac liber modus abstinenti
Ponitur cunctis, neque nos seuerus
Terror impellit, sua quemque cogit
Velle potestas.*

Ieiunandi vtilitates, & commoda.

CAPVT VIII.



VM soleant homines maximè utili-
tate capi, prudenter Ecclesiasticę œ-
conomix administratores, fructus,
& commodarum ieiunij, tum absti-
nentiæ recensent, vt ijs illecti præceptum ie-
iunandi accipiant. Quid verò ieiunio contrà
Damonis exercitum validius, cum nos faciat

Basil.
serm. 2.
de ieiun.
Leo ser.
4. de ieiun.
mo deci-
mi men-
sis.

contrà peccata fortiores, contrà concupiscentiam victores, tentationes repellat, superbiam inclinet, iram mitiget, & omnes bonę voluntatis affectus ad maturitatem totius virtutis enutriat, pueros custodiat, grauem, ac sapientem iuuenem reddat, senem ornet, mulieribus ornamentum aptissimum, vegetorum, valentiumque frenum, coniugij custos, virginitatis nutritor. Necessaria sunt (inquit Augustinus) nobis ieiunia, sicut vulneribus medicina, medelam enim conferunt vitę perpetuę; intemperantiam corporis mitigant, motus aduersos reprimunt, pressuram animę inferunt quę escis, & potu nimio liberata se melius recognoscit. Sicut enim in speculo sordido non se talem homo aspicit qualis est, ita si escā, & crapulā fuerit grauatus alterum se sentit quàm est. Quòd si temperatum fuerit corpus interposito ieiunio, cognitione sui receptā anima intelligit quā deuotione obsequi debeat redemptori: Ieiunium orationem in cælum deferret, donorum augmentum, sanitatis mater, iuuentutis pęlagogus, ornamentum senioribus, iter facientibus optimum viaticum, simul habitantibus securus contubernalis, in matrimonio insidias non metuit, vir vxorem videns ieiunantem, vxor virum idem facientem animaduertens zelotypa nunquàm erit. Quis ob ieiunium

Aug. 7.
ex viro-
que mix-
tā 120.

Basil.
serm. 1.
de ieiun.

propriam diminuit domum, fac periculum, numera hodiè quæ sunt intùs, numera deinceps, nihil videbis ob abſtinentiam diminutum, nullum animalium mortem timebit, nihil ſanguinis ſpargetur, vacabit cocorum gladius, menta paucis, ac facilibus parata cibus ſatis erit, ſtrepitus ceſſabit miniſtrorum; jeiunantis menſa ſæuus non ſapit, cibus optimè, nam orexin excitat, & gratiam cibo conciliat, homini integram valetudinem, ſenſuum, ac mentis ſerenitatem. Catharros etiam ſanari jeiunio, ac corporis procurari valetudinem à diuerſis autoribus proditum eſt. Luber his ſubiicere quæ in eandem ſententiam ſuccinctè, & pereleganter de jeiunio pronuntiauit Ambroſius, ob elegantiam, quanquàm priùs diſta, nullo modo tamen prætermittenda. Eſt jeiunium reconciliationis ſacrificium, virtutis incrementum, quod fecit etiam ſæminas fortiores augmento gratiæ. Ieiunium nescit ſenerator, non ſortem ſænoris nouit, non redolet uſuras, etiam iſtis jeiunium conuiuijs dat gratiam, dulciores poſt famem epulæ fiunt quæ aſſiduitate ſiſtidio ſunt, & diuturnâ continuatione vileſcunt, condimentum cibi jeiunium eſt. Quanto auſtior appetentia tanto eſca iucundior. Et quis dubitet Eccleſiam jeiunio ſummam tribuere vim, & energiam, quæ in publicis precibus pro-

*Ambroſ.
de Eliâ,
& jeiu-
nio. c. 2.*

fitetur animis, corporibusque curandis salubriter
esse institutum? Et obseruantiam, quam corpo-
raliter exhibet, mentibus sinceris exercere desi-
deret, nunc cum epularum restrictione carna-
lium à noxijs quoq, voluptatibus temperemus,
siuè cum per abstinentiam maceiāmur in corpo-
re per fructum boni operis reficiāmur in mente.
Corporis itaque, & mentis utilitatem exspectans
sanctorum Medicorum Cosmæ, & Damiani
confisa meritis, atque suffragijs votiua solemnitate
implorat subsidium, quo fulcita reliquum
quadragenarij laboris facilius percurrat, cuius
media pars non sine iacturâ virium esset supera-
ta. Moueant vnumquemque exempla Sancto-
rum, Hester quæ inde pulchrior effecta se, gen-
temque suam liberauit; Danielis & Sociorum,
quorum, ex abstinentiâ regaliū ferculorum,
vultus mirâ venustatè resplenduerunt. Et vitæ
longæuitas cum aliorum, tum Pauli, & Antonij
Anachoretarum, qui totâ pœnè vitâ tam arctè,
soliciteque ieiunârunt, & nihilominus ille tre-
decim supra centum, hic centum & quinque, Hi-
lariion octuaginta, annorum fuerunt, Epipha-
nius decimumquintum suprâ centesimum tri-
bus mensibus superauit: longè interim seueriore
vsi abstinentiâ, vt liquet ex ijs quæ antè retuli-
mus, quàm modò respublica iam optimis san-
ctionibus

tionibus constituta publico, communique ob-
 stingat decreto. Sed & olim Ecclesiasticus præ- *Ecclesiast.*
 monuit, quod qui abstinentes essent vitam inue-
 nirent. Tradunt etiam tenuem victum parare sa-
 pientiam, & qui illi assuevissent, longè facilius à
 Medicis, cum in orbus vigeret incolumitati resti- *D. Hier.*
 tuti. Sed nè plura de fructibus, & utilitate com- *& Basit.*
 memorem non verborum iterum Aurelium pro-
 ducere breuiter, & dilucidè rem omnem per-
 stringentem,

*Nihil hoc profectò purius mysterio
 Quo fibra cordis expiatur lindi,
 Intemperata quo domantur viscera,
 Aruina putrem ne resudans crapulam
 Obstrangulatae mentis ingenium premat,
 Hinc subiugatur luxus, & turpis gula,
 Viti, atque somni degener socordia,
 Libido sordens, inuerecundus lepos,
 Variæque pestes languidorum sensuum
 Parcæ subactæ disciplinam sentiunt.*

*Nam, si licenter diffluens potu, & cibo
 Ieiuna ritè membra non coërceas,
 Sequitur frequenti marcida oblectamine
 Scintilla mentis ut tepescat nobilis.*

D E
IEIUNIO, ET ABSTINENTIA

Liber IIII.

*Quid ædum? Quid agendum? patet
pestringitur.*

CAPVT PRIMVM.



VPERIORIBVS tribus libris ieiunio inscriptis primùm ostendimus ad medicum spectare munus, quæ in sacrâ disciplinâ salubria, naturæ-que consentanea occurrunt si manifesta designare, sin latentia eruere, & explicare: deindè antiquitate, meritis, exemplis, & splendore eiusdem expositis, tandem, Ecclesiastici circa ieiunium, & abstinenti legem, decreti (quòd hoc opere intendimus) vtilitatem, vitæque prosperæ, & incolumis conseruationem, vim, & energiam ex præclarissimorum sãtricæ professionis, Hippocraticis potissimùm & Galeni principum sententiâ deducere, stabilire, confirmare. Et quidem Ecclesiasticæ sollicitudinis reuerentia exigit, vt quòd diuino consilio institutum, Christianâ industriâ digestum in ordinem, tot seculis humanâ prudentia

dentia acceptum, receptumque diligenti trutinâ expendatur, & quicquid huius argumenti Hieronymus ex fide Hippocrati, & Galeni, Alexandrinus Clemens Antiphanis delij, Basilii, Gregorius, Athanasius, Ambrosius, Epiphanius, Leo, ceterique Patres ex rationibus medicis, tanquam in scholia cōtraxerint, iusto commentario elucidentius, adeoque eorundem pronuntiata medicis esse septa principijs, & hæc vicissim ab illis velut cincta, munitaque cognoscantur, dextrâ, & lævâ vtrinque fauente, hinc humanæ mentis sagacitate, illinc fidei, religionisque radio.

Edendi necessitas à naturâ, discrimen ab ætate, temperamento, & occasione.

CAPVT II.



SAPIENTORIBVS omnibus innouit quod Socrates dicere sæpè solitus est, se viuere non vt ederet, sed vt viueret edere. Edendi autem necessitas ex naturæ conditione profluxit, quæ ex elementorum quatuor implacabili permixtione coacta, caloris quoque innati, atque viuifici perpetuo, & indefesso motu vndequaquæ atteritur, adeoque duplicem iacturam facit, quæ nisi assidue

*Hippoc.
de natura
humana.*

duè sarciatur corporis humani substantia concidit, & euertitur: præcipuè humido genuino, quod calori tanquam pabulum substitutum, & radicale dictum instar olei palcit, & fouet: restituitur vero alimento congruè, oportuneque exhibito, habent enim singula, inquit Hippocrates, edulia & quo prosint, & quo lædant. Et cibi, omnia mala, & bona sunt ad hoc nimirum vel illud comparata, utque variant occasiones, secundum quas ut corpus à corpore, & natura à naturâ, sic nutrimentum differt à nutrimento. Proinde materia salubriam causarum perinde ac insalubriam: Galieno esculenta censentur, à quibus non omnes eodem afficiantur modo, sed lege exhibita (quæ in eo consistit ut vniuscuiusque respondeant genio cum mensurâ, ac qualitate opportunâ) in illorum classem transeunt quæ naturæ seruiunt, integritatemque tuentur, solent a Medicis nonnaturales eiusmodi res appellari, non quod naturæ repugnent, sed quod indifferentes pendeant ab utentis prudenti administratione. Ex quo intelligitur, haud vanum fuisse studium eorum, qui in ea quæ ad nutritionem pertinent mutuo consilio incubuerunt, ne vlla ætas, sexus, natio, professio detrimentum pateretur. Siquidem ex ipsis naturæ primordiis cum semine simul connata necessitas postulat alimentum. Dùm enim in utero opi-

*Lib. de
affectio.
lib. 4. de
morbis.
lib. de
Alimen-
to.
Lib. de
fiatibus.
In arte
parua.
cap. 85.*

*Res non-
naturales.*

fex ille calor velut lacti, aut coagulato cœu Iob
 loquitur, inclusus; & tanquàm araneus terminæ,
 subterminæque diffusis ex tribus velut punctis
 (quæ tria sunt Hippocrati venarum, arteriarum *Hippoc.*
 neruorumque principia) humanæ fabricæ con- *De na-*
 structionem molitur, massam quandã insignem, *turâ fœ-*
 quod decet Oeconomum prouidum, ex quâ an- *tus.*
 nonam, sanguinem puta incolatus illius tempo-
 re quantum laus sit ad formationẽ, augmentum,
 & vitam haurire queat, licet aliter initio dùm em-
 brio est plantarum ritu atque iam sentiente, &
 motrice facultate tandem productã, consumma-
 taque machinã: nam tunc organa accommo-
 dat sibi, sugere enim tunc puerum in vtero com-
 primentem labra ex vtero matris, annotauit
 Hippocrates ὁ δὲ παίδιον, inquit, ἐν τῇ γαστρὶ *Lib. de*
 συνεχὸν τὰ χεῖλεα μύζει ἐκ τῶν μηρέων τῆς μητρός. *carminib.*
 Quanquàm diuersã ratione sugat quàm dùm
 calcitrando in lucem eruperit, quandò arreptã
 papillã lac ore transmittit, in vtero (licet Dio- *Observat.*
 cles apud Soranum, vt refert Fallopius, secus *anot.*
 sciat) papillæ non sunt per quas fœtus discat *quomodo*
 trahere. Deindẽ vt sint, eas fœtus membra- *regant*
 nã (cuius pars abrupta galeam, aut vittam *fœtus in*
 vulgò dictam, facit) inuclusus attingere nullo *vtero.*
 modo potest, sed labris extrorsum porrectis
 prorsus aliter, sc̃pto transuerso sursum attracto,

Galea
fœtus.

coarctatisque pulmonibus expirando vacui fugâ per vmbilicum ductu longissimo ex dictâ maffâ, quam doctissimus Aurlantius placentam appellatam ab officio jecur vterinum nuncupauit, elicit alimentum, sic enim viuit puer sanguine de matre in vtero, & quali mater est sanitate prædita, talem etiam puer habet, vt sæpè nutrimem mutare necessum sit. Sed & à lactis vsu ad solidiora faciendus transitus. In ceteris ætatibus pro caliditatis, & frigiditatis, humiditatis, & siccitatis varietate alimenta varianda, & experientiâ constat, & à præstantissimis autoribus Medicis Hippocrate de Diætâ, Galeno de sanitate tuenda, alijsque locis innumeris, nè pluribus recensendis fastidiosum, accuratè est demonstratum. Ceterum edendi nobis desiderium natura insecuit, pariter & industriam.

*Simplex victus salubrior; lauti, & edaces Cynici,
non Epicurei. Eduliorum citò quedam,
tardè alia concoquuntur.*

CAPVT III.

QUANDO ergò edendum est vt viuamus, & fluor substantiæ perpetuus reparandus sit, in eo sic quisque se gerere debet, vt dignitatis Christianæ, nunquam oblitus videatur, monitus maximè hoc Poëtæ,

Proo

Hippoc.
de natu-
rà pueri.
Galen.
de sani-
tate
tuenda
l. 1. c. 12.

Pronaque cùm spectent animantia cetera terram,

Os homini sublime dedit, cælumque tueri

Iussit, & erectos ad sydera tollere vultus,

vt sit non mens humo affixa, sed in sublime feratur, nec cogitemus caduca, vilia, quæque animum satiare non valent, ad æterna verò contendamus, ideoque semper pietatis, & religionis officijs intendendum vt nostræ petitiones sine intermissione innotescant apud Deum; quæ non verbis peraguntur solùm, verùm etiam omnibus quæ in obsequium nostri Conditoris, fidei deuotione gerimus. Ad hanc sanè philosophiam quisque se disponat, vt neque naturæ nimium indulgeat, neque detrahat vnde in suâ peregrinatione retardetur, aut fatiscat. Pulchrè sanè, & grauiter Seneca Placet cibus quem non parent familiæ, nec spectent, nec multos antè paratus dies, multorum manibus ministratus, sit parabilis, facilisque, nil habens accersiti, prætiosum, vbi libet non defaturus, nec patrimonio grauis, nec corpori, nec redditurus quàm intrauerat. Quàm in parte ligurionibus, qui sibi nullum vitæ modum præscribunt Epicurus longè præferendus esse videtur, cùm in eam planè curam incubuerit, quàm ab omni dolore, atque molestiâ corpus tueretur, ac proinde quæ suauiter afficerent auidè assumeret eâ temperatione quàm faciliè voluptate frueretur,

L

atque

*Beda l 3.
c. 38. in
Marc. 9.*

*De vitæ
tranq.
lib. 1.*

atque idcò lurcones, & gulæ dediti, dùm sese ingurgitant, immeritò Epicurei dicendi, quin magis Cynici, canum instar ad vomitum, sordelque redeuntium, ceteris ferè animantibus brutis naturæ circà cibum definitione contentis. Quod itaque Pædagogus antè monuerat, vt christianus cibo simplici vteretur, non ferino, scù glandibus, herbis, fructibus, fæno, & sponte terrâ nascentibus, quorum perniciēs coëgit alia edulia multâ industriâ cogitare, medicâ ratione planè nititur. Quemadmodum enim in amplâ familiâ œconomus quispiam, quo minùs implicatur sua munia felicius exequitur, contrà in varia distractus turbatur, & obruitur: ita calor natiuus, qui in humanâ œconomiâ gubernacula tenet, vniformem victum promptius, & accuratiùs superat, & concoquit: diuersum verò aut difficulter, aut malè. Quod apertissimè Aëtius docuit his verbis: varietatem vitare melius est, & præsertim si ex contrarijs sint facultatibus, nam accepta non conuenienter concoquantur. Quædam namque sunt edulia quæ breuissimo tempore, & sine negotio subiguntur, quædam tardè, magnoque labore, quæ si simul in corporis lebetem stomachum demittantur nullo seruato ordine, leuioribus percoctis duriora vix ἐψήσιος, siuè elixationis aliquem consecuta fuerint gradum,

*Aëtianus
lib. 3.
cap. 13.
Aët. tom.
1. serm. 2.
cap. 239.*

dum, vt vel indè quæ percocta fuerint ex diuturniore in ventriculo (qui non libenter nisi planè opus confecerit portionem dimittit) morâ comparantur, quodque residuum & ipsa inficiant : quinimò itomachi tenorem maximè solet labefactare imprudens, & temeraria eiusmodi ciborum ingestio.

*Simplicitas moderatam varietatem non excludit,
præsertim in condimentis.*

CAPVT IIII.

NATURA ita comparatum est, vt ille quicquid exceperit sic amplectatur, vt arctissimè ex omni parte comprehendat, nimirum conuertendum in succum, siue cremorem equabilè, lacteo, cādidoque colore simili tingēdum, χλόν Græci vocant, ex hoc sanguis conficitur, cuius fortuna ab illo sic pendet, vt vitium quodcunq; in ventriculo contraxerit, nullo subsequentium partium studio, conatuq; vnquam reparari possit; quod vulgò dicitur, cōcoctiones posteriores priores non corrigere. Attamen simplex omninò victus intelligēdus non est, quasi præter vnicum ferculū nihil liceat comedere, cū natura, vt ipsa ex varijs constat,

*Hipp. de
diet. lib. 1.*

ita commodâ quadam varietate & gaudet, & recreatur. Si enim similia omnia facerent coci (inquit Hyppocrates) non haberent cibi delectationem; sed temperanda est ea opinio, quia sufficit alimenta non nimium discrepare: piscium, & carnum promiscui missus excusari non possunt: interea parum est si modicum quid huius, illiusuè generis palati gratiâ degustetur, quod etiam

*38. Apho.
lib. 2.*

*Auicenn.
l. 1. fen. 3.
doct. 2.*

Hippocrates concessit: paulò, inquit, deterior cibus, aut potus, sed suavior melioribus, sed minus suauibus est preferendus: & Auicenna inquit, nutriens melius est quod melius sapit, prout enim gravior fuerit tum elementari qualitate, tum proprietate substantiæ, eo auidius arripitur, & promptiorem experitur conuersionem; verbi gratiâ, assa elixis coniungere simplicitati non repugnat, nisi etiam pastitia accedant, si uero alia infarta, & magirico fuce adulterata, ex quibus nihilominus modicum à melioribus ita vinci potest, ut sine scrupulo dicere liceat, parum non nisi parum nocet, si noceat. Hinc quoque non excluduntur condimenta, embammata, intinctus, eiusque farinæ alia, quibus cibi vel fiant præstantiores, vel sapidiore ad orexin excitandam, quod in pisculentis accidit, circa quæ Rondeletius plurima annotauit, ex aceto, omphacio, aurantiorum succo, croco, myristicâ, garriophillis, pipere, similibusque

*Galien.
aph. lib. 2.*

*Rond.
de piscib.*

libusque pro cuiusque piscis naturâ condimentum accommodans. Panis item obsonio necessarius ut firmior, stabiliorque reddatur chylus.

Cœne auspicia cum bellarijs: ciborum neglectum præsertim in præmandendo, quæ sequantur incommoda.



CAPVT V.



D. hæc salubriter mensarum auspicijs olera, fructus, lactucæ, ficus, vux, alui emolliendæ, ut alia, intemperiei partis cuiuspiam occurrendæ gratiâ, præmittuntur: & bellaria, tragæ, biscoctus, corni, cydonia, pyra, & caseus ipse ventriculi orificio claudendo, firmandoque, vaporibusque reprimendis idonea refectionem finiunt, quod Horatius innuit,

——— *Ille salubres*

Æstates peraget qui nigris prandia moris

Finiet

*Gal. de
sanit.
tuendâ
lib. 6. c. 8.
Horat.*

Adeò lata est victus simplicitatis norma ab ipsis quoque Patribus indulta, quibus ad eum modum Medici consentiunt, cum & experientiâ constet enormi ciborum varietate, & incontinentiâ ventris dolores, & capitis, oris graueolentiam, & corporis κακοχυσία innumerorum

lernam morborum suscitari. Etenim

*Q. Seren.
Samo.*

Nominiquàm existit subiti noua causa doloris

Cuius origo latet;

quæ sanè ingluuici sæpissimè tribuenda, ad quam haud temerè adieceris neglectam nutrimento- rum præmansionem, cuius utilitatem adco ex- tulit Galenus, vt non immeitò concoctionis in ore factæ speciem præ se ferat quæ chylicationi necessaria habetur præparatio; de quâ verè dici- tur, quòd cibus bene præmansus sit magnâ ex parte coctus: contrà verò voraces minùs viues- re, quòd vitient radicem totius nutritionis bolis durioribus spreto palati, dentiumque vsu ventriculum exasperantes: color indè luridus ar- guit sanguinis impuritatem, & spirituum, qui ca- lori in actionibus vbique subseruiunt, crassitiem, caliginem, & tarditatem, causam sæpissimè fe- bris, apoplexiæ, vel tabis. Ex pueris sanè intelli- gi potest, quid, quantumque valeat nutritionis sim- plicitas, quæ certo interuallo accommodata obe- sulos, viuidos, ac bellè valentes facit, cùm contrà perditos, & ad ingluuiem educatos, perpetuoque de missuum varietate anxios, fastidio quodam vitam trahere videamus.

Excessus

Excessus omnis noxius. Ventriculus regi, horologioque comparatus. Helluones notati.

CAPVT VI.



ISDEM morbis, alijsque non minus grauibz cibis plus æquo sumptus, vt vires opprimat obnoxium reddere, ipsi quoque medici seriò indicârunt. In ventre difficultatem spirandi, & crudam deiectionem, Græcis λειντερία, in genere venoso obstructions, & varias febres, in habitu corporis ἀτροφία, extenuationem, phymatum genus omne, lepram, scabiem. Ad hæc insomnia, nocturnasque molestias; vt alia præteream effectu nota, colore, tumore, doloreque, & ex accidente, quæ ab illis subleuat incommodis, sanatione. Nàm vomitu, ventriculi satietas; vasorum repletio, sanguinis eductione; totius corporis grauitas, sudoribus tollitur. Rectè igitur à Galeno, Senis sententiam in epidemijs interpretante, refertur, non repleri vsque ad saturitatem, impigrumque esse ad exercitationes, salubris victus caput esse. Actuarius quoque assumendi cibi vniuscuiusque modum præscribit, quo nondum satietas ceperit: sic enim, inquit,

Lib. 6.
commenta.
4. Aphor.
21.

Cap. 9.
de spir.
anim.
nutrit.

exsuperans natiuus calor cibos qui in ventriculo continentur confecerit. Ex quo natum est salubre Medicorum præceptum vulgò celebratum, à mensâ cum fame recedendi ; sic nimirum vt ventriculo satis quidem factum sit, non tamen ita turgcat, vt capere amplius nequeat, siuè conceptaculum, capacitatemuè, siuè facultatem, molestiamuè spectes ; vtrumque enim offenditur, quandò fibrarum, quæ instar funiculocum quibus crumenæ contringuntur, circà chylum contractio ad concoctionis felicitatem imprimis necessaria impeditur. Orexis certè, siuè appetendi sensus qui in ore ventriculi à ieiunis percipitur, non omninò exstinguenda est, quin potius alio quod eius momentum relinquendum quasi adhuc vigentis naturæ inditium, nè vlllo tempore quiescere vis illius hâc in parte videatur, quæ in corpore non exiguum obtinet dominatum. Si- quidem,

Q. Se-
ren. Sa-
mon.

*Qui stomachum Regem totius corporis esse
Contendunt, verâ niti ratione videntur:*

Huius enim validus firmat tenor omnia membra:

At contrâ eiusdem franguntur cuncta dolore;

Quin etiam (nisi cura iuuat) vitare cerebrum

Fertur, & integros illinc auertere sensus.

Sed & hoc quoque orexis illa commodi præstat, quòd instar clepsydre cibandi oportunita-

tem

tem suggerat, & veluti lineæ index ex horologio, edendi vicissitudinem notat cuius progressio non debeat sisti, sed in perenni motione foueri. Quemadmodum enim horologium, si prorsùs libramenta decurrere sinantur, torpescit; etsi crebrius id accidat rubigine obducitur, & sordescit; ita stomachus ex frequenti oppletionē velut obdormiscens lentis, ac prauis humoribus inficitur, ex quibus fastidium, & nausea procedunt, tardiorque fames recurrit, & tandem spirandi quoque difficultas enascitur, vt proindē sicut limā horologij ferrugo deterenda, sic medicamentis tūm incidentibus, tūm detergentibus, & purgantibus in stomacho vitiosa colluies venit deradenda. Quapropter Clodium Albinum miror, qui in cenā centum campana edebat persica, vuarum cabicanarum pondo 20. ficedulas 100. ostrea 40. quingentasque ficus. Maximum minorem, qui vini amphoram bibebat, & carnis libras 11. comedebat. Aglain verò tibicinam magis, quòd carniū minas decem, chænicasque panis quatuor mulier absumeret. Quædam nostro æuo 80. porros grandes crudos comedit. Quid? duos olim noui Louanij pernis pestes, labes larido, sumini absumedines, callo calamitates, imò lanijs lassitudines, & porcinaris, qui totum cum carne carnarium poterant detur-

*Cardan.
de rerum
variet.
lib. 3.*

*Plaut.
Capti.*

barenam petasomem, armum ouillum, & plures libras carnis vno ientaculo expedire illis erat pro ludo: alterum giganteâ mole memini etiam creuissæ pocula quatuor adiunxisse & viginti: alterum in edendo superiorem, sic quidem vt nihilominus in prandio neque ieiuniosorem, neque magis refectum fame (vt pergam cum Comico loqui) quenquam inuenisse licuisset. Sani interim erant ipsi; sed proles habebat edacior choeradibus, glandulisque (quod suis familiare est) valdè obnoxias, & afflictas. Rarum hoc est, quòd in se ipsi nil lucrint, quandoquidem fortunæ sæpius abdomen, & pinguem aqualiculum, qui propenso sesquipede extabat, coëgerint vacuum constingere, & vnâ ingluuiem longâ eluritione compensare: tanti centè valet carere posse, & abundare. Phagum hominem mensæ Aureliani adhibitum (autor Flavius Vopiscus) vno die aprum integrum, 100. panes, veruecem, & porcellum comedisse.

Flavius
Vopiscus.

Hora-
tius.

— — — — — *Quanta est gula, quæ sibi totos*

Ponit apros!

Sueton.

Milo Cratoniates, teste Theodoro carniû minas 20. deglutivit & totidem panis, quadrimum solus absumpsit taurum, quem per stadium suis humeris retento anhelitu portauerat. Heraclides nepotû altissimus gurgis, Vitellium imitatus, nullâ

inter-

interpositâ morâ per ientacula, prandia, cēnas, & comessationes solus omnibus inuitatis sufficiebat. Astidamas Milesius ab Ariobarzâne ad conuiuium vocatus, quicquid ceteris paratum fuerat ipse deuorauit. Timocreonti Rhodio inexplēbilis ventris ingluuies vicio vertitur, vndē illi hoc inscriptum Epitathium.

Multa bibens, tūm multa vorans, mala deniq̃ dicens

Multis, hīc iaceo Timocreon Rhodius.

Verūm his fruges consumere natis ventriculus pro sacculo est, vt qui mergos imitentur: quos omnes non diū, aut infelicitē, & abiectē viuere, aut miserē aliquandō perire periculum est. Exempla plurima sunt, & inter cetera, Audebanti regis Anglorum, qui conuiuiū quodam exceptus tantūm cibi, & potus deglutiuit vt eo suffocatus repentiē animum efflauerit.

*In Annalib.
Ang.*

Materia alimentorum tripartita. Quæ fortibus, debilibus, & mediæ dispositionis conueniens.

CAPVT VII.

PORRŌ non solūm alimentorum cōpia grauat, verūm etiam eorundem vis, atque potentia; vt si ex ijs fuerint quæ valentiū, & plus nutrant, multo antē expletam appetentiam, ex Actuarij consilio

*De fir-
animal
nutri.
c. 2.*

abstineamus, eorum verò quæ parùm, ac leuiter alunt, liceat plus ingurgitare, siquidem illa diutius concoqui possulant, hæc facilius demittuntur.

*Cor. Cels.
l. 2. c. 18.*

Cornelius Celsus alimenti materiam in triplici ponit discrimine, id validissimum vocans in quo plurimum alimenti est, velut in carne, pane, & piscibus maioribus, ouis doris: imbecillimum, minimum nutrientia, olera, poma, cochleas, fructus: medium, pastinacas, rapas, & auiculas leuiiores, mediocresque pisces. Neque verò in generibus rerum tantummodò discrimen est, sed in ipsis etiam quod ætate sit, membro, solo, cælo, habitu: corporibus enim animalia magis nutriunt, minùs extremis, vnde in proverbio est

*Languenti caudam, medium melius comedenti,
Sed caput Abbati dederis;*

& quæ magis exercentur salubriora: hinc pisces rapidi fluminis, & moderatè habiti præferuntur, quique bono, & salubri alimento vtuntur. Sed execrandum est quod historiæ prodiderunt, Vidium Pollionem seruos in Piscinam coniecisse, vt sanguine humano pasti pisces essent delicatiores: stolidius multo Aristoxenum Cyrenæum, lactucas vt luxuriosiores crescerent mulso vespere rigasse. Itaque materiæ genus pro viribus, & modus omnibus pro genere æstimetur, imbecillisque hominibus rebus infirmis opus est, medio-

mediocriter firmos media materia optimè sustinet, & robustis apta validissima est. Plus deinde aliquis assumere ex leuionibus potest, magis in ijs quæ valentissima sunt temperare sibi debet. Quæ enim ex valentissimis, ac plurimum nutrientibus cibis contingit satietas, Græci *πλησμονήν* dicunt, perniciosior est, quod vulgari prouerbio dicitur, omnis repletio mala, panis autem pessima.

Vt commodius ieiunetur frugalius Bacchanalia celebranda.

CAPVT VIII.



VÆ cùm ita se habere experientia doceat, eo magis insanire censendi sunt, qui potissimum Bacchanalibus ventrem ad buccas certatim ouis induratis, calentibus è furno panibus, moretis, *τροταρίχοις*, eschariticis, prætereà isitijis, lucanicisque se infarcire contendunt, quasi singula non satis officerent, nisi eius generis plurima & simul, & confertim intrudantur, veluti instantem eseriem vallis, & mœnibus exclusuri. Stultius nihil excogitari potest, quod eos & imaginatio, & timor de abstinentiâ magis ad appetendum moueat, & ciborum cruditas ventris orificium sti-

mulans, & vellicans edendi desiderium excitat, caninum appetitum refert non sine molestiâ, sæpè enim durare non possunt, donec euomant, & à nouo demùm cibo remedium petant. Ac tantùm abest, vt voti compotes efficiantur, vt malorum aceruo oppressi, colicas, choleras, febres, κεφαλαλγίας, aliasque calamitates experiantur, & denique nihil minùs possint, quàm ieiunare. Quocircà Medicorum sententię conformem videre licet cam quâ Basilius vult agredientem ieiunium antè se ad continentiam præparare, quòd natura ab vno extremo in aliud subitam mutationem quàm maximè auer-

setur: vndè Celsus; neque ex multâ fame nimia satietas, neque ex nimiâ satietate fames idonea est. Sed quod paulatim fit, Senex ait, tutum est, iùm aliàs, iùm cùm ab altero ad alterum transitus fit, omne enim nimium naturę inimicum. Aui-cenna idcirco sic scripsit: nihil est deterius saturitate in tempore fertilitatis, quam fames sequitur in tempore sterilitatis, & è conuerso.

Basil.
serm. 1.
de ieiun.

Celsus 3.
lib. 2.

Aphor.
51. l. 1.
Arist. 7.
polyt.
Hypoc.
7. Epi-
dem. Gal.
in arte
parnâ.
2. viii.
acutorum
Aui. lib.
1. fen. 3.
de Abstin. 2.

Frequen

*Frequentior comessatio, & concoctio inter-
rupta periculosa.*

CAPVT IX.

RÆTEREVNDVM hîc non est, quod frequentior per diem comessatio non omninò ad salubritatem securâ sit, dùm præcedens concoctio à succedente pastu interpellatur: vixque non inde contingit saturitas, vbi missuum varietate pellectis, bolum bolus trahit, & incautè irrepit copia postmodùm deploranda. Quis ferat ientaculum, prandium, merenda, cenam cum appendicibus, Itarijsque gustationibus genialiter toties repetitis, quando hinc ita prematur natura ut si suffocetur, & non rarò consequatur aut hydrops, aut immatura mors. Certè, ut senex ait, somnum difficilem, insomniaque conturbata, ac tumultuosa, experiuntur qui in ventrem feruentem adhuc, & fermentatum, novos cibos ingerunt: quod etiam Clemens Alexandrinus prudenter animaduertit. Ceterùm cibi redundantie, quæ satietas dicitur, humorum repletionem, & corporis molelem succedere manifestum est, quæ si excreuerit ad summum, quantumuis prauæ qualitatis

*Hipp. de
medici.
veter.*

*Clem.
Alexand.
pedag.
ωλη-
bos,
πληθω-
σα εὐε-
ξία.*

expers, velot in athletis, periculosa est, ob metum ne vasa distenta dehiscant, aut disrumpantur, vnde inflammationes, & hemorrhagiæ, id est, sanguinis profluxiones, syncopes item ob universalem obstructionem insitum calorem extinguentem: si breves quoque ex putredine, quod talia corpora sint disdiaphoretica, imperitiaque: apoplexiæ etiam, & aphoniæ repentinæ, ob carotidum, & venarum interceptionem, quâ spiritus aditu ad cerebrum prohibetur. Eiusmodi ergo habitus, si præter modum impleatur, ut locum natura non habeat, quo apposita contineat, adeoque tum ad melius accessio fieri nequeat, dum ea naturæ vis, ac genius sit ut id conserpare conetur quod habet, nec vnquam quiescat à concoquendo, distribuendo, assimilandò, ob *ἐντελέχειαν* iacturam patitur, & suæ œconomie

*Hipp. l. 1.
aphor. 3.*

inevitabilem ruinam, quam Medicorum Corypheus olim prædixerat hâc brevî sententiâ. Habitus exercitatorum qui ad summum bonitatis pertingunt, periculosi si in extremo constiterint, neque enim possunt in eodem permanere, neque quiescere, neque possunt proficere in melius, reliquum est ut decidant in deterius. Non temerè est, quod ad bonum habitum qui in summo est, hoc discrimen referatur: agricolarum tamen bonus habitus agris colendis, conferendis-

*Plenitudo ad
vass.*

quæ

que, laboribusque similibus comparatus tantum absit, vt in vitio censeatur, cum ipse vnde quaque laudabilis sit. Periculi autem illius magnitudinem ex eo colligas, quod plenis velis in eius solutionem contendat, quæ etiam vbi solum vires grauantur est molienda.

Plenitudo ad vires.

Atque hæc tandem sic explicata sufficiant, ex quibus iam liquet satis, nihil quod ad abstinentiam, frugalitatemque, quam Ecclesiæ legislatores in Chriistiano homine requirunt, frustra impositum, sed omnia vt honestatis, sic salubritatis esse plenissima. Fateor multa huius argumenti præclara haberi & documenta, & præcepta, quæ tamen tædij euitandi gratiâ lubens præterij, certo inductus nihil esse sic dictum quod hâc interpretandi methodo, virtute non sit comprehensum.

Cibi quâ mensurâ sumendi?

CAPVT X.



N eo magnoperè commendandi, qui Senatum Ecclesiasticum retulerunt, quod ceteris rebus tam sapienter, prudenterque dispositis, ciborum mensuram liberam reliquerint. Quanquàm enim Aëtius in cibo ex communi Medicorum

*Cap. 24.
lib. 3.
serm.
primo.*

N

sen-

sententiâ multitudinis etiam adhibendum modum docuerit, & mensuræ maximè omnium diligentem respectum habendum, nihil aliud cogitauit, quàm appetitum refrenandum, neque plus quàm vires tolerant accipiendum, persuadere. Siquidem vir ille doctissimus à communis præceptoris dogmate recedere non potuit, qui in illius scriptis tam nauiter esset versatus, is siquidē libro de veteri Medicinâ, vbi de sorbitionibus, & cibis solidioribus, de diætâ ægrorum pariter & sanorum, fame quoque, & repletionē grauissimè dissēruisset, tandem scribit; Oportet modum aliquem coniectare: modum autem, neque pondus, neque numerum aliquem ad quem referas agnosces; certitudinem enim non reperies aliam quàm corporis sensum; quia qui valent, facilè tantum concoquunt, quantum appetunt, vt præside, vel admonitore non egeant, qui singulorum quæ assumuntur quantitatem metiatur, vt, nisi prauo impetu assueuerint abripi in voluptates, facilè cuius sufficiat. Hanc iustam, ac unicuique peculiarem, & congruam mensuram, & quantitatem quis exprimat? Ex virium enim conditione ipsius quantitatis designatio pendet, quæ in infinitum variant, tum per singulos homines, tum per ætates, constitutiones, regiones, cæli status, & tempora. Nemo enim ignorat alios plus cibi requirere

*Hypoc.
lib. de
veteri
medic.*

*Gal. in
arte par-
uâ l. 2. de
sanit.
tuenâ
q. 14.*

quirere, nonnullos exiguâ portione mox satiari, pueros amplius conficere, senes cibum modicum exigere, eumque ad summum, Hyppocrate teste, transmutatum, & bene percoctum, vbi iuuenes faciliè, & leuiter putrefactû, & crudiolem, duriolemque superant, atque vincunt. Sic Asiatici moderatiore, Iapones parco, Europæi liberaliore alimento vtuntur: hyeme & vere ventres calidissimi, pluri nutrimento indigent, æstate contrâ non tantoperè appetunt. Moyſes quidam apud Caſſianum, maiores ſuos frequenter de optimi cibi quotidiani modo diſcutientes audiuit, qui ob varietatem eorum, quibus monachi vitam iugiter exigebant, præpoſuere cunctis illis, reſectionem ſolius panis, cuius æquiſſimum modum in duobus paximachijs ſtatuerunt, quos (inquit) paruulos panes vix libræ vnus pondus habere certiffimû eſt: Cui ſubiunxit Germanus, nos hoc grataater amplexi, reſpondimus; hunc modum nos minimè pro continentia reputare, quippe qui integrum cum nequaquam poſſemus inſumere. Adeò quòd alterum paximachium in veſperam nonnulli reſeruârint aduenturi hoſpitis gratia. Satiùs tamen tùm iudicatum eſt huius continentia modum generalem ſtatuerè, vt ſecundùm capacitatem virium vel corporis, vel ætatis, tantùm ſibiſmet cibi vnusquiſque concedat

*Maſſæ
hiſior.
Inaic.*

*Collat. 2.
c. 12.*

*Paxima-
chium
quid?*

quantum sustentatio carnis, non quantum desiderium saturitatis exposcit. Ex quo liquidò patet Ecclesiæ discretionem Medicorum normæ adamussim respondere: cum nè Monachos arctiorem vitam professos hâc in parte voluerit constringere. Vndè rectè Basilus: quantum (inquit) ad cibos, prout usus deposcit, vel labor, vel robur corporis est: non enim fieri potest vti omnes vnum ordinem, ac modum, vel regulam custodiant: sed immutari oportet mensuram per singulos in quibus causa aliqua diuersitatis existet.

Basilus.

DE



D E
IEIVNIO, ET ABSTINENTIA

Liber V.

*Alimentum priusquam nutriat multipliciter trans-
mutatur; nullumque est tam simile, quod nihil
contineat secernendum.*

CAPVT PRIMVM.



Y PPOCRATES (de quo Galenus *Lib. 1. de t^{is} part. 2.*
testari non erubuit, κακῶς ἡγοῦνται, οὐδὲν ἔχοντες ἐμπίστευτον) conscri-
pturus dietam humanis corporibus
salutarem, primùm monuit cibum, potumque
officere homini, nisi etiam laboret: contrarias e-
nim (inquit) inter se vires habent cibi, & labores,
verùm inter se mixti conferunt ad sanitatem.
Nàm exercitationis proprietas est, eorum quæ
insunt consumptio; cibi autem, & potionis, eo-
rum quæ dissipata sunt, restauratio. In hoc mu-
nere calor genuinus, quanquàm fatigari non
possit, quòd cælo trahat originem, mirum tamen
quantùm negotij subeat, quàm singulis partibus
nutrimentum variè transmutatum pareat, non so-

lùm ob nutrimenti diuersitatem, verùm etiam
 corporum. Nàm corporũ alia alijs perua magis,
 & alimenta ad concoctionem minũs difficilia.
 Nullum interim tam facile est, ac familiare, quod
 non aliquã ex parte facessat negotium, & alieni
 quippiam contineat, quod debeat secerni. Aduer-
 tunt in metallorum præstantissimo Chymici,
 qui aurum operantes tundunt, lauant, molli g-
 ne liquant, forti autem non conflatur, vbi verò
 elaborârunt ad omnia vtuntur: vtq̃ue auctoris
 Coi paræmiæ insiltam: vt pellium tinctorum ten-
 dunt, terunt, pectinant, lauant; & fallones tran-
 sfigunt, calcitrant, feriunt, destruentes tundunt,
 trahunt, destruentes robustiora faciunt, deraden-
 tes supereminetia, & attexentes, pulchiora red-
 dunt: sic, ceteris omissis, homo frumentum tun-
 dit, lauat, molit, & vbi igni coxit, vtitur. Sic ca-
 lor ille æconomus, qui naturæ nomine gaudet,
 alimentum quantumcunq̃ue benignum, & suc-
 co præstans aggreditur, ac molitum dentibus sa-
 liuaq̃ue subactum, ventris lebere coquit, demis-
 sum cribrat, colatq̃ue per intestina, hepaticæ
 tradit per meseraicas manus, siue lactantes ve-
 nas in sanguinem conuertendum. Inde quod se-
 questratur instar furfuris deijcitur, σκύβαλον ap-
 pellatione; à sanguine verò biliosa pars proprio
 folliculo abstrahitur, pars cùm sero à renibus e-
 mulge-

*De diet.
lib. 1.*

*Nomen
naturæ
calori na-
tuo etiã
tribuitur.*

mulgetur: limosior autem tanquàm cœnum ab-
 ripitur à splene. Denique sanguis per venas di- *Hypoc.*
 stributus quasi collutratus, agglutinatusque su- *4. de*
 dorem, & sordes, hyeme maximè conspicuas in *morb.*
 cute relinquit, priusquàm perfectè assimiletur, &
 in substantiam transeat. Sed in cauitatibus quo-
 que corporis, cerebro potissimùm, muccus faci-
 lè colligitur, siue pituita, quæ hybernis tempo-
 ribus se prodit. Vt vno verbo dicam, confirman-
 tur hæc præceptoris Medici sententiâ libro de *Hypoc.*
 Morbis; nullum est planè nutrimentum, nec pa- *lib. de*
 nis ipse, nec aqua, è quo calor eam varietatem *morb.*
 non eliciat. Multa quoque à Galeno in eam sen-
 tentiam dicta sunt, quæ breuitatis ergò preter-
 mitto.

*Corpus necessario senescit, & ab ali-
 mentis teritur.*

CAPVT II.



ETERVM non solùm à cibis
 machina corporis per reactionem
 (vt vulgò dicitur) patitur, verume-
 tiam alteratur, & assiduitate iacturam
 accipit, quantumuis non ita citò, sed sensim de-
 prehendatur; quemadmodùm

Gutta cauat lapidem non vî, sed sæpè cadendo.

Atteritur igitur, & ipsorum nutrientium succorum attactu per singulas permutationes necessario senescit, quanquam enim à visceribus tandem vincatur nutrimentum, eorumque similitudinem suscipiat, chylus scilicet albus fiat, sanguis ruber, & sigillatim per singula agglutinationis momenta, partium quibus affigitur colorem induat: nihilominus id sine luctâ contingere nequaquam potest, resistendoque vicissim vim suam in corpus exercet. Quare meritò Galenus medicum quendam Aegyptium risit, qui senectutem se prohibere posse, quam nec effugere potuit, iactitabat: nam octuagenarius strigosus, & marcidus è vitâ migrare fuit coactus. Siquidem mortalium cuilibet præfinitum est certum viuendi spatium, quod omninò prorogari non possit: haud secus ac in clepsydrâ pulvisculus ad horam quidem decurrere valeat, aut in lampade lychnum cum oleo tanto tempore flammę nutriendę sufficiat, cum neutrum eâ mensurâ diutius durare quacunque industriâ queat, licet vtrumque facillè intercipiatur, turbetur, & euertatur, ad eum modum homini præstituti termini sunt, qui præteriri non possunt, quantum enim ingenitum pingue, siue (vt vocant) humidum radicale potest, tantum vita hominis manet, nam

calor

calor ille viuificus, quamdiù salubre ipsi pabulum suppetit, inciscatus; stationem non deleat, nisi aliundè pellatur, vnde præmaturè contingit mori, & (vt ille ait) obitus ante diem. Quemadmodum autem, quo lucernæ oleosus fomes purior fuerit, eo flammam habet lucidiorem, constantioremque; ita sanè accidit in vitâ, in quâ functiones omnes pro caloris, & humidi infiti conditione se habent; vt pro copiâ, & synceritate huius, ille quasi splendere, coruscare, ac vigere videatur; quin seipse tuetur, genuinumque illud suum nectar, quod ab ortu sortitus est, non secus; ac si præstantissimum balsamum, aut merum ambrosium ex alieno succo instaurans, & protrahēs, ritu prudentissimi œconomi, sollicitè pretiosam annonam, quâ ratione possit, producens, cuius suauitate quàm diutissimè perfruatur. Eo nomine alimenti sufficitur materia conueniens, quæ neque ineptâ farragine, neque incommodâ copiâ caloris entelechiam, ac operationem remoretur, interturbet, aut euertat; sed tantum offeratur, quantum facilè concoquat: quæ sola est certior alimenti ad calorem proportio, qui alioqui non magnoperè offenditur, modò non prorsus vitiosa, sed quæ vincere possit, offerantur; inter quæ familiaria præstant, & consueta. Campanienses Brabantix aterrimo pane victitant, Le-

mouicenses in Galliâ, pane è castancâ, solis tantum Dominicis frumentacco vtuntur. Et Calabria frugalius, ac sordidius pasci, quod laboribus se vehementer exercent diu admodum viuunt. Ex his colligitur in corpore humano plurima, & varia superuacanea, & aliena congeri, tum ex parte alimenti quâ dissimile est, tum corporis, quod attritum labefactatur, vt minus perfecte obcundis functionibus idoneum sit; imò, nisi opportunè euacuentur congesta, obstruant, opprimantque, & ea tandem inuolant quæ SS. Leo, Athanasius, Gregorius annotârunt. Quibus occurri tradunt medici opportunis exercitijs, hæc enim duo conferunt potissimum, humores superfluos euacuant, & membris conciliant robur, & ευφροια.

Exercitium non semper esse oportunum. Ieiunium etiam euacuare, & quidem securius.

CAPVT III.



MINIMUM quidem exercitationum commune illud est, vt animanti caloris incrementum ex ipsis excitetur; additque Oribasius, laboriosas, membra organica præparare, & robustiora ad actiones, ad validdissim.

*Synop.
lib. 1. c. 2.
& 3.*

diffimam alimenti attractionem , promptissimamque alterationem , & meliorem appetitum propter excitatum calorem reddere , meatus purgare , & vehementi spiritus impetu excrementa expellere. Sed cùm in exercitijs differentia insignis habeatur, aliud valens sit, leuius aliud; quoddam aut vnam, aut pauculas partes , nonnullum corpus totum, aut magnâ ex parte afficiat, molestia sæpe coniuncta est, & incommodum, vt cùm opus est, non semper vsurpare quis possit. Nàm nec fodere, luctarique, nec magna tollere onera vtile est; nec currere, aut vmbra persequi, funem scandere, summis digitis concertare honestum; nec follem aut paruam pilam, quantumlibet à Galeno peculiari libello præ ceteris commendetur, tractare, vel datatim ludere quouis tempore opportunum. Quare aliud quoddam instrumenti genus perquirendum, quòd minùs negotia impediat, constantius operetur, & singulas ex æquo corporis particulas attingat, & ab omni vi; atque iniuriâ, quàm longissimè absit. Id sanè principum medicinæ primus insinuauit libro de veteri medicinâ.

*De veteri
medic.*

Fames magnam potentiam in naturam hominis habet sanandi; est enim crapulæ contraria, quæ plures occidere dicitur, quàm gladius.

4. Apho-
rū l. 1.

Quoniam autem fames, ut ceteræ res omnes saluberrimæ, & optimæ, nocere possunt, maiorem prudentiam requirit; quod euacuationes, si à modo recesserint, sint periculosiores, quod non ita facile sit detracta restituere, sicut superflua detrahere: quæ duo sunt capita actionum medicarum.

Victus tenuis, plenus, & mediocris.

CAPVT IIII.



ORRÒ nè cui durior appareat famis appellatio, quænam sint instrumenta, quibus medici in corporibus curandis, tam prosperâ, quàm aduersâ valetudine nitantur, prælibabo: ut cum inter illa fames, siue abstinencia locum inuenerit, fiant deinceps quæ dicturi sumus, clariora. Sunt autem illa victus, siue diæta, pharmaca, chirurgia; ex quibus victus præstat, ut qui multum admodum in omnibus etiam corporis malis proficit, in sanitate sufficit, nec aliorum subsidio indiget, quæ tamen sine victus obseruatione non consistunt. Is verò in plura genera diducitur. Cum enim quantum natura capere, ferreque potest, offertur, & corporis moles augetur, plena diæta dicitur: media autem, si neque admodum augetur

Cels. lib.
8. præpat.

tur, neque diminuitur substantia, sed moderatione quadam fouetur; ad quam spectat philosophica temperantia, quam antea commendauimus: tertia corpori fomitem subtrahit, & per pauca, vt dicant medici, parumq̃ se nutritia ducitur, & tenuis appellatur. Cornelius Celsus abstinentiæ duo genera constituit; vnum, vbi nihil assumitur; alterum, vbi non nisi quod oportet. Vtrumque sanis inutile, quod necessariò edendum sit, & quoad fieri possit conseruandæ vires, quâ in parte multis obfuit imprudentia, qui vel vitâ, vel mente luerint. Sed nec crassus victus in sanis probari potest, quod obesos reddat, & (vt Aëtius inquit) sterilitati obnoxios: addente Celso, crassos, & obesos plerumque corripi acutis morbis, & difficultate spirandi, strangulari, subitoq̃ se mori, saltem capite grauari, fumis, vaporibusq̃ne oppleri: vt rectè, sit dictum, pinguis venter non gignit sensum tenuem.

Cap. 16.
lib. 2.

Lib. 4.
serm. 4.
c. 26.

Hieron.

*Ecclesiasticum jeiunium, peculiare victus genus,
sanis tùm vtile, tùm necessarium, & men-
tem serenam faciens.*

CAPUT V.

PRÆTERMISSVM si fortè dixerim à Medicis vnum victus genus non merebor notam, quòd maioricorporis curâ impediti, Christianorum scopum non aduerterint, quantumvis eorum quæ ad illum faciunt, planè nihil omiserint. Sed excusatione digni censentur si non expresse-
rint, quod ex illorum diuisione facile colligitur. Est autem illud quod neque plenum, neque tenue simpliciter nominandum sit, quo corpus insigniter inanitur, idemque etiam satis superque reficitur. Eiusmodi est, quod propriè jeiunium Ecclesiasticum vocamus, hoc enim licet alimenta rariùs, ea tamen suppeditat, quæ materiâ constant plurimùm sustentante; cuius vis, atque præstantia si rectè æstimetur, sanis corporibus non solùm vtile, sed etiam necessarium deprehendetur. Quandoquidem eâ moderatione constet, quâ, docente Hyppocrate, sanus homo carere nequit, vt sanitatem tueatur

tur. Quæ enim ad restaurationem ingeruntur, superuacanea relinquunt, quo ab oppositâ vi consumantur. Quod non solum labore, & exercitio, sed ieiunio quoque ab eodem auctore adscribitur. Quamuis siquidem eodem spectent tum labor, tum ieiunium, hoc tamen illo multis numeris præstat; quod mitius, & æquabilius operetur: labor namque agitatione quadam, ac molestiâ confertim corpus afficit, ieiunium verò blandè, ac suauiter singulas partes sensim euacuat: quando etenim alimento destituitur natius calor foueri postulans, in humores superfluos conuertitur, eosque vndequaque conficere satagit, semper quietis impatiens quærit in quod agat, sic vt tandem morborum causas exterere, catharos, distillationesque siccare, & mentem clariorem efficere deprehendatur. Liquet hoc in dysentericis, & aluo fluente tabescentibus, quibus viuax, & integrum manet iudicium. Perindè, ac prauos naturæ stimulos cohibere, dum mollibus ieiunij habenis, rariore scilicet, moderatioreque refectione hepar, Platonii ciborum, potuum, ac venereorum sedes, tricipiti beluæ à Galeno comparatum, reprimatur. Irascibilis vis altera, ab eodem leoni assimilata, similiter constringitur, sedatiorque redditur; vnde repurgatis, & siccioribus

*Gal. de
platit.*

*Hypocr.
& plat.
lib. 3. c. 2.*

3. c. 6.

perspicacionibusque spiritibus regina, ac moderatrix ratio tandem in summâ tranquillitate dominatur, ac præclaras functiones suas, præsertim quibus à brutis animantibus sciungitur, liberri-
mè exercet.

*Semel in die comedere, priscis etiam temporibus vsi-
tatum, spirituique animali, & contempla-
tioni vtile.*

CAPVT VI.



ED nè durior censeatur nostra oratio, quid de numero comestio-
num, medici doceant, expendamus. Fuisse vsitatum priscis temporibus semel tantum in die comedere, cum ex alijs mul-
tis, tum ex Hyppocrate, & Galeno conspicuum
est. Quamuis autem eam consuetudinem omni-
bus communem esse noluerint, ac nonnulli tam
raram cibationem tolerare nequeant, sufficit
quod lex præscribit plerisque, vt plurimum, & se-
pius conuenire; quodque nec illi eam improba-
uerint, cum nulla tam seuera sanctio sit, quæ ab
omni penitus excusatione sit immunis. Centè
Antoninum Imperatorem ex Galeno didicimus
vnius dici inediâ depellere solitum cruditates

*Aphor.
17. lib. 1.*

ventriculi, & potu aquæ frigidæ. Aristotelem ex
 Apollonio scripsisse refert eruditissimus Hiero-
 nymus Mercurialis, eos qui in die cibis semel tan-
 tum vescuntur, amarulentioribus esse moribus,
 quam eos qui bis, quoniam aucta in ipsis vtraque
 bilis animum magnoperè perturbat, eosque ira-
 cundos, & melancholicos facit; & Plinium ex
 Hyppocrate tradere, non prandentium exta cele-
 riùs senescere: quo fit ut non omnibus tuto à Me-
 dicis το μοροντιειν præcipi credat, & potius dis-
 pertiendum in plures vices alimentum, quòd ita
 facilius concoquatur: quod nemo inficiabitur;
 ideoque Ecclesia hoc aduertens prudenti occur-
 rit consilio ut cum opus est indulgeat. Sed tam
 in prandio quam in cænâ escis impleri omnino
 prohibet, nam & Hyppocrates ἀριστας, hoc est,
 ἀριστοι, siue prandium sumentes edaces appellat,
 tanquam intemperantes, quandò potius δεῖπνον
 erat in usu, quod cænam significat. Sed ut quibus-
 dam longior, ac durior intermissa comestio ap-
 pareat, certè appendicum (quas vespertinas cæ-
 nulas nostri, olim jentacula meridiana, vulgò col-
 lationes vocant) supplemento minui, ac mitiga-
 ri manifestum est. Atqui eum refectionis nu-
 merum non aduersari naturæ, & cogitationi op-
 timè seruire omnium sententia est, rationem di-
 lucidè prosequente Actuário libro de animali

Mercur.
lib. 2.

varia.
lett. c. 21.

Plin. lib.
28. c. 5.

Hyppoc.
l. de aerè.
et aqua.

*Aëuar.
lib. de
ani. sp.
nat. c. 10.*

spiritu, quem Iosepho Racendyte philosophi-
cam vitam professio conscriptum inscripsit, quo
purior ille spiritus arte adiutus perdurer, tum de
victus ratione, qualem huic adhibere conueniat,
corporique vna sanitatem, ac spiritui huiusmodi
animali intelligendi vim synceram elargiretur.
Quòd si, inquit, consuetudo inualuerit, nec velis
bis eidem rei vacare (refectioni vide' icet) possis
consuetudinem seruare quæ facultates naturales
in habitum iam induruerit, vt citrà detrimentum
aliquod ex tanti temporis interuallo opus pera-
gant. Prætereà autem vt non durabilior spiritus
sit, certè nitidior euadit, quod de animali spiritu
interpretandum est: nam aliorum duorum, vira-
lis scilicet, & naturalis (de hoc dubitent qui ve-
liant). ratio non amplius christianis curæ esse de-
bet, quàm quatenus ipsi neglecti, valetudini in-
commodent. Quod etiam plures vanæ sapien-
tiæ studiosi sedulò notârunt, qui abstinentiæ
plurimum confidentes ciborum exuperantiâ, &
crassitie abdicatâ, cam abstinentiam sic sunt am-
plexi, ne animalis spiritus crassior effectus ab a-
lijs duobus naturâ, & facultate repugnantibus ob-
nubilaretur, ac ratiocinatrix vis, consilij præses,
totiusque œconomiæ suprema moderatrix in ser-
uitutem traheretur.

*Ianus Cornarius, & Leonardus Fucchius producti
deinceps refellendi.*

CAPVT VII.



V Ò D si hominibus à verâ religio-
ne alienis ea placuit obseruantia, quid
Christianis? nonne profectò maiore
solicitudine enitendum vt fideliter,
diligenterque parcant, vbi similis vitæ modus,
idemque scopus intelligentiæ purgandę præser-
tim cum illis perpetuus sit, qui Christianis non
nisi laxis, & frequentibus interuallis indicitur.
Ceterum cum inueta, (vt est in aphorismis)
consuetis magis afficiant, molestioraque de-
prehendantur, consultissimum à teneris pueros
in prædictis abstinentiæ legibus exerceri, quo a-
dulti facilius perferant. Proinde si plerique sic
essent educati nequaquam tam sancta, tam-
que salubria ieiunia insectarentur, ac maledi-
ctis proscinderent. Fortè qui crapulam, & e-
brietatem postridianâ curari inediâ quandoque
experti sunt, nollent præstantissimas ieiunij
facultates diffiteri, sed quòd congruè, &
oportunè abstinentiæ tempora præscribantur,

Lib. 2.

Aphor.

80.

& designentur fuerit difficilius persuadere. Sed quid minùs credunt medico hoc commendanti, quàm morbo vel pharmaca, vel chirurgiam adhibenti? Verùm occurrunt hoc ariete, non dubij de victoriâ, inter quos Ianus Cornarius, & Leonardus Facchius, quorum ille suarum institutionum capite de cibo, & potu, valdè noxiam rem, ait, annis aliquot fuisse hætenus apud plures populos ieiunij obseruationem, ac prohibitionem eius carniū, ouorum, ac lacticiniorum maximè mense Martio. Sed quoniam ille in historiâ se nihil versatum ostendit, cū illam nuper natam impiè, impudenter, indoctè effutiat, ad alterum conuertar cuius institutiones magis triæ, etsi non minus impiè, fusiùs prosequuntur. Magis (inquit) carne quàm piscibus hoc tempore vescendum. Cū enim ver in summorum nempe hyemis, & æstatis, in quorum medio versatur, mediana temperaturam habeat, mediam etiam vitus rationem requirit; non igitur verno tempore vt hyeme, calefacientibus, & exsiccantibus cibis; nec refrigerantibus, & humectantibus vt æstate vtendum: piscium verò alimentum esse frigidum, & humidum, adeoque veri minùs aptum nulli non cōstat. Carne igitur magis verno tempore, præsertim vitulorum, & hedi vtendum. In summâ cū verno tempore corpus mediocri-

Ianus
Cornar.
lib. instit.
ut c. de
cibo, &
potu.

Leon.
Facchius
c. 9. l. 2.
Instit.

ter sit affectum, atque adeò temperatum, in eo sanè statu mediocri victu conseruandum erit. Quare hoc tempore minimè est ieiunandum: imò, cum ventres tum, vt Hyppocrates attestatur, naturâ calidissimi sint, somnique longissimi plurima alimenta sunt exhibenda: si enim calorem habent innatum multum, igitur pluribus etiam alimentis egent: paulò post. ætate, & autumno cibos difficillimè ferunt, hyeme facillimè, secundo loco vere: quare contra veterum Medicorum præscriptum faciunt, qui verno tempore humana corpora ieiunijs, & immodico piscium, & leguminum vsu temerè affligunt, neque enim citra insigne bonæ valetudinis, atque adeò vitæ dispendium obsequi licet, quòd vix vllò alio tempore perinde atque verno (quod tamen Hyppocratis etiam testimonio, Aphor. 9. l. 3., saluberrimum est, & minimè exitialibus morbis obnoxium) febres magis per omnes regiones grassatæ fuerint. Hæc ille. Quorum inscitiam ex Sardanapali scholâ profectam intelliget, qui singulas farraginis obiectiones, maleque connexæ partes seorsim exemptas expendere, videbit quoque ne Hyppocratis quidem mentem affectos, qui cutis curandæ studio additi, Ecclesiasticis legibus insultant.

*Aphor.
18. lib. 1.*



Ver jeiunio aptissimum.

CAPVT VIII.



ONSTAT autem verno tempore jeiunium celebrari à vere Christianis quadraginta dierum, quod in salubrium causarum classẽ retulimus, quia superantes humores tollit, euacuat, consumitque. Quod si interim quibusdam aliquandò incommodum, vel etiam noxium fuisse deprehensum sit, debuit hoc inconsultæ, ac malæ vsurpationi imputari: nemo immodicum vsum piscium præscripsit cum temperantiæ ratio summa etiam in jeiunio habenda sit: febres, si contigerint quandoque, causam habent ab inediâ nimiam cum victus mutatione satietatem, aut aëris martialis asperitatem, & inconstantiam, tametsi ver ex se & maximâ, præcipuâque sui parte salubritate præstet. Rectus verò, & congruus vsus instrumenti salubris actionis, quale hoc est, non tantum in quantitate, qualitate, ac modo consistit, verum etiam temporis oportunitatem, quam *ἐυκαιρίαν* dicunt, requirit; quæ tanti in omni sanitatis negotio est momenti, vt qui eam non
est


est consecutus, nihil vnquam possit feliciter expedire. Quare & in ieiunio eam perquiramus, ne Ianis, & Fucchijs deesse videatur. Cùm itaque euacuationes quascunque siue per sanguinis detractionem, siue per medicamenta facere conueniat, aphorismorum autor docet Lib. 6.
aphor.
47. verno tempore instituendas esse: proinde ieiunia cùm & ipsa insigniter euacuare soleant vere item optimè instituuntur. Nàm euacuationibus Galenus eo tempore factis, morbos impendentes intercipit, asseritque se eo modo quàm plurimos, tùm à plenitudinis incommodo, tùm à succorum prauitate, Græcis *κακοχρησία* dictâ, seruasse, ac podagiam, morbum articulare incipientem, & nondum *λοφός* circa articulos facientem, sanguinis præterea spuitionem, morbum comitiasem, & alios plerisque graues morbos tempestiuo eodem studio, ac vigilantia tùm prohibuisse, tùm extirpauisse. Sed vt exijs præclara illa remedia, missionem scilicet sanguinis, & purgationem merito commendans, longè tamen præstantiorem inediam fateberis, quæ præterquàm quòd pariter vt illa humores minuat, atque euacuet, certè etiam eosdem attenuat, & euacuationi præparat, adaptatque. Ad quæ accedit, quòd naturam illa non atterat sicut pharmacum,

Lib. Me-
thod. cap.

& phlebotomia, sed lentè, æqualiter, suauiter, & absque conturbatione, agitationeque operetur, vt vel eo nomine, medici inedia primas tribuant, nec prius fere aut ad medicamenta, aut manus subsidia confluant, quàm periculum sumtum sit an abstinentia satis valeat: nimirum diatritarij (quos appellat Galenus) triduanam à cibis in curandis morbis enducticam statuebant, quam qui perferebant, iudicabant de sanitate securos, vel suppositâ maiore securitate acerbiora, minusque tuta præsidia efflagitare.

*Inedia Verno tempore salubriter indicta etiam
Fucchio assertore.*

CAPVT IX.



ED hoc animaduersione dignum, quòd sanis, non solum ijs qui mox ægri futuri sint, ieiunium salubre, ac securum præsidium habeatur, ve-

Lib. 6.
aphor.

47. lib. 7.
aphor. 53.

rùm ijs item, quos sanos corpore Hyppocrates nominat, nullâ adhuc in ipsis ægriitudinis apparente notâ, dùm pharmaca dari prohibet inedia utilissima est, & pene necessaria, & quidem verno tempore, quo ab Ecclesiâ indicitur. Cùm enim ver hiemem protinùs subsequatur, sintque propterea corpora præter modum humecta ad cibos
tunc

tunc copiosiores, somnos longiores, diuturnius otium, ac propriam hyemis frigidam, humidam-
 que constitutionem: ac quòd ver ipsum quoque humiditatem augeat, manifestum est humiditati tempestiuè obstitendum, priusquàm ægritudines producat, eo grauiore periculo, quo crescente calore putredinis magis magisque excrescit occasio. Iam verò olim ab Hippocrate annotatum est, quòd corporibus carnes habentibus humiditas, famem adhibere conueniat: fames enim corpora ficcet; cuius vim, & potentiam alibi commendauit, vt paulò antè retulimus. Quæ omnia Fuc-
 chium latuisse credibile non est, cum ita scripse-
 rit capite de inediâ, cuius laudes non infimas cen-
 set, quamuis inter ea quæ euacuant decimum, ac vltimum reliquerit locum. Inter ea (inquit) quæ corpus nostrum tam sanum quàm ægrium faciant, inedia à veteribus recensetur. Et paulò post: inedia duplex existit, vna in quâ nihil prorsus cibi, aut potionis assumitur, quam priuatim certioris discriminis gratiâ græci ἐνδεΐαν, latini in-
 ediam, indigentiamque vocant: altera quando non nisi quod conuenit, & ad virtutis conseruationem satis est, ingeritur; quam propriè abstinentiam dixeris: vt in vniuersum inedia non sit nisi ex cibi, potusque defectu esuritio, aut sponte, suoque arbitratu suscepta abstinentia. Hippo-

Lib. 7.
apud 59.

Lib. 2.
sec. 3.
c. 37.

crates vno nomine vtramque *λιμόν*, hoc est, famem appellauit : est autem vtriusque non contemnenda utilitas, nihil enim est quod tùm sanos, tùm ægros magis iuuat quàm tempestiua inedia, & abstinencia. Sani namque non facile morbos incurrunt, si abstinenciã commodè vtantur. Deindè, vt tempestiua abstinencia summas in secundã valetudine partes sibi vendicat, ita quoque in aduersã plurimũ momenti obtinet, sanat enim plenitudinẽ, nimium obesos, pituitosos, vitiaque ex pituitã nata, apoplexiam, epilepsiam, commata, vertigines, ciuitates, & id genus alia multa. Sic Fucchijs, cuius verba prolixiũs sum prosecutus, vt & in vocibus ieiunio, abstinenciã, inediã, fame, & in rei significatã vi, facultateque videatur conuenire, vt nequeat si velit resiliere.

*Euacuationes Vere à præstantissimis Medicis
prescribuntur : martius mensis ple-
risque formidabilis.*

CAPVT X.



IDETVR tamen ad Temperantiã Fucchijs confugere occasione illius sententiã ex Epidemijs. Sanitatis studium est, non satiari cibus : adducens & Plinij autoritatem, qui dicit longè utilissimam esse ad sanitatis

6. Epide.

scilicet 4.

aphor.

30.

tis conseruationem in cibis temperantiam, quam infirmiores ad hoc munus euacuationis in præcedentibus est monstratum. Quare his omissis quadragesimali abstinentiæ, quam persequimur dictas competere facultates, ex ipso Hippocrate oraculi loco accipiamus. Semel (inquit) in die cibum capere attenuat, & siccatur, ac aluum sistit; propterea scilicet, quod per animæ caliditatem humiditas ex ventre, & carne consumitur; quatenus scilicet, id quod à calore innato extenuatum, & in vapores conuersum est, non suppletur nouo alimento, facilius euacuatio succedit, præsertim verno tempore, quando ambientis calor accedit, interni illius operationem ipse quoque tanquam iunctis viribus discutiendo promouens. Porro Galenus euacuationem veris initio quando crassi humores, ac crudi exorbitant accommodatissimam statuit, quos diximus per ieiunium plurimis nominibus feliciter superari. Quod autem idem autor alio loco profert, magis etiam comprobatur ieiunij oportunitatem. Vere medio (inquit) sanos paucis, & ex longo interuallo nutrire congruit. Hoc præceptum non potest exactius quam Christianè, semel in die moderatè comedendo, seruari. De veris autem initio, & medio nihil attinet controuertere: nam sex

Lib. 2. de dietis.

*Commēt.
in 17.
aphor.
lib. 1.*

hebdomadæ jeiunio sacratæ, ita fere extenduntur : atque ita verno tempore viuendum hæc Galeni ratio ostendit, quòd tùm periculum sit à plethoricâ affectione propter humorum qui hyberno tempore concreuerant fusionem : vernus namque calor in ijs, qui probi succi sunt, humorum copiam auget, prauos autem in ceteris ex profundo in superficiem rapit, & expurgat. Vnde & morbi pullulant partim plenitudini, partim vitio conformes, cuiusmodi sunt furores, anginæ, pustulæ, tubercula & id genus similes. Sed ipsa natura quoque hoc tempore annum quoddammodò censum in corpore recognoscens plurimùm occupatur, grauiter interpellationem ferens, potissimum ex ciborum tùm frequentia, tùm copia, & à suis operibus, quibus vacare sinenda est, auersione. Vulgus id etiam intelligit quandò à Martio mense quisque sibi plurimùm metuat, præsertim si in se mali fomitem persenscat, aut suspicetur.

Aphor.
30. l. 3.

Hippo.

*Hippocrates explicatus. Syphillide laborantibus
quadragenaria dieta utilis.*

CAPVT XI.

NE QVE me fugit profectò vere, & hyeme ventres naturâ calidissimos, copiosius alimentum requirere. Verùm ea Senis sententia, vt Galenus Lib. 1.
Aphor. 15 suggerit, commodè exponi debet, quod ver tres partes habeat, vtpote principium, medium, & finem. De primâ quidem parte, id aliquò vsque verum est, quòd hyemi proxima sit, de reliquis non ita. Quin etsi simpliciter iuxta nutritus Lib. 2.
aphor. 12. à tempore desumtâ, ita se habeat ver vt liberalius corpori indulgeat, ipsa tamen pro eo tempore corporum constitutio multo diuersam Lib. 3.
aphor. 20.
Galen.
lib. de
rat. vii.
in morb.
acut.
comm. 4.
part. 44. exigat educationem. Cùm enim iam tùm ex hyeme impuros humores accumulauerint, alio præcepto constringuntur: non pura siquidem corpora quanto plus nutrias, tanto magis lædas, quòd à vitiosis humoribus, præcipuè ventriculorum, regionemque primam obsidentibus, nutrimenta corrumpantur, ac porrò reliquum quoque corpus inficiatur. Incipio sunt psora, scabies, similesque cutis scditates, quibus euitandis incutia præsidio est. Sed & hyems multam pituitam suppe.

suppeditat; quæ cum sit crudus humor, postulat, Galeno teste, non expurgari, sed in sanguinem à calore conuerti natiuo; proinde non debet tunc per alimenta turbari: præstat tamen antea alui colluuiem, præsertim stomachum ad fastidium, nauseamque incitantem, leuioribus pharmacis depurgare, ut calor minori negotio, ac securius, humiditatem superfluum in venis, & carnibus, corporisque habitu conficiat. Etenim calor is est, cui effecta hæc salutaria sub nomine inediæ tribuuntur. Nam ipsa carentia est, & alimenti priuatio ob quam liberior ille suo iure suam fabricam ad minimas usque latebras rimatur, & expendit, instarque patris familias optimè de suo fundo disponit ipse solus, cum in ceteris euacuationibus abundè iuuetur, quod non parum inediæ commendat. Patet in pueris, qui dum per morbum vix quicquam eduliorum admittunt, mirum quantum excrescant! calor namque similiarum partium substantiam diducit, tendit, extendit, maximè non habens à quo distrahatur. Qui ergo stomacho sunt fortiore, non alia indigent præparatione, quam in cibo, & potu temperantiâ. Liquet etiam ieiunij efficacia in diætâ, quam vocant, adhiberi solitâ, dum ligno indico, siue sancto, curatio instituitur, etiam ad quadraginta subinde dies. Nam

quam-

quamuis illa plurimum siccet, absumatque, cò
minùs prodest, quò negligentior est abstinen-
tia; vt proindè ritè suis rebus consuluerint Sy-
philide laborantes, si sacram quadragesimam lu-
benter suscipiant.

Hieron.
fraca Sy-
phil. lib. 3.

*Quid mirandum æquè memorem super omnia
victum*

*Quàm tenuem? quàm magna sibi ieiunia poscant?
Quippè solet satis esse ipsum dùm corpus a-*

*latur, Dùm superet vita, & tantum ne membra
fatiscant.*

Salis vicem subit ieiunium, quo nisi carnes
condiantur facillimè putrescunt Hoc igitur con-
diendi maximè putredini obnoxij, & humidì.

*Ieiunia Ecclesiastica quasi consultis Medicinæ pro-
ceribus indicta. Quatuor temporum vtilitas.
Caluini impudens peruicacia.*

CAPVT XII.



SUNT quibus non adèò displiceat
abstinentiam commendari, sed ex
aliorum arbitrio, atque decreto im-
perari, non ferunt. Quærerem ab
illis amaranè, & ingrata pharmaca proprio

iudicio an Medici prescripto sumenda arbitrentur? sintque probaturi eos potius qui temerè, quàm qui consilio faciant? arrogantia hoc argumentum est, non studiosi sanitatis, discendum ab ijs qui verè sciunt; cuique etiam in suâ (quod aiunt) arte credendum. Quòd si in pharmacis, longè magis in ieiunio quadragesimæ, quòd illa momento deglutita breuissimo tempore scopum consequantur non sine periculo detrimenti, cum hoc diutius operetur, & impunè. Certè ieiuniorum Ecclesiasticorum leges ita conueniunt vt si syncrerè expendas, nihil contineant quod medicis rationibus non confirmetur: hand secus ac si Hippocrates, & Galenus, Auicenna, Paulus, Celsus cum Apostolis, Gregorio, Hieronymo, vtroque Clemente, Calixto, Telesphoro, Leone, Basilio, omnibus concilijs ipso decretorum tempore suffragia rogati, interfuissent, & consensissent; præsertim cum vtrique homini exactissimè subseruiant; vt planè ineptiat Caluinus, qui nō veretur (quòd cum Philippo, & Brenzio ad carnis petulantiam comprimendam, & ad orationis facultatem, fructumque maiorem utile docuit) dicere *ex κακοῦνθλα* excogitatum. Ceterum extra quadragesimam sæpius ieiunia repetere ad sanitatem optimum, vtilissimumque præceptum experientia multos edocuit. Nam cata-

potia;

*Confess.
August.
Caluin.
lib 4.
Instit.
cap. 12.
& seq.
ff 20.*

potia, siue pillulæ, aut aliæ familiares medicamentorum formulę sanos atterunt, sædi colores, languores, & id genus similia arguunt securius frequenter ieiunari. Neque verò temerè id in certa tempora imperatur : Ecclesia quippe sollicitas matres familias imitatur, quæ statos dies præfigere solent, quibus antidotorum, aut puluerum frequenti vsu liberos à verminosâ putredine præseruant. Ita enim facilius obliuio euitatur, quæ alioqui facillimè incidit. Parem maiores nostros curam habuisse in quatuor tēporum institutione (quorum mutationes Medicorum sententiæ *Aphor. 1. l. 3.* ferunt morbos parere) manifestum est ; Martio quidem mense, & Decembri, propter hyemis humiditatem ; æstiuum circa solstitium satietatis ergò ex mutato post quadragesimam victu ; Autumno, vt putredo, quam horarij fructus, cerasa, pruna, ficus producunt, contagionisque, ac pestis prompta tunc occasio, arceatur. Non ergò sine prudenti consilio, ne negligentia tam utilis ad sanitatem cautio prætermitteretur, admonemur, aut piè salubriterque cogimur, vt nequeamus sine impietatis, & ingratitude notâ præterire.

Ieiunium corporis impudicis motionibus

contrarium.

CAPVT XIII.



Cass. col-
lat. 22.
cap. 3.

NON SANCTAM non ieiunandi venantur nonnulli ex pollutionis nocturnæ molestiâ: meminit Cassianus heremitas frequentius expertos, etiam afflicto, exhaustoque corpore, & quidem districtioris abstinentiæ tempore; & leuius, ac rariùs ieiunantes remissiùs illâ molestiâ impetebantur: non id tamen præsentì imputandum inediae, sed præcedenti ingluuiei, & comessationi, quæ redundantiam obsceni humoris extrudit, qui concretus fuerat in medullis: faciliè etiam indè pruritus, cùm in suis latebris turgens humor naturam incitat ad expulsionem. Pruritus etiam maior accidit ab epulis lautioribus, quæ incentiuis acrioribus sale, & pipere, similibusque condiuntur. Irâ quoque, aut furore eiusmodi accidit infestatio. Illecebrosis item cogitationibus, cùm ad libidinis prouocationem duo maximè requirantur, materia videlicet quæ genitalia foueat, & appetitus qui inci-

ter,

ter, & impellat: non potest profectò nostro
ieiunio, modò legitimè obseruetur, id incom-
modi imputari. Etenim materia illa, quæ be-
nigni alimenti est superfluitas, ex eâ frugalitate
non potest abundare; appetitus verò deficere
cogitur, quòd spiritus, in quibus vis, naturæ-
que ad omnem motum robur ponitur, rariores
effecti languorem, & flacciditatem inducant:
sine Cerere, & Baccho friget Venus, fomiteque
sublato tollitur flamma. Quin etsi diuturnio-
re inediâ corpus nonnihil inardescat, tamen
quòd ad impurum motum tum humores, tum
spiritus requirantur, ad eum profectò mini-
mum incitatur; nisi hecticam febrem, quòd
continuam solidarum partium efferuescentiam
inuehat, maiorem quàm in sanis (quòd ne-
mo rectè dixerit) inducere tentiginem statua-
mus. Iam verò appetitus, animæ quidam ada-
gendum impetus, vt habet Marcus Tullius, *Lib. 2.
offic.*
pro specierum incidentium occurſu variè di-
strahitur, velut cum electione voluntatem mo-
uens; citra illam, cum vitæ negotijs furorem,
aut iram, vel cum corporis voluptatibus concu-
piscenciam, ac turpitudinem excitans; quæ cum
sint contraria, ac locis, spiritibusque seiuncta,
fieri non potest vt simul respondeant. Quare
cum ieiunij institutum poscat vt mens sursùm

feratur, ac pijs meditationibus intendat, impudicis stimulis occasio non præbetur, reuulsis nimirum in superiora cum sanguine spiritibus, & mente contrarijs cogitationibus occupatâ. Sed eam quoque mentem Ecclesiæ præcipientis intelligo, vt per quadragesimam Dominicę passionis potissimum mylteria assidue cõtemplemur, delicta execremur, persequamur virtutes; suppeditant argumentum frequentissimę tũ conciones, aliaque exercitia; quę si saperent, animoque insiderent, euitatis sedulo quibusslibet malis occasionibus præclariùs afficerent. Idcirco qui ieiunijs carnis vexationes augeri contendunt, certè quid sit ieiunare nunquam videntur didicisse. Quam enim experientiam tũ de se, tũ de alijs proferunt, non tam ex ieiunio, quàm animi prauitate proficiscitur; cumque mens impudicas imagines altius imbiberit, nihil à ieiunio, prauâ consuetudine impediti, percipiunt: vndè si qui stimuli ieiunantibus superueniunt, ex imaginatione violenter exsurgunt; non secus ac in effæctis, senibus, eunuchis, impotentibus, frigidis, ac maleficiatis vsu cernimus euenire.

Graue quidem fateor, ac molestum, multaquę subinde tolerantia opus est, quemadmodum in omni bonâ medicatione; quia

Dulcia non meruit qui non gustauit amara,

quid

quid dulcius, desideratumque magis sanitate?
hanc jeiunium non solum corpori, verum etiam
animo promittit. Magnus proinde Leo recte
dixerit producere

Card.
de var.
verol. 140.

*Castas cogitationes,
Rationabiles voluntates,
Et salubria consilia.*

Cui Actuarius insignis Medicus, sed prophanus, adijcit: homo supra se rapietur, & ad decum iterum conuertetur. Socratem cum corpus à cibis sobrium, & animum à sceleribus, & perturbationibus mundum habuerit, diuinare potuisse legimus.

Pisces, ceteraque jeiunijs vsitata edulia aptissima, non carnes.

CAPVT XIII.



IMPLACABILES se exhibent cremargi, ollis credo ægyptijs assueti, dum carnes, oua, ac lacticia quadragesimâ, alijsque alibi diebus excludi queruntur, nec aliud quam legumina, pisces, aliaque quæ in victu sanorum, ipsi pro insalubribus dicunt haberi, præsertim eo tempore quo humores corporis reflorescunt, ac velut murato exuuiο renouantur, potius iudicant carnibus

atque alijs præstantioris succi alimentis naturam tunc fouendam esse, potissimum quod ex eius temporis moderatione tanquam basi quædam, valetudinis rudimenta concipiantur, futuræque dispositionis felicitas dependeat: adeò vt succorum primordijs vitiatis, iam certam languorum, ac calamitatum positam clamitent occasionem, vt paulò ante ex Leon: Fucchio, eiusque commilitone Iano minimè bifronte, quod extra buccas nihil intelligat, retulimus; quos Hippocratem consuluisse coueniebat libro de veteri medicinâ, eos reprehendentem qui simpliciter caseum esse malum edulium pronuntiant; cùm non omnes homines lædat, imò mirabiliter gracilibus conferat; differunt enim horum naturæ, differuntque etiam iuxta hoc quod est in corpore caseo contrarium. Ad hæc tempus, modus, quæque præterea corpori tùm insunt, tùm accidunt conferenda, & componenda sunt; sæpe enim contingit, vt quæ alioqui sint mala, certâ tamen occasione commoda deprehendantur; vt rectè libro de præceptionibus vetuit, ne quis quod vnum solùm profuturum sit asseueret: sed prudentis est probam comparisonem prius facere, quàm de aliquo quod vel bonum, vel malum sit sententiam ferat, quo modo in musicâ sonos probare, vel

*Lib. de.
præcept.
Hippoc.*

improbare non decet nisi mutuâ acutorum cum grauibus, minimorum cum maximis, extremorum cum medijs, collatione: quorum concentus si consideretur, non parùm instruet in eo studio quod comperit tuendæ sanitati: vt enim ille ex contrarijs conficitur, ita & natura ex contrarijs constituta contrariorum quoque commoderatione debet conseruari, quod tùm euidentius cernitur, quandò natura suo modo excidit, vel plurimùm declinauit. Quamobrem non tam quid vel pisces, aut legumina, seu etiam inedia præster, sed quam simul concurrentia corpori constitutionem parent, potiùs est aduertendum. Ieiunia itaque quatenùs alimenta subtrahunt, facilè calidiorē, siccioremque intemperiem induxerint, ideoque non carnes quæ sanguinis caliditatem augent, sed pisces frigidi, & humidi rectiùs obijciuntur. Carnium quoque substantia celerius conuertitur, ac dissipatur, pisces lento, viscosoque succo præditi, diutiùs, atque constantiùs calorem natium fouent, pabulumque durabilius, quod longa poscit abstinentia, subministrant: quod in hæticâ laborantibus Medici, ob calidiorem illorum dispositionem perpetuò imitantur, cùm caneros, astacos, testidines, ranarumque coxas edendas proponunt.

*Tit. ferm.**l. c. 239.**Aegineta**lib. 1. c. 73*

At sanis interea, quibus calor validior est, delicatiores, mollioresque pisculi velut gobiones, ob fluxam substantiam, ieiuniorum diebus parcius sumendi sunt, ac solidioribus edulijs, siue pisculentis, siue alius generis, quæ non tam promptè conficiantur familiariter vti satius est, adstipulante Aëtio: securior (inquit) diæta est, & victus attenuatorius ad sanitatis conseruationem præ crassefaciente. Verùm cùm modicè alat, firmitatem non addit corporibus, neque robur. Oportet igitur aliquandò etiam multum nutrientia moderatè assumere, vbi firmitatem acquirere voles. Hæc ille. Nec desunt eius generis multa ex leguminibus, fabarum spissiora collata, orizata, amigdalata; ex farinis panici, frumentive confecta liba: ex piscibus haleces, sardæ, aranei, lampetæ, scombri, acus, minùs corruptibiles aselli, alosæ, sturiones, (quos accipenseres diximus) salmones, anguillæ; sed parcius, carpiones, soleæ raia: quibus secundo loco passerres, pectines, rhombi, lucij, & id genus alia succedant, quæ vel durioris, firmioris, aut solidioris substantiæ, aut lentioris sunt: sinapi, piper, gingiber, quibusdam oleum, & acetum, præter ea quæ diximus pro condimento seruiunt, nonnulli radicem maioris raphani cum amigdalibus, micâ panis, & aceto tundendo subigunt in illum vsum, quæ vt parciore

manu

manu sumenda sunt, sic non omnibus conducunt. Cetera prætereo, quòd magificæ inuentiones per regiones, & familias variant, quoniam & allia, & cæpæ quibusdam placent, alibi aromata in eum scopum consumuntur. Itaque per quadragessimam salubriter quàm plurima recepta sunt, quæ & victum vel corrigunt, vel gratiorem reddunt, sicut ea quæ modò recensuimus, & nutriendis incommodis, astrictioni scilicet, leuitati, vel obstructioni in promptu remedio sunt: mensæ initio oleo, passulis, ficibus,

Vescere lactucis, & mollibus vtere maluis,
 item lupulis, asparagis, spinachijs: deinde amigdalis, aromatibus, croco ad corrigendum; biscoctus autem, cydoniata, & cetera, quæ bellariorum loco proponuntur, vt plurimum siccandi, adstringendique facultate pollent, inter quæ familiariter numerantur nuces, vt vulgato versiculo fertur,

Post pisces nux sit, post carnes caseus adsit.

Martial.
 Aetium
 lib. 4.
 titra.
 cap. 30.

S

Homi.

Homini finis Dei cognitio, & sui: ad hanc per ieiunium tenditur: anima sicco gaudet.

CAPVT XV.



ET ERVM nè prolixior sim in re
tàm clarâ, tot tantilque autontati-
bus firmatâ, vfu deniquè longo, & ex-
perientiâ stabilitâ, breuiter adijciam
quod veluti basis sit, & fundamentum totius ar-
gumentî præsentis commentationis, in quâ, sicut
in omni re de quâ disputatio suscipitur, certus
præfigitur scopus, ad quem perueniri non po-
test, nisi per media consentanea, quæ quo fue-
rint propria magis, eo & breuior, & facilior ad-
eum aditus patefiet. Est autem Christianæ dig-
nitatis scopus, non hîc in terris sordescere, sed
animi splendorem illustrare, vt Deum cogno-
scat, à quo conditus est, & in hunc *μικρόκοσμον*
missus, donec iubeatur venire vbi delitijs nun-
quàm intermoris affluat, felicissimæque so-
cietate fruatur. Sed quia in hoc stadio arenoso
multo puluere sæpe conspergitur, & fræditatem
contrahit purificatione indiget, contempla-
tione videlicet sui; quod ille Sapiens probè vi-
derat, cuius symbolum *γινώσκεισιν αὐτὸν*. Quod vt
con-

consequenter Pitagoræi in solitudinem secesserunt, Diogenes rebus omnibus abdicatis, delio se conclusit, Plato Academiam, Cicero Tusculum, Anachoretæ eremum, Monasteria religiosi viri, alij aliud delegerunt; nimirum ut vel turbam euitarent, vel corpori commoditates subtraherent, quo certius animo pareret, minusque calcitraret; aliter enim homo educandus est, aliter porcus; hic enim saginatur ut viuatur, & iterum viuatur, nunquam deinceps moriturus. Quoniâ verò non omnibus ad summa datur contendere, nec cuius homini contingit adire Corinthum, sintque mortalium diuersæ sortes, præsumt vni, subsumt alteri; quidam sacra tractant, alij prophana: & ex his nobiles, alij è vulgo, in quo & viles & ciuiles, omnes tamen ad sublimia vocati, dum suas quisque functiones obit, fieri non potest ut vna sit omnibus animi curandi ratio, cum professionis diuersitas nec media, nec opportunitatem semper suppeditet. Prudentiâ incredibile ijs terminis conclusa est, quæ ad salutem methodus, qui infimis iuxta ac summis & faciles sunt, & necessarij, adeoque obstringunt omnes, ut qui velint ad perfectiora contendere, consilio uti liberum relinquatur. Olim sacerdotes, & leuitæ in templis, populus autem

in opere per ferias versabatur, à quo sabbatho abstinebat, vt ne cibum quidem coqueret, sed diuinis rebus vacaret. Christiani pro sabbatho, dominicum habent, tanquàm hebdomadariū pascha, & diem quietis, eiusque gratiā sextæ feriæ, & sabbathi abstinentiam: festā quædam pro encenijs, schenophegijsque cum vigilijs (vt vocant) in ieiunio, & abstinentiâ; & sicut olim bi-duo ante Dominicam fieri solet, sic pascha demum habet quadragesimam, quæ cibo priuat, & interdictis. Nec temerè profectò, quòd aliter mens nec excitari, nec perdurare posset. Vt homo igitur aliquandò se hominem esse ostendat sapientiæ studio aliquandò accuratiùs incumbere debet, ijs potissimùm temporibus, quibus ad diuini numinis Maiestatem propiùs accedit; ad quod præstantiorem regulam nullam inueniet, quàm eam quæ corpus, & maximè caput ad sapientiam accommodet, quam in sicco cum plurimis philosophis constituit Hippocrates: sicco, inquam, superfluæ, alienæque humiditatis experte, quod nihil aliud est, quàm temperamentum in quo sapientissimam, & memoriâ valentissimam animam ponit, præsertim si syncerissimum ignis, (vt ipse loquitur) aquam superet: cum cōtrâ si ab hâc nonnihil superatur, sapientia deficiat, nam vulgò dici solet, tantum cuique stulti-

*Lib. 1. de
diætâ.*

tię inesse, quantum humiditatis: exemplo sunt viridia ligna, quę ob aquę copiam non reddunt flammam pelluentem, & claram. Porro per calorem anima sicut suę fabricę est opifex, ita eandem non solum conseruat, verumetiã exornat, & polir; adeo vt temperamenta ipsa per se corrigat si sunt inepta, vt ex etatibus patet: pueri enim cum sint admodum humidi paulatim siccantur, vt cum adoleuerint sapiant; senes rursum collecto humore, e contra desipiant. Clarum idem est in ijs qui pani, & aquę adiudicantur ob proteruiam, & luxum: nam ex illis plerique non raro ad mentem redeunt, sicut etiam multa preclara ingenia otio, comestationibus, ebrietate prorsus oppressa, perierunt. Atque hoc est, quod dixit Hippocrates, dietã animam hominis vel flaccescere, vel vigere; nimirum artifici imputatur, si ob instrumenti ineptiam, opus minus sit accuratum, liquet maximè in arte pictoriã ex penicillo; scriptoriã, calamo: neque enim quis rectè vel pinxerit, vel scripserit, nisi optimè concinnatis. Eam curam solent homines impendere animę organis inferioribus, quę ad vitam tantum hepatis sanguinis officinę, & procreationis fomiti prestantissima offerendo alimenta, & homerica quę intimã vi illud tum roborent, tum excitet, alijsque rebus, quę facili, & plurimum nutrant.



chymum augeant , spiritusque multiplicent ad concupiscentie, & libidinis, quæ suo muneri credita sunt, commendationem. Ad cordis verò vim irascibilem aromata, vinum, & calorifica colliguntur, ex quibus vitalium spirituum flamma augetur, & inardescat. Nam

Ennius ipse pater nunquàm nisi potus ad arma

Profilijt:

Et inde furor etiam qui arma ministrat.

Anima cogitando deambulat per cerebrum.

CAPVT XVI.

CEREBRUM quod animæ arx est, & sacrarium, longè aliam sollicitudinem requirit, quòd menti seruiat; eo præstantius omnibus organis, quo diuiniorebus nominibus est consecratum, in quo homo tractat quæ cum cælestibus illi communia, cetera verò etiam bruta ratione destituta, & plantæ obtinent; functiones autem cerebri ut principes sunt, ita peculiarem quoque rationem, ac modum sortiuntur, spiritusque postulant eâ subtilitate, & splendore, ut cum sint substantiæ, eos Galenus voluerit luci solari comparare,

rare, vt eiusdem agilitatem, & impetum red lei et
 notiozem, quę non solùm in voluntarijs actioni-
 bus suâ promptitudine necessaria est, sed multo
 magis in cogitatione, de quâ autor ἐπισημίων sic
 enunciat; ψυχὴς περίπατος φροντὶς ἀνθρώποις; vt rectè
 dictum sit à Senecâ. Non potest grande aliquid,
 & suprâ ceteros loqui, nisi mota mens. Quis e-
 nim non animaduertit dùm anima præterita præ-
 sentibus confect, componit, diuidit, specula-
 tur, expendit, non omnia hæc motu facere
 tam expedite vt nihil magis: nam dùm hæret,
 aut longiùs abiit frontis perfricatione, aure
 vulgâ, aut capite scalpto constat excitari, & re-
 uocari, non secus ac si nolâ admonita cui-
 gula et. Videas etiam in summo, ac interiore
 loco duas insignes specus, quâ parte cerebrum
 mollius est, fingendis imaginibus, suscipien-
 disque ideis destinatas; in posteriore mino-
 rem vnâ, sed satis cauam ob loci firmiorem
 constitutionem, memoriæ archiuis deputatam;
 in medio angustior hinc inde transitum præbet;
 in quâ facilè turbatio accidit, si quandò impru-
 dentius neglecto ordine mens præcipitet, tan-
 tâ nonnunquàm iacturâ vt reparari non pos-
 sit, & cerebrum reddatur inutile discursui,
 non secus ac domus, cuius concidit tabula-
 tum; sed hoc potius est, vt intus puræ sint,

Aphor.

i. com-
ment. in

6. ἐπι-

σημ.

De tran-


quil. vitæ

lib. 1.

& niteant, nè obfuscentur species, impediatur discursus, & transeuntium reuocatio. Nam & in domo deambulationem impedimenta sistunt, fumus obtundit, & reditus obturatione prohibetur; quę omnia cùm in cerebro anima vltro citroque velut commeando imitetur, danda est opera vt vbi liberè eam agere volumus, obstacula quęuis diligenter submoueamus. Quod cùm ieiunio Ecclesiastico congruentissimè præstari iam sit demonstratum, superest quomodò victu quadagesimali in actione conseruetur, ac persequeret explicemus.

Pisces meditantibus, pariter ac ieiunantibus vtiliores: prudenter animo vacandum, nè menti obrepat turbatio.

CAPVT XVII.



SPIRITVS igitur ille, qui tenuitate quidlibet vincit, ex chymicis substantijs, quę quintę essentię appellantur, noscitur; siquidem vt hæ multiplici circulatione exquisitissimè, & ex fece sepius educuntur; sic ille ex sanguine, vilioreque materiâ, quę ipsi tanquàm fex sit, per varios, & velut reticulares anfractus foris, & intus mirabiliter elaboratur, vt rarissimus fiat, ideoque indi-

indiget custodiâ nè euanescat. Iam verò quod
 ars naturam imitando vitreis galeis, quibus liquo-
 res educuntur stillaticij, prorsus imperuijs moli-
 tur, nè materia tam pretiosa pereat, easdem quæ ir-
 rigando, prouidet nè feruore absumatur: hoc lon-
 gè prius natura prospexit: nam cerebrum maxi- *Cere-*
 mè frigidum, & humidum fecit, insigni præte- *brum*
 reâ mole dotatum in craneo securissimè collo- *non mo-*
 cavit; & nè tantillum loco moueretur, sed quie- *uetur.*
 sceret membranâ quadam, quam piam matrem
 vocant, in hoc osseo caluariæ vallo firmissimè
 in circulum vinciuit, & attexuit. Non enim de-
 cuit motus principium moueri, vt rectè nota-
 uit Philosophus, & αὐτοψία docet, & ratio. Quæ *Aristot.*
 omnia tale. n συνδρομὴν naturæ sagacitate, ac mihi *lib. de*
 providentiâ sortiuntur vt incomprehensibilis a- *Spiritu.*
 nimi illa summa, atque diuina vis coërceatur, de-
 tineatur, ac in officio persistat; cùm diuturniore
 agitatione, & motu, potissimum si contentio ac-
 cedat, vsu exploratum habeatur sic inardescere,
 & inflammari, vt insequatur delirium, quo ho-
 mo mirabili μεταμόρφωσι in beluam commute-
 tur; id quæ per longam inediam, non aliter ac per
 studia haud infrequenter contingere observa-
 tum est, vt mirum non sit, si ieiunio, & studio si-
 mul iunctis idem timeatur. Consilio itaque pru-
 dentissimè constitutum est, vt alimentorum in-

frequentiâ mens libera, qualitate secura sit ; nem-
pè si rarò, & piscibus maximè ieiunetur; qui fri-
gidi, & humidi cùm sint, talem succum exhibent
ex quo spiritus proueniant animales, durabilio-
re, & calori resistentes, quique tardù inflamm-
mètur quàm ex ouis, lacte, & carnibus. Hæc forte
is qui à Standonck cognominatus montem accu-
tum Lutetiæ Parisiorum, & Louanij domum sibi
cognominem exstruxit, olim intuitus est, licet æ-
tas alumnorum dissentiat, cùm nec bonos pisces
habeant, nec satis pro incremento nutriantur;
quod multi graues, & excellentes viri sæpe con-
questi sunt, vt meâ sanè opinionè utilius à supe-
riore potestate ibidem victus imperata forma
dispensatione mutaretur. De laponibus interim
fertur quòd dociles sint, & ingeniosi, quos con-
stat non solùm parcissimè, sed etiam tenuiter ad-
modùm victitare, adeò vt vix piscibus vtantur, le-
gumina, oriza præcipue epulæ nobilium, & rarò
satis vsurpantur, alioquin folia colligunt, & siccat
in annonam viuunt nihilominù, & valèt quan-
tumuis medicis destituti. In Hollâdiâ, & Zeelan-
diâ quotquot ex piscatione viuunt, vix vnquam
carnes attingunt: sed & multis è vulgo passim
fortuna non carnes solùm, sed & pisces denegat
totâ vitâ, vt fere perpetuam seruare quadragesi-
mam videantur. Sed nec Anglis satis est biuana

à car-

*Massens.
Lib. la-
ponic. 2.
3. 4. Et
comment.
rerum in
oriente
gestarum
de æthio-
picâ.
Olius
magnus
de viela
septen.*

à carnibus abstinentia, nisi (quod omnibus manifestum est) & additus Mercurij dies ichthyophagiæ obstringitur: forte quia Cecilius ille ita voluit, & oculis quorundā conducit, non erit tam frequēs piscium vsus noxijs sanitati. Ad hæc cerebri temperamento respondens alimētum quadragesimalē à calidā intemperie tuerur, quā, licet difficulter, capitur tamen, si nimium rota voluatur, quod contingit violentiā, & immodicā cogitatione. Ergo pisciū esu mentis emotioni occurritur ad eum modum quo phrenitides, mania, vigiliæque curantur quæ syrupis papauerino, violaceo, è nymphaea, similibusque frigidis, ac humidis vincuntur. Proinde, ut qui ieiuniū præceptū salubriter exequatur, certa sibi tempora præfigat orandi, edendi que, & œconomie humanæ officia confundat, det corpori, det menti vicissim, & oportunè iuxta Medicæ discipline normā, quæ satis est explicata. Quare rectè Carthusiani qui semper piscibus victitant, & Minimi, qui quadragesimalē victū perpetuum profitentur, PP. Benedictini, & Dominicani, & alij sanctissimi ordines nonnulli ex primā institutione plurimū, & diu ieiunij se maccrant, præsertim à mense Septembri cum imbium reditu vsque ad Aprilem orandi tempora partiuntur; vigilijs somno; famem refectione; mentem quiete; aut suavi vicissitudine temperant,

& optimè, ac diutissimè viuunt. Franciscani quanquàm continuò non vescantur piscibus, ieiunium in plures tamen partiuntur vices, consulto sanè, quòd in Euangelio prædicando, plurimum corpore laborent, cùm varijs in locis eodem quandoque die, operam suam ex affluentia caritatis impendunt.

*Qui excusentur à ieiunio secundum
Medicos?*

CAPVT XVIII.



VM ergò victus talis fuerit, qui non faciliè sanguis inflammetur, siue legumina, siue pisces, & feliciùs succedet abstinentia, & mentis exercitia erunt tutiora. Videas in Dyonisio Carthusiano ecclasiim triduanam sine corporis offensione crebram, tam constantem vt vel sine cibo meditaretur, vel ingestum quandoque à fratre non animaduertisset. Quòd si verò ieiunandi Ecclesię forma, ac vñitata edulia, vt subinde accidit, nonnullos grauiùs affligant, atque catharros, vertigines capitis, stomachique dolores pariant, Medici prudentis consilio ratio temperetur, quemadmodum in diuortijs ob alterutrius impotentiam, idque genus alijs causis obseruari solet.

let. Rigorem eundem non omnibus conuenire Hippocrates ipse aureâ sententiâ indicauit, ætati, *Aphor. 15. lib. 1.* tempori, nature, ac consuetudini (quibus rectè addideris, regioni, ac climati) aliquid indulgendum docens. Proindè æstate, & Autumno cibi *Aphor. 18. lib. 1.* difficillimè feruntur, hyeme facillimè, secundum locum ver habet; senes ieiunium facillimè ferunt, *Aphor. 13. lib. 1.* secundo loco qui ætatem consistentem habent, minùs adoleſcentes, omnium minimè pueri, præsertim qui inter ipsos sunt viuidioreſ. Qui crescent plurimum habent calidi innati, *Aphor. 14.* plurimo igitur egent alimento, alioquin corpus abſumitur, senibus verò parùm calidi innati est, paucis proptereâ fomitibus egent, quia à multis extinguntur. Hyeme, & vere quidem ventres *Aphor. 15.* calidiores, ideoque copioſum alimentum exigunt, calor quippe introrſum per ἀντιπερίστασι co- gitur ijs anni constitutionibus; hyeme quidem, & veris initio, quòd hyemis quaſi natiuam indolem ex ſucceſſione mutuetur. Sed non ſatis eſt ipſum tempus conſideraſſe, niſi etiam corporum per ipſa tempora diſpoſitionem, quæ humida cùm ſint, & cruditatibus onerata conſtat minimè alimentis grauanda, quòd plus ſatis calor in centrum coaſtus inueniat in quæ ſe totum impendat, & exerceat. Sed quemadmodum coniectari *Lib. 1. aphor. 15.* oportet an æger cum victu ſufficiat perdurare,

donec morbus consistat, & nunquid prius ille deficiat, nec possit cum victu perdurare, sic etiam expendendum est, quousque, & quatenus ieiunia quispiam & maximè quadragesimam quiverit peragere. Etenim pueri excipiendi sunt, quique adhuc crescunt, in quibus multum contumitur. Prægnantes, & lactentes quod plures alant pluri cibo indigent: infirmi, & senes, non tam crudi illi, & *ωογέροντες* virentes ab anno quinquagesimo ad sexagesimum (de quibus Hippocratis paulò ante citata verba intelligenda sunt) quàm decrepiti, sæpius & parùm nutrimenti postulant, quod calor in illis debilis sit, & ob partium duritiem tardior ciborum distributio. Denique viatores, fossores, messorum, helcyarii, baiuli, tullones, fabri, ceteraque operantium turba, quando confectum, & plurimùm exhaustiuntur, iustâ ratione à ieiunio excusantur: nec minorem noxam à ciborum priuatione experiuntur *φιλόμοροι* qui plurimùm ingenio, & voce contendunt, quos prius ex Ecclesiæ archiuis descripsimus. Biliosi quoque, & ad choleram proclives inediam ferendo non sunt, quod magis accendantur, & turbentur humores: à piscium tamen esu non possunt excusari, ob contrarietatem temperamenti, pisces enim frigidi & humidum, illi verò calidi & sicci. Ut in summâ dicam idque

inge-

ingenuè, nemo de abſtinentiæ legibus vllò iure conqueri poteſt, cùm ſi valetudo firma fuerit omnis noxæ occaſio prudentiſſimè præcindatur: ſin autem infirmior, aut debilis, eximatur. Iàm verò etiam lacticiniorum plerique in locis vſus conceditur, tùm quòd natura humana tempore atteratur, tùm quòd maleuolis occurrendum indulgentiâ ſit, & pietatis vigor deferbuerit; quanquàm olim inter remedia quæ corporis ſanitatem conſeruant duo fere præcipua habita ſint, ſcilicet abſtinentia à cibo, & potu decimo quoque die adhibita, & vſus potus ſalubriſque inter alia in libro quodam vetuſto in bibliothecâ Segebergensi ſe reperiſſe fatetur Ranzonius, cui titulus, Alexander de ſecretis ſecretorum, ſive de regimine Principum, qui quanquàm non erat perfectus, videbatur tamen compoſitus, inquit, tempore Auguſti, quod apparebat tùm ex inſcriptione quæ ad Mæcenatem erat, tùm ex puritate dictionis. Hæc ille. Cui hæc duo remedia ad vitam longam, & ſanitatem integram conſeruandam non parùm momenti adferre etiam viſa ſunt. Certo item hoc ſibi quiſque perſuaſum habeat jeiunio, & abſtinentiæ non deſſe voluptatem, nam

*Ranzon.
c. 23. de
valet.
conſer-
uanda.*

In Venetis sint lauta licet conuiuia terris

Principium cæne gobiis esse solet.

nisi quis inuitus suscipiat, nec fere inferre detrimentum, nisi ex proprio errore, ingluuie, immodestiâ, ac negligentia sibi hoc quispiam conciliet, sic enim ieiunij fructum faciliè perdunt, & magnâ iniuriâ sese afficiunt: cuius præclaras, & necessarias dotes ijs commendatas esse velim qui suam valetudinem caram habent, & quod multorum exemplo constat, diu feliciterque vivere desiderant, menti denique, ac orationi vacare, quod est præcipuum officium hominis Christiani.

F I N I S.



I N
LIBRVM MEDICO-ECCLE-
SIASTICVM CL. D. IOANNIS
VVALTERII VIRINGI
Medicinæ Hierophantæ.



ATVRÆ imperio Leges pugnare sacratas,
 Non vna è Rheni rana palude tonat:
 Fraudari genium grūduli Grwmius olim
 De grege clamanit, cui popa venter erat.
 Sic sua tendebat vacuo perplexa palato
 Retia, venatrix ingeniosa, Gula!
 Non tulit hanc falso prætexi nomine culpam
 VIRINGVS, stadio clarus HYGÆA tuo:
 VIRINGVS, Grudium quo decedente Lyceum
 Poscit adhuc caro suppetias capiti:
 VIRINGVS, prælustre Chori iubar Atrebatæi,
 Gemmato MARIÆ sardius in strophio.
 Cedo, ait; & facili diuinam virtute duellum,
 Captus in amplexus hostis ab hoste ruet.
 Non Troiam vt capiens ibat captiua iuuentus,
 Non vt equum capiens Phryx modò captus abit;
 Sed velut implexis conspirant vitibus vlni,
 Et velut à sociâ purpurat vna suâ.
 I nunc, vane pepo, bellorum finge timores:
 VIRINGVS, positâ lite, sequester erit.

Heribertus Rosvveus Societatis I E S V.

CLARISSIMO
D. I. VV. VIRINGO DOMI-
NO, ET COGNATO.

SANAM qui mentem rogitas in corpore sano,
Sanus & etatem viuere nestoream;
His, tibi VIRINGVS quas scribit, legibus vti
Disce, valent animis, corporibusque valent.

Iacobus van Haecht I. V. Doctor.

IOANNES
WALTERIVS VIRINGVS
O VNVS VRGENS ALTIVS IEIVNARI,
O IEIVNARI LIBER VRGENS ALTIVS VNVS,
Sit sat, id arcanum nomen, & omen habet.

*In errorem pseudomedicorum Leon. Fuchij, & Iani Corn.
de jeiunio Verni temporis.*



VECCHIVS obfuscet veris jeiunia falsò,
Sit tui hic erro sequax Iouiniane Iouis,
Aërio sufflet, Brentinis afflet oletis,
Scripta Lutheriaco commaculêrque luto,
Caluitio obnubat Caluinia tempora, Fuscas
Orci & sub verno rore propinet aquas,
Sit Leo non nardus, Strygij at Sardoa Leonis,
Non odor hinc nardi, sed stygis ardor olet;
Ianus olens, sine fronte bifrons, Cornarius hircum,
Cornibus Abromios adferiatque suis,
Erret vterque tenax Bromij patronus, & altè
Vrgeat hoc vetitis Gurgès vterque cibus,
Tu jeiunari quàm quivis altius vrges,
Et tuus ò vnus Magne VIRINGE liber.

Guilhelmus Opstaël Medicus Valentianus.

IOANNES VIRINGVS.

VIRINGENIO SANVS.

IGNAVIS hominum, timidisque infamia turpis
 Tanquàm semiuiris semper iniusta fuit.
 Perpetuò magna est sectatus, & ardua magnus
 VIRINGVS, spreuit vilia, temsit humum.
 Corporibus medicâ, Paulinâ consulit arte
 Mentibus: hic testis mistus utrâque liber.
 Sunt, quibus ingenium dederit natura, Deusque
 Prauo sunt animo, iudicioque carent.
 Sana huiusce viri doctrina: Ecclesia quicquid
 Sentit, idem scriptor sentit, idemque docet.
 Laus hæc quanta? VIR est, excellit acumine mentis:
 INGENIO SANVS non nisi recta probat.
 Nomine nec solo sunt hæc testata, probantur
 Moribus, ingenij fætibus, artis ope.

Antonius Meyerus.

IOANNES VVALTIERIVS VIRINGVS

ANAGRAMMA.

En Vigor vnus salutaris jeiunî.



HOEBI munera quo libelle prodas,
Dei munere quin libelle prodis?
Seu sedes animi, comesque corpus,
Fibris nutriat artuum Dolorem;
Seu mentem nimium malignus hostis
Curarum vehat orbe non quieto;
Dat certam liber vnus hic salutem:
Ieiuni Vigor vnus hîc salubris,
Et mentem iuuat, artuum & medetur.
O libri facilem beatitatem!
Phœbi munera qui libelle prodis,
Dei munere quin libelle prodis?

VIRINGI hic fatus; formam vel caput ab ipso:
Nulla parem melius picta tabella tulit.

Rob. Rozæ Valencen.

EPI-

EPIGRAMMA

AD LECTOREM,

Philippi Meyeri Atrebatij.



O s , quibus est cordi lautis accumbere
 mensis,
 Et certare mero solidis potando diebus,
 Hinc procul ite, satur quibus est pro Numine venter;
 Scilicet haud vobis dñas emisit in auras,
 Ingenij monimenta sui, lacerantia luxum,
 Nobilis insigni VIRINGIVS arte medendi.
 Nil, nisi sobrietas doctis laudata libellis
 Suadetur, virtusque malo contraria Como.
 Aurea qui penitus fuerit præcepta secutus;
 Percipiet, gemino donatus munere, frugem;
 Incolumem longos vitam producet in annos,
 Nec podagræ, nec erit morbis obnoxius ullis;
 Denique post obitum, iam sobrietate piatam
 Flagitijs animam, radiantibus inferet astris.



C E N S V R A.

H quinque Libri *De jeunio, & abſtinentiâ*, ab eruditiss.
clarissimoque Medicinæ Doctore, presbytero, Domi-
no IOANNE VIRINGO conscripti, quibus & sanctissi-
mus Ecclesiastici jeunij ritus ab improbis sectariorum ca-
lumnijs vindicatur, & salutaris abſtinentiæ modus ostendi-
tur, meo iudicio planè digni sunt, quos legant omnes ij qui-
bus vtriusque hominis tam interioris, quàm exterioris in
hoc abſtinentiæ, & jeunij genere iuuandi, curandi que ſtu-
dium est, Duaci die quintâ Februarij anni 1597.

*Guilielmus Estius sacra Theologia Doctör, & di-
ninarum literarum in academiâ Duacensi Re-
gius, ordinariusq; professor.*

Hos quinque *De jeunio, & abſtinentiâ* IOANNIS VV AL-
TERII VIRINGI Medicinæ Doctöris, presbyteri, & Ec-
clesiæ Cathed. B Mariæ Atrebatensis Canobici libros, in
quibus piè, & solidè ostendit jeunium Ecclesiasticum non
solùm animę, sed & corporis salutem, temporalemque
Reipublicæ vtilitatem promouere, cum magno fructu
typis excudi possesentio. Ianuarij 12. 1597. Iacobus de
Bay S. Theol. Doctör, & regius in academiâ Louanienti
professor.

LIBROS quinque Clarissimi viri IOANNIS VVAL-
TERII VIRINGI Medicinæ Doctoris, Confratris mei
amantissimi de abstinentiâ, & jeiunio tractantes: iudico esse
admodum vtilis, & dignos qui typis excudantur. Nec esse in
eis quidquam quod sacris Ecclesiæ Catholicæ, & Romanæ
sanctionibus aduerferetur. In cuius rei iudem signum manuale
meum hic apposui 12. Februarij. 1597.

*Franciscus Maugrè Ecclesia Atreba-
tensis Canonicus, & Prapostum.*

Hi quinque Domini IOANNIS VVALTERII VIRINGI
Canonici Atrebatensis, & Medicinæ Doctoris de Medic'ecclē-
siastico jeiunio miscelli libri & prelo, & cedro digni sunt: cum
ad animi, corpori, quæ curam, & ad Ecclesiæ, medicorum quæ
de abstinentiâ præscripta confirmanda aduersus galtrimargos,
Iurcones, & helluosos nostri seculi hæreticos impendio con-
ducant. Atreb. 26. Martij 1597.

*Guilielmus Gazæus Ariensis, paræcia S. Maria
Magdalenes apud Atrebatenses Pastor, libro-
rumq; Censor.*

G V I L I E L M O R I V E R I O
T Y P O G R A P H O A T R E B A T .

Q V I D possit Typographus arte, ac fide: tuus hic labor
R I V E R I demonstrat. Dignus profectò bonâ fortu-
nâ : agnoscent, & fatebuntur quotquot periti iudices, ac
synceri; prælum, character, nitore testantur. Exemplo est
breuissimo tempore opus perductum ad finem : nempe
P L A N T I N I R I V E R I Æ es germanus nepos. Id causæ cur
te vnum delegerim, cui Copiam *Librum de ieiunio, & absti-*
nentiâ imprimendi facerem, ex mente Max. Cathol. nostri
Regis, & ceteris, ni consensero, inhiberem. Vale.
Atrebatî è Rigiâciis inante-diem Cal. Aprileis.


M. D. XCVII.

I O A N . V V A L T E R I V S
V I R I N G V S .


Per Regem in Secretario Concilio Bruxellis
1597. Ian. 23.

Signat.

Berthj.







+ colorchecker CLASSIC

+ calibrite



mm